

MORRISON'S POEMS.

Campbell . 1. 938





MARBHRAINN

AGUS

DÀNA SPORADAIL EILE :

LE

IAIN MORASTAN

A BHA NA FHEAR—CEASNACHAIDH AIG AN EAGLAIS
SHAOIR ANNS NÀ

H-EARRADH.

AGUS

IOMRADH AITHGHEARR

AIR

AN UGHDAIR

LE


ALASTAIR MAC 'ILLEAIN.



T O R O N T O :

CLÒDH-BHUAILTE LE LOVELL AGUS GIBSON.

1861.



IOMRADH AITHIGHEARR

AIR

IAIN MORASTAN,

Ughdair na 'n Dànailh a Leanas.

RUGADH Iain Morastan anns na H-earradh, ann an Siorramachd Inbhirnis, mu thimechioll a bhliadhna 1790; agus chaochail e 's 'a bhliadhna 1852. Agus gun teagamh dh' fheudadh e ràdh mar thubhairt Iacob ri Pharaoh: "Bu tearc agus olc làithean bhliadhnacha mo bheatha, agus cha d' ràinig iad làithean bhlianacha beatha m' aithriche ann an laithibh an cuairte-san."—Gen. xlvii. 9. Bha briathran an t' Salmadair freagarrach dhà re a chuairt san fhasach: "Is lionmhor amh-gharan an fhìreìn, ach asda air fad saoraidh an Tighearna e."—Salm xxxiv. 19.

Be chèaird ris an do thogadh Iain Morastan ann an laith-an oige a ghoibhneachd. Lean e chèaird so iomadh bliadhna; agus bha e na ghobha ainmeil. Ge d' a bha mise eòlach air, cha n' eil fios agam co a bhliadhna san do dh' fhosgail an Tighearna a thuigse, agus anns an robh e air iompachadh o dhorchadas gu solus, agus o chumhachd Shatain gu Dia. Ach tha fios agam nach robh e ach na dhuine óg, nuair a dhùisg an Tighearna e. San àm an d' rugadh an t-Ughdair, cha robh an Soisgeul 's na H-earradh, no ann 's na h-Eileanan bha timchioll air. Be Eilean Leobhais (Lewis), a chèud aon diubh, dh' fhiosraich an Tighearn le solus Soisgeil glormhor chriosd. San àm so cha robh guth an turtuir ri chluinntinn

's an tìr. Gidheadh, bha Ministerean 's na cearnan ud san àm so. Ach ma bha cha b' fheàrr iad na Sagairt a Phàpa. Se bha annta na daill a treorachadh na 'n daill do 'n chlais.

Cha mho 's urrainn mi ràdh co bha na mheadhoin fo laimh an Tighearn air iompachadh. Ach se mo bheachd ma bha neach sam bith seasamh san daimh sin dha, gum be an t'urramach agus an diadhair mor saothrachail Dr. Domhnallach na Toisidheachd; agus 's iomadh aon bhàrr air dan robh seirbhis an t-soisgeulaiche ud air a bheannachadh. Nuair bha an Dr. Domhnallach air a thurus do Eilean H-iorta thaoghail e 's na H-earradh agus shearmonaich e ann; agus air a chuid is lugha feudaidh sinn a ràdh gun robh an Gobha air ùrachadh gu mor leis na chuala e uaithe. Feudaidh e bhith gur ann ris an àm so tha briathran an ughdair anns an Dàn :
 “ Tha Duin òg a 's seann duin agam,” 'g 'amharc mar tha e 'g radh :

“ Nuair thàinig an t-òg am ionnsaidh

Fhuair e 'n Seann duine na dhùsal,

'Sa cheud fhàilte a rinn e dhùsgadh

Sud fo lùirich bheireadh braidean.

Air a bhonn do chaidh an còmhrag

Tarruing làn ro ghleusd' air gheòiread,

Fhuair an Seann duin buille-leònaidh

Nach cuir e ra bheo as altaibh.”

Nuair chaidh Iain Morastan a dhùsgadh chaidh a dhùsgadh da rìreadh. “ Is sibhse,” ars Criosd, “ solus an t-saoghail, cha 'n fheudar baile a ta air a shuidheachadh air sliabh fholach. Agus cha las daoine coinneal, chum gu 'n cuir iad i fuidh shoitheach, ach ann an coinneir, agus ni i solus do na bheil a stigh.”—Mata v. 14, 15. Sann mar sin thachair do 'n ughdair so : nuair a shoillsich an Tighearn e, thainig e gu bhi ann 's na H-earradh na “ lochran lasarach agus dealrach;” agus bha iomadh “ toileach car tamuill gairdeachas a dheanamh 'na sholus. Nuair dhàmbhaire e mu 'n cuairt agus a

chunnaic e dorchadas na Ministeirean, aineolas agus saobh-chreidimh an t' sluaigh, cosmhuil ri Samson: "Thoisich Spiorad an Tighearna r'a bhrosnachadh air uairibh;" agus cosmhuil ri Pol ann an baile na h-Aithne, "bha a spiorad air a bhrosnuchadh ann, do bhrìgh gu 'm fac e am baile lan iodhol-aoraidh."—Gnìomh. xvii. 16. Air ball shearmonaich e Criosda don t-sluagh, agus thug e rabhadh dhoibh gu teich-eadh on fheirg a ta ri teachd. Bha e ris a ghoibhneachd re an latha, agus a searmonachadh an t-Soisgeil mar bu trice na h-uile oidhche. Dh' fheudadh e da rìreadh ràdh mar thubhairt Iacob: "Mar so bha mi; san là chlaoidh an teas mi, agus an reotha san oidhche; agus dhealaich mo chodal ri m' shuilibh." Ann an seirbheis an Tighearna bha e mar bha luchd togail an teampuill; "le aon laimh anns an obair, agus leis an laimh eile chum e gath."—Neh. iv. 17. Ach bha lamh an Tighearna gu cumhachdach maille ris; agus chreid air-eamh mhor, agus phill iad chum an Tighearna.

Ach cha robh an obair bha so a còrdadh ris na Ministeirean; agus uime sin cosmhuil ris na h-àrd-shagairt agus na Phairisich "thubhairt iad, ciod a tha sinn 'a deanamh? Oir a ta an duine so deanamh mòrain mhiorbhuile. Ma leigeas sinn leis air an dòigh so, creididh na h-uile dhaoine ann."—Eoin xi. 47, 48. Cha robh Ministear soisgeulach aca riamh sna H-earradh gu's o chionn beagan bhlianaich. Agus be sin an t' ao-bhar airson an deachaidh an gobha agus na Ministeirean an aghaidh a chèile. Cha be a chréud no iarrtus bhi 'n 'aghaidh Mhinisteirean, coslach ri siochairean bochda tha 'n duil gum bheil iad nan daoine soilleir diadhaidh nuair tha 'm féin spéis agus an aineolas gam buaireadh gu eiridh suas an aghaidh ordugh agus deagh-riaghailt. Cha bann idir chum bhi na dhuine mòr os cionn sluaigh thug e rabhadh dhoibh thaobh teagasgan mearachdach na Ministeirean; ach thaobh a churaim do ghloir Dhia, agus a thruais do n' anamana neo-bhas-mhor. Bha e mar shalann anns an tìr anns an robh a chomh-

nuidh. Bha beannachd an Tighearna n' cois a sheirbhís, agus bha moran don t-sluagh air an toirt chum colais na firinn air chor agus gu 'n do dh' fhag iad na Ministeirean. Ach cha robh iad gun Mhinisteir nuair bha e fein aca. Gidheadh bha easan 'g 'ionndrainn gu mòr nach robh fear-iùil soisgeulach na 'm measg.

Thionndaidh an sluagh mu dheireadh cho mor n' aghaidh na 'n truaghain do Luch-tuarasdail Mhinisteirean bha a chléir agus am Pàtron a suidheachadh nam measg, agus gum b' eigin do 'n chléir na saighdeirean thoirt a Inbhirnis chum na gad-aichean agus na fir-reubainn chur suas air sheol eile.—Eoin x. 1. Ach cha d' eisd na caoraich ri guth na n' coigreach ud. Bha pobull an Tighearna s' na H-carradh san àm so, agus anns na h-Eileanaibh mu 'n cuairt, ann an daorsa chruaidh le Ministeirean gun ghras. Bha cadhoin am beatha searbh dhoibh le daorsa chruaidh. Sann an sin thubhairt an Gobha :

Ged tha sinn fo àmhghar
 A nis 's ro dhuilich :
 'S luchd teagaisg gu 'n ghràs
 Air teachd oirnn ga b' oil leinn,
 Tha gealladh dhuinn nach fagair
 Fo chuing sinn aig luchd Patroin
 Oir thig ar saors 'o 'n àirde
 Le slàint as sonas,
 Tha ar Buachaill gàisgeil,
 S bheir e buaidh a mach dhuinn
 S leis fein ar coir fuasglaidh
 O 'n daorsa air teachd oirnn.
 'S feitheamaid gu ciallach
 A nis car tamuill,
 Gus an d' thig comhlionadh
 Dhuinn air a ghealladh,
 'S nach bi clèir ann diadhaidh
 Le aineart oirnn a riaghladh,

Oir gheibh sinn fuasgladh fìorghlan
 Ri 'n fhiach dhuinn fantuinn,
 Tha 'n t-am ruinn a teannadh
 Faisg air laimh le cabhaig
 'S theid cinn-iuil na 'n dall
 A mach o 'r càmp a sgaradh.

Annas na h-amannan dorchas so, bha an tearc dhuaisg Spiorad an Tighearn gus an cunnart thaobh naduir fhaicinn sna cearnan ud agus a chuir gras Dhe gluasad air n' innigh airson Chrìosd, cosmhuil ris na Grengaich bhochda bha "am measg na muinntir a chaidh suas chum aoradh dheanamh aig an fhéill," agus bha "ag ràdh," "A thighearna, bu mhiann linn Iosa fhaicinn."—Eoin xii. 20. Bha iad gun amharus cosmhuil ris na "Druidhean thainig o' n àird an ear gu Ierusalem. Ag ràdh, c' àit am bheil Rìgh sin nan Iudhach a ta air a bhreth, oir chunnaic sinne a reult san àird an ear, agus a ta sinn air teachd a thabhairt aoraidh dha."—Mata. ii. 1. Bu tric bha na deòiridhean so an suidheachadh na h-Eaglais nuair bha i 'g 'radh: "Air mo leabaidh annas an oidche dh' iarr mi an ti d' am bheil gràdh aig m' anam: dh'-iarr mi e, ach cha d' fhuair mi e. Eiridh mi a nis, agus théid mi mu 'n cuairt annas a chaithir, annas na sraidibh, agus annas na slighibh farsuinn, iarraidh mi easan d' am bheil gràdh aig m' anam; dh' iarr mi e, ach cha' d' fhuair mi e. Thachair orm an luchd-faire à dol mu 'n cuairt annas a chaithir: Am faca sibh an ti d' am bheil gràdh aig m' anam."—Dan. iii. 1. Fhuair an luchd-faire a bha dol air an cuairt sa' chaithir mi; bhuail iad mi, lot iad mi; thug luchd coimhid nam balla m' fhalluinn dhiom."—Dan. v. 7. Sann mar so gun teagamh bhuin a chlèir ris na h-anamanna bha gu bronach 'g iarraidh Chrìosda sna h-eileanan an iar sna laithean ud. Bha bruidealas agus ain-gidheachd, misgearachd agus raoitealachd na clèir aig a leithid dh' àirde sna laithean so, agus nach creideadh daoine nach fhaca leithid, gur fìrinn tha ann ge d' chuireadh neach fo 'n comhair e. Neach sam bith ghabhadh air fein urnuigh

chur suas ri Dia, no na Sgriobtuirean a leughadh na theaghlach, shearmonaichheadh na Ministerean air an t' sabaid air mur chealgaire agus mur Phairiseach; agus dheanadh iad an uile dhìchioll chleachdadh ris an Uachdaran chum an tilgeadh as an tigh agus as am fearann agus an cur air falbh as an dùthaich. Ach burrainn am fuigheall bha aig an Tighearne a rèir taghadh a gbrais san tìr a ràdh: "Cha deachaidh mi ach beagan air m'aghaidh uatha, 'nuair a fhuair mi esan d' am bheil gràdh aig m' anam; rinn mi greim air, agus cha leiginn as e, gus an d' thug mi e do thigh mo mhathar agus d' a seòmars-a a rug mi."—Dan. iii. 4. Bha na ceud-thoraidhean bha aig an Tighearna sna tirean ud na muinntir threun: "O anmhuinneachd a rinneadh neartmhor, a dh' fhas treun ann an cath a chuir air theicheadh armailte na coimheach." Agus gun teagamh cha robh neach dhiubh na bu ghaisgeile na Iain Morastan ann an seirbhis an Tighearna. Bhuilich an Tighearna air tàlanna mòr agus grasan mòra agus cha be folach san talamh a rinn e.

Ach ann bhi labhairt air na céud-thoraidhean bha aig an Tighearna sna tirean so, feumaidh mi iomradh aithgear dheanamh air Fionnla Munro, duine bochd a thainig o thuath, agus chaidh mun cuairt a searmonachadh Chriosda 's na h-eileanan an iar. 'nuair bha an sluagh gu spioradail fo dhorchadas dh' fheudtadh laimhsicheadh. Cha'n'eil mi an amharus nach be gràdh Chriosda agus truas do 'n t' sluagh 'dh 'eignich e gu 's a dhol mun cuairt nam measg. Cha mhò tha mi an teagamh, o na chuala mi thaobh an duine so, nach robh cuid do nitheana maille ris, nach bu mhisde e bhi uaithe; agus co e an neach nach'eil sin fìor mu thimchioll ann an tomhas mor na beag. Ach gabhaidh mise orm a ràdh gum bu duine èndmhor agus diadhaidh Fionnla Munro: agus a bharr air 'sin, nach deachaidh duine riamh do 'n tìr 's an do thogadh mi 's mo bheannaich an Tighearna shaothair 's an t' Soisgeul na 'n duine bochd simplidh so. Feudaidd mi ràdh gur e chuir an siol air tus san tìr, agus gum bheil cuid da chloinn 's an Tighearna

beo innte fhathast, ged tha cuid tha nis na 'n codal. Dh' fheudadh e ràdh riu mur thubhairt Pol ris na Corintianaich : “Nach sibhse m' obair 's an Tighearna? Mur' eil mi a' m' Abstol do dhaoineibh eile, gidheadh gu cinnteach tha mi dhuibhse ; oir is sibhse seula m' abstolachd ann 's an Tighearna.” Ach fhuair an duine simplidh so a sharachudh sna cearnan ud. Bha chlàir air boile na aghaidh, agus bha an sluagh aineolach agus borb a buintinn gu bruideil ris anns gach aite. Ach dh-fheudadh e ràdh : “Gidheadh sheas an Tighearna làimh rium, agus neartaich e mi, chum triomsa gu'm biodh an searmonachadh air a lan fhoillseachach ; agus gun cluineadh na cinnich uile e ; agus shaoradh mi a beul an leómhain.”—2 Tim. iv. 17. Cha bann le oirdheirceas cainnte, no gliocais a chaidh Fionnla Munro a chur an céill teisteis Dhe. San a bha e cosmhuil ri Eoin Baiste, searmonaiche na fasaich, “Aig an robh chulaidh do fhionna chàmhail : agus crios leathair aige timchioll a leasraidh ; agus d' am bu bhiadh locuist agus mil-fhiadhaich.”—Mata. iii 4.

Bha Domhnall Munro san Eilean Sgiathanach (Skye) Iain Moristan sna H-earradb, agus beagan eile nach robh cho iomraideach riusan, mur a “Neul beag cosmhuil ri bois duine a' g' eirigh as an fhairge bha leigeadh ris gun robh uisge mòr faisg air laimh.” Bha iad mar a chraoibh fhige bha nochdadh gu 'n robh an samhradh am fagus, thaobh an duillich a bha iad a cur a mach. A rèir sin tha Morastan 'g ràdh san òran :

Tha duilleach na craoibh fhige

Aig innse mar theachdair'.

Gu bheil samhradh sìochail

A tighin am fagus.

Gu 'n teagamh bha Domhnall Munro sna h-Eileananan a niar mur bha an colman a thainig a dh-ionnsuidh Noah le duilleag craoibh ola na ghob, a bha leigeadh ris dha gun robh àm fhuasglaidh dlu do laimh. Bha an t-Eilean Sgiathanach san àm ud fo neul trom agus fo dhorchadas tiugh. Feudaidh e bhith gun do leugh an leughadair mu thimchioll nighean og

bha air a dusgadh 's an Eilean Sgiathanach agus air a gluasad chum an Tighearna iarraidh. Bha i dol mu 'n cuairt san tìr agus a feorach do gach aon am burrainn iad eolas sam bith thoirt dhith air Dia; agus cha robh duine san tìr da'm b'aithne a trioblaid. Lean i air a cuairt do thirean eile, feorach mur bha i falbh: "Ann faca sibh an tì d' am bheil gràdh aig m' anam?" Agus chaidh i air a h-aghaidh gus an d' fhuair i easan da 'n robh gràdh aig a h-anam; rinn i greim air agus cha leigeadh i as e, gus an d' thug i e do thigh a màthar, agus da seòmar-sa a rug i. B' iongantach da rìreadh deilgein an Tighearna ri Domhnall Munro, thug e uairthe a fhradharc 'nuar bha e na leanabh; agus an deigh sin thug e dha leithid do dh' ungadh on airde, maille ri cuibhrionn dhubailte da Spiorad, agus nach robh duine ann na latha bu mhò chaidh mach ann an lànachd beannachaidh Soisgeil Chrìosda no easan. Rinn an Spiorad Naomha gun amharus an duine dall na Mhinistear foghainteach an Tiomnaidh Nuaidh. Dh' fheudadh e ràdh, "Air aon nì tha fhios agam; air dhomh bhi dall: gu bheil mi nis a' faicinn." Nach iongantach da rìreadh obair an Tighearna; nuair chuir e Maois do' n Eiphit, bha an duine ciuin a gearain agus ag ràdh, "Co mise, gu 'n rachainn a dh'ionnsuidh Pharaoh, agus gu 'n tugainn a mach clann Israeil as an Eiphit." "O mo Thighearna, cha duine deas chainnteach mi aon chuid roimhe so, no o'n àm san do labhair thusa ri d' sheirbhiseach: do bhrìgh gu bheil mi mall ann an cainnt, agus mall ann an teangaidh." "Agus thubhairt an Tighearna ris, Cò a rinn beul an duine? No co a rinn am balbh, no 'n bodhar, no 'n tì a chi, no 'n dall? Nach mise an Tighearna."—Exodus iv. 10, 11. Ba mhianna leam iomradh a dheanamh air an fhìcean urramach so, air an robh mòr mheas aig Iain Morastan, ma' r chi sinn o'n MHARBU-RANN rinn e dha, agus a tha againn san leabhar so, ach cha' n' fheud mi an còr a ràdh aig an am so, ach a mha'n an leughadair chur an cuimhne briathran Phoil: "Ach roghnuich Dia nìthe aimeadach an t' saoghail, chum gu 'n cuireadh e nàire air na

daoinaibh gllice; agus roghnuich Dia nithe anmhunn an t' saoghail, chum gun cuireadh e gu nàire na nithe cumhachdach ionnus nach deanadh feoil sam bith uail na f'hiannuis." —1 Cor. i. 27, 29.

Ach chum pilleadh ri Iain Morastan. Bha easan nis gach la sa chuing, a giulan uallach agus teas an là. Agus le beannaichd an Tighearna air a shaothair, thainig na H-earradh ann an tomhas mor gu eolas an t' Soisgeil. Thainig an sluagh an coimeas ri cuid do na h-Eilcanan cile ma 'n cuairt gu 's bhi mar fhearann Ghosen. Chaidh iomradh agus cliu a Ghobha 'nis am fad 's am farsuinn. Bha a chleir làn eagail roimhe; agus bha aobhar aca, oir cha b' fhearr iad na leanaban ri aghaidh. Dh'fhag an sluagh na truaghain Mhinisteirean bha aca mar dhinnis mi cheanna agus lean iad easan, agus cha robh Ministear an Alba bu shaothrachaille am measg sluaigh no bha an Gobha na measg san. 'Siomadh là fann agus sgith, bronach agus dubhach bha aige airson aobhar Chriosda nam measg, 'g amharc mach airson, agus a feitheamh, ri sàorsa agus fuasgladh na h-Eaglais: agus pobull an Tighearna uile san tìr "a deanamh bith-urnuigh ri Dia" gu'n cuireadh e Teachdaire soisgeulach da 'n ionnsuidh leis am biodh iad air am beathachadh. Ach bha gach Ministear ùr bha teachd nam measg, taisbeanadh nach robh ann ach coigreach agus fear tuarasdail. Agus do bhrìgh gu 'm bu choigrich do Chriosda iad, cha b' urrainn iad ionaltradh thoirt do na caoraich, agus cha 'n eisdeadh na caoraich riu; ach sann bha iad teicheadh uapa. Agus chluinn sinn an Ghobha gearain air an doigh so:

"Tha sinn fann le stri
Sgith 's a gabhail fadachd,
Gus am faigh sinn sìth
Le libhrigeadh farsuing."

Gidheadh bha Iain Moristan togail suas a shuilean chum nam beann o'n tigeadh a chabhair. Agus bha e mur an céudna cumail suas misneach agus cridhe pobuill an Tighearna san tìr, ann bhi cur an ceill doibh mur labhair Ioseph ri bhràithribh,

gu 'n amhairceadh Dia gu cinnteach orra agus gu 'n fiosraicheadh e iad: "Agus cha do chuir e an amharus gealladh Dhè le mi-chreidimh; ach bha e làidir an creidimh, a toirt gloire do Dhia."—Rom. iv. 20. Agus mar thubhairt Pol mu Mhaois "bha e laidir na inntinn, mar neach a bha faicinn an tì a ta neo-fhaicsinneach."—Eabh xi. 27. Agus air dha bhì mur so "a tuigsinn comharan na h-aimsir;" cosmhuil ri Eliah a thubhairt ri Ahab mu 'n d' thàinig an t-uisge idir: "Eirich suas, ith agus ol; oir tha fuaim pailteas uisge ann;" bha e nochdadh da luchd dùthcha gu 'n robh àm saorsa agus fuasglaidh na h-eaglais dlùth do laimh, agus gu 'n robh "fuaim siubhail ann am mullach chraobh na smeur;" agus iadsan bhi gluasad, agus gu 'n rachadh an Tighearna mach rompa agus gu 'm buail-eadh e feachd na "gaduichean agus an luch reubainn" leis an robh iad air an sarachadh. Agus labhair e air an doigh so:

"Se nis an tim dhuibh bhi saothreach
 Gun fhois 's gun sgios ach nar duisg,
 Mar bha Daniel dilis
 Bu tric na shineadh san smur,
 A leugh san fhàidh Irimia
 Fior àm an libhrig bhi dlù,
 Tre 'n d' fhuair e taisbeanadh cinnteach
 Air aobhar aoibhnis o thurs.
 Eaglais shaor a chaomh chàirdean
 'S gearr na laithibh gu lèir
 Gus an cluinn sibh càoidh Labain
 Sibh air fhagail gun treùd,
 'S o na faicinn an là sin
 Baoibhinn gaire o 'm bhèul,
 Bhi ga chluinntinn le àrd-ghuth
 Ri gal sa ranaich na 'n dèe.
 Ged robh casaid a nàmhaid
 Ribh aig ràdh le bèum
 Gun do chreach sibh tigh Labain
 Dheth chuid àilleagan brèig."

Sheall e dhoibh mar an ceudna anns na briathran a leanas mur rachadh an saorsa oibreachadh a mach, agus mur rachadh na naimhdean a sgapadh ; agus mar ghabhadh Crìosda pàirt na h-Eaglais mar fhear-posda seasamh airson a chèile :

“ 'S gheibh a chèile a còir bhreith
 A dheoin no a dh' aindeoin.
 Bheir an Rìgh a torachd
 A mach le 'lannaibh,
 Leis gach ait' a lionadh
 Le corpaibh luchd-an-riaghlaidh,
 A sharuich i gu h-ìosal
 'S bha dian gu casgairt
 Eisdidh e rà h-athchuing,
 'S theid a saors thoirt seachad ;
 Ged bhiodh fuil an-diadhach
 Cho àrd ri srian na 'n eachaibh.
 'S théid a chlèir a sgapadh
 'S druidear beul na 'm madadh,
 'S cha bhi aon ag eisdeachd
 Luchd reubainn no luchd gadachd.
 Cha bhi luchd na 'n stipin
 'S na 'n glìbean farsuing,
 Ghoid steach o 's ìosal
 Airson am beartas ;
 Ri teùmadh nam firean
 'Sa claidh na muinntir dhìleas,
 A shecas taobh na firinn
 Gu dìon mar ghaisgich.”

Ach chaidh glaoth agus òsnaich pobull an Tighearna an Alba, agus gu h-aràidh anns a ghaeltachd suas gu Dia airson na daorsa anns an robh iad. Agus chunnaic an Tighearna gu ciunteach amhghar a shluaigh, agus chuala e 'n glaoth ; oir baithne dha an doilgheas. Dh' fhurtaich agus dh' fhuasgail an Tighearna air oighreachd, agus i sgith : agus dheasaich e na mhaithreas do na daoineibh bochda. Thainig là an dear-

bhaidh mu dheireadh; oir bu là dearbhaidh e cho maith ri là saorsa; agus bha moran an Alba dh' fheudadh a ràdh mar thubhairt an t-àrd-cheannard ri Pol: "Is mor an t-suim air an do cheannaich mise an t-saorsa so." Tha mi ciallachadh là briseadh a mach, no là dealachaidh na h-Eaglais. Nuair a threig Ministerean na h-Eaglais Saoire am beathachadh airson crun Chriosda agus saorsa na h-Eaglais. Bha iomadh do phobull an Tighearna an Alba san am ud cosmhuil ri Simeon agus Anna, da 'n do dh-fhoillsich an Spiorad Naomh nach faicadh iad bas gu 's am faicadh iad saorsa na h-Eaglais air oibreachadh a mach. Agus nuair chaidh innse dhoibh gun do thilg Teachdairean Chriosda cuing na staid dhiubh mar thilg Daibhidh luireach Shaul dheth, agus cosmhuil ris an gu 'n do ghabh iad am bata na 'n laimh, bha iad cosmhuil ri Iacob, nuair chaidh innse dha gu 'n robh Ioseph fathast beo, agus a chunnaic e na carbadan chuir e ga ghiùlan, dhath-bheothaich an spiorad. Bha cuid nach do chreid an sgeul an tùs, troimh aoibhneas, oir bha iad lan iongantais, cosmhuil ri Peadar nuair thug an t-aingeal mach as a phrìosan e, shaoil iad gu 'm bu taisbean chunnaic iad. Ach thainig iad so gus a ràdh maille ris an Eaglais o shean:

"'N 'tra thug Iehobhah air a h-ais
 Bruid Shìoin, b' ionnan sinn
 Is daoine chunnaic aisling mhòr
 'Sa mhosgail as an suain.
 Lìonadh ar beul le g'ìre an sin,
 'Sar teangadh fos le ceòl
 Am measg nan cinneach thubhairt iad,
 Rinn Dia dhoibh bearta mcr."

Cha mhòr bha an Alba bu mhò rinn ghairdeachas ris an là so na Iain Morastan, agus cha mhòr bha innte bu mhò dh' fhuiling a rèir a chranachur airson na h-Eaglais-saoire, agus bu mhò rinn a rèir inbhe chum a neartachadh, no easan. Chaidh e mu 'n cuairt troimh na h-Eileanan an iar aig an àm ud chum an soilleireachadh agus an dleasdanas a chur fa 'n comhair

thaobh na h-Eaglais. Agus gu 'n teagamh bha e 'g innse na firinn gu 'n bhrosgal ri Ministear no ri uachdaran. Ach nuair phill e dhachaidh da thigh fein fhuair e dorus a thigh-oibre air a ghlasadh air. Dhruid am Bìillidh dorus na ceardaich air, agus cha 'n fhaigheadh e lamh chur air ord na air innean. Ach rinn an Eaglais Shaor Ceisteir dheth, agus thog e tigh air an taobh 'n Ear do na H-carradh, agus be sin an tigh 's an do bhasaich e. 'S iomadh duine bochd chaill a thigh agus fhearann 's an àm ud sna h-Eileanan an iar, agus gu h-araidh an Uist, airson na h-Eaglais Shaoir. Neach bheireadh a thigh do na Ministeirean chum searmonachaidh ann, rachadh chur as an dùthach, agus bha aig an t-sluagh a shamhradh agus do gheamhradh ri cruinneachadh chum sierbhis an Tighearna air na cnoic agus air na slèibhtean. Tha e furasda an diugh fuaime agus boilich dheanamh mu Eaglais Shaoir thaobh agus nach caill daoine ni ris, ach cha robh e cho furasda an là ud. Thaobh staid na h-Eaglais steidhichte labhair Iain Morastan ris an t' siuagh air a mhodh so :

“ Cha bheag am bron san cradh anama
 Dhuibh san aimsir so fein,
 Staid bhur mathar on d' fhalbh sibh
 Gu crion air seargadh o freumb,
 Fo dhris na bagaidean searbha,
 'Sa geugan aimrid gu leir,
 'Sa faicinn aogais a meanbh-chruidh
 Fo dhearcan marbhteach dol eug.
 Tha droighneach 's feanntagach chiuirail
 A nis na luchairtibh mòr,
 'Si na fardaich ro dhuldaidh
 Do dhragoin lubach nan còs,
 Sna fàros taimhidh ro mhuchaidh
 Do chomhachaig dhur a sgread phro,
 'S do bheathaichibh allta ro bhruideil
 'S do sbionnaich chuilbheirtich sheolt.”

Bhliadhna mu 's do bhasaich an t-Ughdair chaidh e air

chuairet do 'n taobh deas chruinneachadh airgid chum crìoch chur air an Eaglais bha iad togail 's na H-earradh. Be so feudaidh mi ràdh an t' seirbhis mu dheireadh rinn e do mhuinntir na H-earradh. Be so bhliadhna mu dhèireadh bha mi san Oil-thigh an Duneidean, agus bha Iain Morastan sea seachduinean maille rium nuair bha e cruinneachadh airson na h-Eaglais, agus siomadh naigheachd bhiodh aige san fheasgar air na thachair ris troimh 'n là. Be so mar an ceudna sealladh mu dheireadh chuunaic mi dhe 'n duine urramach agus ainmeil so. Bhasaich e bhliadhna as deigh so—1852; agus thubhairt na h-uile da 'm baithne e: “Nach 'eil fhios agaibh gu 'n do thuit Uachdaran agus duine mor an diugh ann an Israel.” “Agus chuala mi guth o neàmh ag ràdh, Sgrìobh. Is beannaichte na mairbh a gheibh bàs 's an Tighearna, à so a mach: Seadh, a ta an Spiorad ag radh, chum gu faigh iad fois o'n saothair; agus leanaidh an oibre iad.”—Tais xiv. 13.

Bu mhiann leam na 'n ceadaicheadh rùm dhomh e beagan fhacail a ràdh mun Ughdair, mar dhuine, mar chriosdaidh, mar fhear-teagaisg, agus mar Bhàrd.

Mar dhuine, cha robh easbhuidh air Iain Morastan, aon chuid am buill a chuirp na am buadhan inntinn. Bha e thaobh a thalanna gu nàdurra a measg an t-sluaigh mar bha Saul an Israel, “O' ghuaillibh agus o sin suas b' àirde e na 'n sluagh uile.” Bha e mar an ceudna na dhuine truacanta agus aoidheil, agus cha b' aithne da nadar spiocaiche sam bith. B' aoidheil, fosgailte agus fialaidh do na coigrich e; agus bu lionmhor iad dhiubh chuir seachad oidhche maille ris. Bha coigreach aig àm araidh dol man cuairt 's na H-earradh, agus chaidh e steach do thigh an Stranta, agus dh' fheoruich e don teaghlach an cumadh iad e rè na h-oidhche. Fhreagair bean an tighe e gur h-ann aig a ghobha b-abhaist do na coigrich bhi fuireach, agus gum b' fhearr dhasan dol ann. Chaidh an coigreach do thigh a ghobha agus dhinnis e dha mar a labhair a bhean, agus rinn e gaire nach bu bheag ris. Agus mar chriosduidh bha briathran an Dr. Dhomnullaich da athair urramach freagarach dha:

“B' e 'n criosduidh suilbhir, faoilteach e ;
 Biodh saorsa stigh, no cruas
 Tra bhitheadh 'm fiannis dhaoine e
 Cha 'n fhaict' air eudan gruaim.”

Mhar fhear-teagaisg na mar Shearmonaiche bha e measg na fir-cheasnachaidh mar bha an Dr. Domhmullach measg na Ministeirean. Cha do dheisd mi h-aon riamh dhiubh bha cho tomadach, cho tabhachdach, agus cho domhain ris ann an rùn diomhair an t'Soisgeil. Bha e na sgriobhaiche foghlumte chum rioghachd nèimh, a toirt mach as 'ionmhas nithe nuadh agus sean. Ach bha irioslachd agus a sheirc cho mor ri thalanna, agus cha b' ann cur sios chàich agus ga thogail fein bhiodh e :

“ Ach b' e a mhiann bhi carthannach
 An tabhairt brèith air càch,
 S bhi fagail dha-s' d' am buineadh e,
 Bhi deanamh sgaraidh slàn.
 Cha bu toil leis riamh bhi fasganadh,
 Le gaoith bhiodh bras, is dian :
 'S le srannaibh àrd, 's a h-osagan,
 A chasadh 'n cruithneachd sios.
 Bu mho, gu mòr, bu shàbhailt' leis,
 Bhi fàgail muill 's an t-sìol ;
 Na 'n sìol—gu n' rachadh grainnean dheth,
 Le moll, gu bràth a sios.”

'S iomadh Ministear chaidh air chuairt 's na H-earradh air an robh e na ro-chùram searmonachadh an lathair Iain Mhorastan ach 's beag ruigeadh iadsan a leas sin, cha robh duine eile san tìr bu sheirceile chuireadh folach air easbhuidhean luchd labhairt an fhocail na easan. Bha urram mhor aige do dheadh-riaghailt, agus do dh-òrduighean follaiseach an t' Soisgeil, mar tha aig na h-uile Criosdaidh fallain agus breithneachail. Tha cuid do dhaoine troicheil, gogaideach, agus fein-speiseil gle thrìc measg na 'n Gaedhal feuchainn ri cliù dhaoine eudmhor, soilleir, fhaotainn le bhi deanamh roinnean, agus a sgapadh choimhthionalan, agus le bhi diomaladh Mhinisteirean. Tha iad so feuchainn ri uisge thoirt gu 'n Muileann fein le bhi suidhe ann am breitheanas air muinntir eile, a bheil na nach 'eil gras aca. Cha' n' eil e idir na cheist

orra bheil gras aca fein, ach tha e na cheist throm orra bheil gras aig sluagh eile. Tha iad àrd-ghuthach, agus ceann-laidir: agus cha 'n fhan a cosan 'na tigh fein.—Gnath. vii. 11. Ach chà 'n' eil fhios aig a Mhuinntir so ciod a' ghne spioraid d' am bheil iad. Cha 'tug agus cha' toir iad ionaltradh, togail na àrach do dh-Eaglais Chrìosda. Ach cha bhuinneadh Iain Morastan dhoibh sud, 's an theireadh e ma 'n timchioll: “Nan diomhaireachd na tigeadh m' anamasa, ra 'n coimhthional na bitheadh m' onoirsa air a h-aonadh.”—Gen. xlix. 6. Mar Bhàrd diadhaidh se mo bheachd an aon fhocal nach d' éirich neach a 's mo na Iain Morastan sa Chinneach Ghaelach. Cumaidh an leughadair na chuimhne mar an ceudna, nach d' fhuair Iain Morastan foghlum sam bith ach am beagan thog e fein. Agus gun teagamh cha bhiodh easan fada togail foghlum. Leughadh agus sgriobhadh e beurla agus Gaelic gu maith mu dheireadh.

Rinn Ughdair an leabhair sq mòran do Dhànaibh èile bharr orra so, ach thug an Dr. MacKay leis iad gu Australia; oir bha mòr mheas aig an duine urramach sin, bha na charaide mòr do na Gàidheil, air Iain Morastan. 'Nis 'se tha agam ri innse do Ghàidheil Chanada ma bheir iad an gnuis do 'n leabhar so, gu 'n cuir mise air ball gu Dr. MacKay agus gum faigh mi chuid eile do sgriobhaidhean Iain Mhorastan 'o Australia, agus gu 'm faigh mi air a chlà-bhualadh e gu h-aithghearr. Bha agam ri mi fein cheangal an suim mhor airgid airson an obair so fein a chlà-bhualadh, ach tha mi an dochas nach bi cill agam dheth. Ma bhitheas còrr airgid ann air na phàigheas an costus gheibh bantrach Iain Mhorastan e, agus a teaghlach. 'Na 'm bitheadh an leabhar so na mheadhoin air aon da mhic fhoghlum agus thogail chum na Ministreileachd chuireadh e aoibhneas orm; oir tha cuid da theaghlach an laithean an oige fhathast.

Cha'n'eil eolas aig a chlà-bhualadair air a Ghaelic, agus bha mise fada uaithe, agus mar sin fèumaidh an leughadair ar leisgeul a ghabhail thaobh mearachdan a chlà-bhualaidh.

East Puslinch, December 20th, 1861.

AN CLÀR-INNSIDH.

1. MARBH-RANN DO 'N DR. DHOMHNULLACH.
2. MARBH-RANN DO DHOMHNULL MUNRO.
3. AM MELLENIUM.
4. GLEACHD AN T-SEANN DUINE AGUS AN
DUIN' OIG.
5. CÙRAM DHÈ DA PHOBULL.

MABHRANN

AIR

DR. DÒMHNULLACH

NA TÒISIDHEACHD.

AN ROIMH-RADH.

CHA 'n ann idir air iarrtus Ughdair a' Mharbhrainn so, a tha
je a nis air a chur an clòdh ; ach air iarrtus chàirdean, a chuir
mpidh air, gu 'n ceadaicheadh an t-Ughdair dhoibh so a
dheanamh. 'S ann tha an t-Ughdair féin a' faicinn mar gu
m biodh am Marbhrann neo-airidh. 'S i ar barail, gidheadh,
nach i so a' bhreth a bheirear air, leo-san a chuir eòlas air
Dr. Dòmhnallach, agus aig am faighear breithneachadh mu
a theagasg, mu a chaithe-beatha, 's mu a shaothairibh gun
sgìos ann an seirbhis an Tighearna. Cha 'n fhiosrach leinn,
riamh o làithibh an Ath-leasachaidh, gu 'n d' thugadh do 'n
Eaglais 'n ar tìr, tìodhlacan agus gràs co-ionann riusan a
thugadh ann am pearsa an duine bheannaichte sin, gu h-àraid
as leth Gàidhealtachd agus Eileana na h-Alba. Agus
mheasadh fìor chàirdean na h-Eaglais agus an aobhair, gu
'm b' uireasbhuidh e, agus gu 'm bu chall e do 'n aobhar,
mur cuirteadh ni-eigin air chuimhne 's an dòigh so leis a'
ghinealaich a tha a làthair, mu dhuine, mu 'r aidich na
h-uile, gu 'm bu "lòchran lasarach agus dealrach e," anns

an robh co iomadh “toileach car tamuill gàirdeachas a dheanamh 'n a sholus.” Tha sinn an dòchas gur h-iomadh iad, nach ann “car tamuill” a mhàin, a gheibhear an gàirdeachas sin aca. Agus ged nach e ar n-iarrtus dol a mholadh a' Mharbhrainn roimh làimh dhoibh-san a leughas e,—agus sinn fiosrach mar a rachadh sin an aghaidh iarrtuis an Ughdair; oir bhiodh e 'n a mholadh air a thiodhlacaibh féin, ni air nach 'eil e idir an geall; gidheadh tha sinn an dòchas gun teagamh,—iadsan a fhuair blas air teagasgaibh Dhr. Dhomhnallaich, agus d' an deachaidh iad sin a bheannachadh,—gu 'm bi ùrachadh d' an cuimhne agus d' an cridhe, ann an iomradh a theagasgan, 's a phearsa, 's a ghiùlain, a gheibhear 's a' Mharbhrann so, air an cuimseachadh, 's air an aithris, air dhoigh a tha a réir na firinn mar iomradh air an duine, agus a tha a réir an t-soisgeil mar theisteach agus mar theagasg.

Bha eòlos aig an Ughdair air Dr. Domhnullach urramach fad iomadh bliadhna. Bhlaiss agus fhuair e éifeachd 'n a theagasg; agus iomadh uair misneachd agus comhfhurtachd 'n a chomhluidar. Stiùir an Tighearn a sheirbhiseach gu h-iomadh cèarn agus àite, far an do rioghaich dorchadas a rìreadh a measg sluaigh, gus an d' òrduich an Tighearn, 'n a àrd-uachdaranachd agus 'n a ghràdh, an Teachdair urramach ud a ghairm 's a dh' ulluich e féin, a chur 'n an rathad, agus soirbheachadh a thoirt d' a shaothairibh gràidh 'n am measg.

Is duilchinn le h-iomadh, nach 'eil iomradh sgriobhta air Dr. Domhnullach, ni 's farsuinge na 's urrainn bhi ann am Marbhrann 's am bith, air a chur a mach fathast. Tha sinn an dòchas gu 'm bi. Ach, fhad agus nach 'eil, tha sinn an

dóchas gu 'm faigh an oidhirp so air cuimhneachan gràidh dha chur suas, deadh-bheatha o chàirdibh na fìrinn ann ar measg ; agus gu 'n aidichear a beannachadh do anamaibh.

Ann an clòdh-bhualadh a' Mharbhrainn, chur sinn ann an cumadh e, gu 'm feudar a cheangal suas 's an aon Leabhar maille ri Marbhrannaibh Dhr. Dhómhnullaich, a sgriobh e féin 's a chuireadh a mach leis.

Feudaiddh gu 'n ruig am Marbhrann so air iomadh nach do chuir eòlas 's am bith air an Ughdair ; agus a chrannchur aige ann an cèarna a tha iomallach. Agus ged nach 'eil feum aige air ar teisteanas-ne 'n am measgsan a chuir eòlas air, tha sinn 'g a ghabhail oirnn féin an teisteanas a thoirt air, a thugadh roimhe air cuid eile, Eabhr. x. 33, 34. 'S i ar barail nach ann mall a bhiodh Dr. Dòmhnallach féin 's an teisteanas ceudna a thoirt dha. Tha fios againn gu 'm bheil stòras eile nach beag aig an Ughdair do Dhànaibh Spioradail, a dh' fheudadh fo bheannachadh gràis bhi tarbhach a chum comh-fhurtachd agus oilein do theaghlach a' chreidimh 'n ar measg, na 'n cuirteadh an clòdh iad.

A nis, gu 'n deònaicheadh an Tighearn an oidhirp so a bheannachadh, le iomradh tiodhlacan a ghràis a bhuilich e air a sheirbhiseach, a dheanamh 'n a mheadhon a chum ùr-nuighean a phobuill féin a bheothachadh ; a' guidheadh gu 'n deònaicheadh esan amharc oirnn, agus seirbhisich dha féin a thogail suas, a bhiodh mar bha Dr. Dòmhnallach, air an aideachadh leis ; agus gu 'm faigheadh an oighreachd furtachd agus i sgith, fann, agus air a cuibhreachadh.

M. M.

M A R B H R A N N .

E A R R A N N I.

I.

Do réir briathran a' Bhìobaill,
Bidh deadh chuimhn' air an fhìrean a ghnàth,
'S le dearmad cha 'n fhaodar,
Gu n' searg an cliù naomha gu làr ;
'S do réir sin mu 'n aon so,
Bhios air ainmeachadh leamsa 'n am dhàn,
'S fad bhios 'iomradh gun di-chuimhn'
Feadh gach aimsir, aig iochd'rainibh gràis.

II.

An t-urramach iùlmhor
Bhi 'n a shìneadh 's an ùir, 's e fo 'n bhòrd,
An t-Ollamh Dòmhnallach cliùiteach,
A bha dìleas mar stiùbhard gun ghò ;
Air an t-saoibhreas gun chaomhnadh,
A chuir Dia leat a dh'ionnsuidh nan slògh,
'S iomadh ceud tha fo thùirse,
O 'n là thriall thu, 's a dhùin ort am fòd.

III.

'S trom an osnadh 'g ad ionndrain,
 'S frasach, silteach an sùilean le deòir ;
 A' caoidh 's ag acain gu drùidhteach,
 As do dhéigh, fo mhòr chùram 's fo leòin ;
 'S goimh 'n an àirnibh 'g an ciùrradh,
 O 'n là dh' fhalbh thu gun, dùil riut ni 's mò ;
 Gus an séidear an trompaid,
 Bheir na mairbh as an ùir, gu teachd beò.

IV.

'S iad ag iondrainu na chual iad
 Fo do theagasgaibh buadhach bha beò,
 'Shaor an anama o chruaidh-chas,
 Iomadh uair bha 'g an t-uairgneadh gu mòr ;
 Bha do sgeul mu 'n àrd-Bhuachaill,
 Dhoibh mar ghaoith a bha fuadach nan neoil,
 'S grian na fìreantachd uasail,
 Toirt dhoibh aoibhneis le luathghair 's binn cheòl.

V.

'S iomadh aon bha 'n cruaidh chàs dheth,
 Aig an leòmhan, g' am fàsgadh mar uain,
 Rinn thu 'shaoradh o 'mhàgaibh,
 'S an creuchdan gu slàn dheanamh suas ;
 'S o mhath-ghamhnaibh 'g an tèarnadh
 O 'n reubadh le dàmhair gun truas ;
 'S an ioghnadh 'n dream sin an trà so,
 Bhi 'gad chaoidh ; rin thu 'm fàgail, 's iad truagh ?

VI.

Thuilleadh Sgìre na Tòiseachd,
 'S iomadh sgìr' tha fo bhròn 'g ad a chaoidh,
 O do bheul leis 'm bu chòisir,
 A bhi 'g éisdeachd do sgeòil a bha binn ;
 Air gràsaibh Iehobhah,
 Do anamaibh bha leòint' agus tinn,
 Toirt geall-daingnich air trècair,
 Dhoibh an seilbh ann an dòchas le cinnt'.

VII.

'S mòr am briseadh 's a bhèarna
 Ann ar n-Eaglais, le bàs do thoirt uainn,
 Bu taic thu 'n ad là dhuinn,
 Ann an iomadaidh càs nach gabh luaidh ;
 'S anns an ni so gu h-àraid,
 Mar aodhair 's oid'-àraich an t-sluaigh,
 A bha ocrach is pàiteach,
 Do 'n do fhritheil thu màna o shuas.

VIII.

'S mòr an iarguin 's gach cèarna,
 N' cualas riamh gu beò-bhlàth uait àrd-ghlaodh
 Gu'n na trompaid o n' àirde,
 Chuir crith-ghluasad air cnàmhaibh bha sgaoilt',
 Tioram, cruaidh, 's a' ghleann fhàsaicht',
 'S le anail na fàisneachd gu saor,—
 Thug thu beò dhiubh mòr àireamh,
 Tha 'n an deòraidh an dràsda 'g ad chaoidh.

IX.

Bha thu d' chobhar gu fuasgladh,
 Air anamaibh bha buairte, 'g an claidh ;
 'S luchd-mortaidh mu 'n cuairt doibh,
 'G an reubadh 'n an truaghain gun chli ;
 'S iomadh éire 's mòr uallach,
 Bha trom air an guaillibh 's iad sgèith,
 O 'n do shaor thu le buaidh iad,
 Chum an aoibhneis, le suaimhneas is sìth.

X.

Dh' fhàg sud goimh dhoibh 'n an àirnibh,
 'S iad gun fhios co ni 'n t-àite dhoibh suas,
 Chum an ionaltraidh làitheil,
 Ann an innis nan gràs 's nan deadh chluan,
 Far a minic 'n do thàrladh,
 Gu 'n robh 'n anam annt' sàsaicht, 's le uail,
 A' deanamh aoibhneis 's an t-slàinte,
 Dh'oibrich Criosd dhoibh 'n a ghràdh tha bithbhuan.

XI.

Tha do threud air am fàgail,
 As do dhéigh mar am fàsach lom, fuar ;
 'S gun a' ghrian orr' a' dèarsadh,
 Ach fo neul, 's gun fhiòs c' àit iad an gluais ;
 'S dh' fheumas fantuinn rè làithibh,
 A' sealltuinn ri Ard-rìgh nan sluagh
 Gus an deònaich a ghràs dhoibh,
 Neach 'n ad àite ni bheàrna dhoibh suas.

XI

Ach an ti rinn a' bheàrna,
 Tha 'n a chomas a càradh gu luath ;
 Is ma dheònaich a ghràs e,
 Gu 'n cuir t' fhalluinn an lànachd a buadh,
 Air an fhear thig 'n ad àite,
 Gu bhi biathadh an àlaich 's a' chluain,
 Anns an d'fhuair iad deadh àrach,
 Fhad 's a mheal iad thu 'n làithibh do chuairt.'

XIII.

Tha ar peacaidhean làthail n',
 An aghaidh naomh àitheanta Dhia,
 A' tarruing gach plàigh' oirn, n,
 Gach smachd is geur àmhghair is pian ;
 O, gu 'n tìodhlaic e 'ghràs oirn, n,
 Chum ar n-ùmlach' 'n a làthair le fiamh ;
 Deanamh bròin fo fhéin-àicheadh,
 Chum d' a fhìreantachd àrdaicht' bhi strìochdt'.

XIV.

'S gu 'n luathaich e 'n là sin,
 'S am^hbi challaid gu slàn dhuinn mu 'n cuairt
 Leis gach briseadh a chàradh,
 Ann an dìongmholtachd làidir nach gluais
 Is nach tuit le feachd nàmmhaid,
 Ged a dh' iarradh iad fàth air tre fhuath ;
 Ach gu 'm faigh an treud sàmhchar,
 Fo na beannachdaibh gràsmhor 's mòr luach.

XV.

Thaobh do theisteis thugg barr,
 Air cuid mhòr ann ar là-ne 's 'n ar ré,
 Làn do bhuadhaibh 's do ghràsaibh ;
 'S beag mo chomas gu 'n àireamh gu léir ;
 Ged nach feudar leam àicheadh,
 Nach bu mhianu leam dheth pàirt chur an céill,
 Ach mo bhriathran ro-fhàill 'neach,
 Gu 'làn-ionradh gu àirde mo sgéil.

EARRAN II.

XVI.

Bha do chorp gu treun làidir,
 Anns gach ball dheth làn tàbhachd is luth 's,
 Dìreach, iomchuidh 's gach pàirt dheth,
 Chum na crìche an d' àraicheadh thu,
 'S bha do bhuadhanna nàduir
 Farsuing, fosgailt' a ghnàth anns gach cùis ;
 A bha feumail 'n ad là dhuit,
 Gu toirt eòlais do chàch mar cheann-iùil.

XVII.

Cha robh smal ort thaobh cumaidh,
 No 'n ud sgèimh o do mhullach gu d' shàil ;
 Gu deas, calma, mar churaidh,
 Lan do niheanmnadh, 's ro-urrant' gun sgàth ;
 Beothail, anamant' gu h-uile,
 Gu neo-chearbach ;—or b' urrainn mi 'ràdh.—
 Gu 'm b' ni ana-minic t' uiread,
 No d' cho-dhealbh ort a b' urrainn toirt bàrr.

XVIII.

Bha do phearsa 's do ghluasad,
 Co tlachdmhor, neo-thuaingneach, is tlàth,
 Chor 's gur tearc iad thug fuath dhuit,
 Ged bu lìonmhor bha fuaidht' riut an gràdh ;
 Aig na h-ìslibh 's na h-uaislibh,
 Bha spéis dhuit, ged b' uaibhreach dhiubh pàirt,
 Ni dh' fhàg t' iomradh 'g a luaidh ac',
 Mar sgeul bròin o 'n là chual iad do bhàs.

XIX.

Aghaidh leòmhain bha t' eudan,
 'N uair a dh' éireadh luchd-eucoir ort ceàrr ;
 S' aghaidh duine thaobh reusoin,
 Fearail, tuigseach, làn céill' agus bàigh' ;
 'S aghaidh laoigh a thaobh sèimheachd,
 Ann an simplidheachd, 's tréibhdhireas gràis ;
 'S aghaidh iolair thaobh nèamhachd,
 'S t' eòlas dìomhair air stéidhibh na slàint'.

XX.

Bha do shubhailcean lìonmhor,
 Ann an gliocas, an ciall, 's an deadh ghleus ;
 Agus aignidhean rianail,
 'S glan intinn bha sìochainteach, réidh,
 Air an cleachdamh gach ial leat,
 Anns na nithibh bha ciatach annt' féin,
 Timchioll reachdan na Diadhachd,
 Ris 'n do chum thu do bhriathran 's do cheum.

XXI.

'S e taitneas 's deadh-mhùinteachd,
 Bha d' chleachdamh gach taobh air 'n do ghluais ;
 Bha do chonaltradh iùlmhor,
 Le cathrannas ùrail gach uair ;
 Do gach smachd a' toir' ùmhlachd,
 'N uair a làmh Rìgh nan dùl ort a bhuaill,
 'S fo gach fulangas giùlaint'
 Ann am macantas 's ciùineachd an uain.

XXII.

A thaobh t' oilein 'n ad òige,
 Rinn thu thogail an Oil-thigh nan gall,
 Cha do rinn thu riamh bòsd as,
 Mar na féinealaich phròiseil tha fealls' ;
 Rinn thu feum dheth gu foghlum,
 Mu na nithibh bu ghlòrmhoire *stamp* :—
 Feum nam peacach air tròcair,
 'S na rinn Dia gu 'n toirt beò, o bhi caillt'.

XXIII.

Bha do ghlibhtean 's do thàlant'
 Chuir an Spiorad o 'n àird' ort a nuas,
 Le ath-nuadachadh gràsmhor,
 A rinn feumail 'n ad là thu do 'n t-sluagh ;
 Le do chòrdadh tre 'n ghràch sin,
 Leis 'n do lìonadh gu blàth thu làn truais,
 Ris na h-anamaibh neo-bhàsmhor,
 Fo do theagasg o 'n bhàs fhuair làn bhuaidh.

XXIV.

Bha ionnlad air t' aodann,
 'S t' aghaidh ungta le faoilte gna ghluaim ;
 Lìon spiorad a' ghaoil thu,
 'N ad inntinn le caomhalachd truais ;
 'S bu shoilleir 'n ad aogas,
 'N gràdh thug thu do mhaoth cridh' fo bhuaidh ;
 'S mòr do ghàir an Fhir-shaoraidh,
 A dhealraich an aobhachd do shnuaidh.

XXV.

Bha thu truacanta, cuimhneach,
 Airbantraichibh 's dilleachdaibh fann,
 'S air fialaidheachd d' inntinn,
 Aig bochdaibh bha cinnt' air gach àm ;
 Do na coigrich toirt aoidheachd,
 'S air a' mhuinntir bha tinn le do làimh,
 Bhiodh tu fèirinn, 's toirt libhrig',
 Do na mhuinntir bha 'm prìosan gu teann.

XXVI.

Lagh a' chaoimhneis bha d' bhilibh,
 'S do briathran a' sileadh mar dhrùchd,
 Air an fhonn a bha tioram,
 O sheargadh toirt cinneis as-ùr ;
 'S do chainnt bha ro-mhilis,
 Do anamaibh 'n an innibh ro-chiùrrt',
 'S fear an gràidh ac' 'g a shireadh,
 A' caoidh a làthaireachd, timeach, 's fo thùirs'.

XXVII.

Ri anamaibh nan deòradh,
 Bha thu iochdmhor, làn teò-chridheachd crì',
 'N uair bha 'n truailleachd 'g an leònadh,
 'S ag iarraidh gu beò os an cinn ;
 Bha thu d' bheannachd 'g an còmhnaidh,
 'S gu 'n aiseag gu sòlas a rìs,
 Trid na geallanaibh mòra,
 Air 'n d' thug grùs dhoibh làn chòir ann an Crìosd.

XXVIII.

Bha duinealas fuaidht' riut,
 Anns gach ceum do do ghluasad 's gach àm ;
 Bha géir' air do bhuadhaibh,
 Bha ullamh thoirt buaidh air luchd-feall ;
 Le faobhar gun tuaireap,
 'S nach feudadh luchd-fuath ort thigh'nn teann ;
 No na toibheumaich shuarach,
 Le anabas truailidh an teang'.

XXIX.

Bhiodh do naimhdean fo mhùiseig,
 Fo do smachd, oir bha t' ùghdarras treun ;
 'S mòr a chìteadh 'n ad ghnùis dheth,
 'S ann an sealladh do shùl a bha geur ;
 Dheanadh 'n coguis dhuit lùbadh,
 Ged bha 'm mèinn co droch-mhùinteath gu géill,
 'S rachadh 'n ana-cainnt do 'n chùl-tigh,
 Gun chead labhraidh no brùchdaidh tre 'm beul.

XXX.

Anns gach comunn bu ghairbhe.
 Gu 'n do tharruing do ghairm thu 'n ad ré ;
 Bu làn ghaisgeach fo t' airm thu,
 Gu cur casg air gach seirbhe fo stéill ;
 Bha t' fhocal co cuimseach,
 Gu 'm buailteadh gu bailbhe gach beul,
 Bheireadh ionnsuidh le coirbteachd,
 Gu do chiùrradh le 'n ana-gloir gun chéill.

XXXI.

Cha robh aon a dh' iarr fàth ort
 Le fanoid, le tàire, no bùirt,
 Do na h-aingidh le 'm b'ghràin
 Na ghabh e do dhànachd 'u a ghnùis,
 Tigh'nn a chonnsoid 'n ad làthair,
 Gu do ribeadh le fal-chainnt 's mì-rùn,
 Do nach d' rinn thu ball-àbhachd,
 A' teicheadh uaite le nàir is beul dùint'.

XXXII.

Cha bu leòmhan an leisg ort,
 Gu do chumail o dhleasdanas ceum ;
 Ealamh, èasguidh, gu teagasg,
 Do anamaibh a sheas ann a fheum ;
 Bha thu ghnàth gu ro-dheasaicht',
 Anns gach cùis mar a fhreagradh do d' dhreuchd,
 Chuireadh dhìot leat gach leth-trom,
 'S 'm peacadh iadht' bha cur geilt ort 's an réis.

XXXIII.

B' e anama a thèarnadh,
 An cùram ri t' àirnibh bha dlùth ;
 Aig gach àm 's an do thàir thu,
 Ghabh thu 'n cothrom 's gach àit ; oir b' e d' rùn
 Saor shoisgeul na slàinte
 Chur an célll ann an gràdh do gach dùil ;
 Ann an ùmhlachd do 'n àithn' sin,
 A thug Criosda tre ghràs do chinn-iùil.

XXXIV.

Bu laoch thu bha duineil,
 Mar leòmhan gun ghioraig gun fhiamh ;
 Nach géilleadh, 's nach pilleadh,
 Roimh naimhdibh bha fineachail, fiat' ;
 Bu dlomhain gach inneal,
 A dh' fheuch am fear-millidh riut riamh,
 Chur mu d' thimchioll gu d' spionnadh
 Dheanamh anfhann mar mhinisteir Chriosd.

XXXV.

'N uair dh'fheuch lagh na Stàide,
 Gu cuing ort a chàramh nach b' fhiach,
 Mar ghabh muinntir gun ghràs rith',
 Chaidh 'n an tràillibh ag àicheadh cuing Chrìosd ;
 'S ann rinn thusa le d' bhràithribh,
 Mar rinn Daibhidh, 's b' e dha-s' an deadh ghnìomh,
 Thilg an lùireach gu làr dheth,
 Bha 'n a cuibhreach dha, 'n àit bhi 'n a dìon.

EARRANN III.

XXXVI.

Do sholus bha fìor-ghlan,
 Mu aon bhith naomh Dhia na fìor hlòir',
 Mu a Phearsaibh, 's mu 'n riaghladh,
 Bu shoilleir o bhriathraibh do bheòil ;
 Do anamannaibh sìorruidh,
 A ghràdhaich e 'n Crìosda co mòr,
 Ghabh e 'n nàdur bha ìosal,
 Chum 'n an àit a thoirt dìolaidh 's an fheòil.

XXXVII.

Bha do thàlaintean fiachail,
 A chum gràs air deadh rian anns gach dòigh,
 Toirt bàrr air na ciadaibh,
 A shaothraich 's an fhion-lios 'n ad lò ;
 Deanamh soilleir gu 'n d' fheuchadh
 Do t' anam an dìomhaireachd mhòr,
 A dhaingnich do shìochaint,
 Le dian-bheachd is làn-chinnteachd air còir.

XXXVIII.

Dh' fhàg sud thu ro phrìseil,
 Mar theachdaire dìleas air gràdh,
 Is gràs an Fhir shaoraidh
 Do anamaibh nam mìltean do chàch ;
 'N ad theagasg o 'n Bhìoball,
 Le Spiorad na fìrinn o 'n àird',
 Do 'n aingidh toirt saorsa,
 Tre fhulangas Chrìosda 'n a bhàs.

XXXIX.

Bha do chomasan farsuing,
 A ghabhail glan-bheachd anns gach pàirt ;
 Air chomhpairt gach pearsa
 Do 'n diadhachd, o eachdraidh na slàint',
 A' saoradh nam peacach,
 O 'n dìteadh dh' fhàg glaist' iad an sàs ;
 An daors' fo bhinn ceartais,
 'S nach feud fuasgladh air ais iad ach gràs.

XL.

Air gliocas neo-chrìochnach,
 An Athar, tha dìomhair r' a luaidh,
 Cur a Mhic an staid ìosail,
 Air a ghineamhuinn o mhnaoi, ach neo-thruaillt' ;
 Leis an Spiorad ro-naomha,
 Ann an nàdur na daonachd a nuas,
 Fo 'n lagh bhrìst' air ar taobh-ne,
 Gus 'a mhallachd, 'n a ìobradh thoirt uainn.

XLI.

Gaol an Athar tha sìorruidh,
 Air a nochdadh 'n a mhìorbhuil ro mhòr,
 A' dealbh a Mhic air mhodh dhìomhair,
 Leis an Spiorad ro-fhìor-ghlan 's an òigh ;
 Thaobh a dhaonachd b' e 'sìol-s' e,
 Ach bha 'ghineamhuinn o Dhia na h-àrd ghèid' ;
 Gineil Dhaibhidh 's a fhreumh e,
 Dara pearsa na Diadhachd gun ghò.

XLII.

Ged bu dìomhair ar daoineibh,
 'S air na h-ainglibh ro-naomha tha shuas,
 'N dà nàdur bhi 'n aonachd,
 Ann am pearsa ro fhìreant' an Uain ;
 Eadar-dhealaicht gun chaochladh,
 Ann an diadhachd 's an daonachd bhith-bhuan,
 Bu shoilleir o 'n fhèrinn,
 Ann do theagasg 'g a innseadh do 'n t-sluagh.

XLIII.

Bu shoilleir o d' bheul e
 Gu 'm bu Dia e le fèi'hibh is feòil ;
 'S le anam bha reusont',
 Ag osnaich ann féin le mòr bhròn ;
 A bha ocrach is òtmhor,
 'S bha sàruicht' le sgìos is fo dheòir ;
 'S a dh' fhuiling bàs ;—'s e an ìobairt,
 Cuirp is anama,—gu sìth thoirt d' a shlògh.

XLIV.

'S tu dh' fhàgadh soilleir gur Dia e,
 Leis an sgriobtuif, 'n a mhìorbhuilibh mòr',
 Cur na fairge gu sìothchaint,
 'S gaoth dhoinnionnach dhian, 'g a cur stòld' ;
 'S ann an tilgeadh nan diabhull
 A mach le naomh-bhriathraibh a bheòil ;
 'S ann a aiseirigh sgianhaich,
 Air a' bhàs toirt buaidh shìorruidh le glòir.

XLV.

'S mu' obair thrì dhreuchdan,
 Bu shoilleir o bhriathraibh do bheòil ;
 Mar fhàidh, toirt sgeula
 Do an'maibh,—toil Dhé an toirt beò ;
 'S mar Shagart, toirt dìolaidh,
 Do cheartas, 'n a ìobairt 's an fheòil,
 Chum an réite 's an sìothchaint,
 Ri Dia, dheanamh sìorruidh fa dheòidh.

XLVI.

Mar Fhàidh 'g an saoradh,
 O 'n aineolas baoghalt is bàth,
 O 'n dorchadas millteach,
 'S o dhoill'-inntinn le firinn a ghràis,
 'S le 'Spiorad gu dìleas,
 A' nochdadh dhoibh innleachd na slàint' ;
 'S toirt eòlais le cinnt' doibh,
 Air peacadh, is mì-run an nàmh.

XLVII.

Rùn dlomhair an fhocail,
 Le 'Spiorad, 'g a fhosgladh dhoibh suas,
 An solus an t-soisgeil,
 Gu' n anamanna chosnadh le buaidh ;
 'S a' fosgladh na tuigse,
 Gu eòlas a ghliocais d' a shluagh,
 'S 'n a thròcair toirt fios doibh,
 Air teò-chridheachd iochdmhor a thruais.

XLVIII.

'S mar shagart g' an tèarnadh,
 O chiont is gath bhàis rinn an teum,
 'S o 'n fheirg a bha tàmh orr',
 'S 'g an aiseag gu fàbhar is réit' ;
 Tre 'fhìreantachd shlàinteil,
 A mheas doibh gu làn, air grunn stéidh'cht',
 Tre chreidimh 'n a ghràdh doibh,
 Nach dìobair gu bràth iad, 's nach tréig.

XLIX.

Ghabh am mallachd n' an àit air,
 'S a chorruich 'n a làn air a dhòirt ;
 'Fhuil-fhallas 's a' ghàradh,
 A' taomadh gu làn tre gach pòir ;
 'S b' e 'n t-ioghnadh mar thàrladh,
 Gu 'n caidleadh a chàirdean fo chlò,
 D' am buineadh an àmghair,
 Thaobh nàduir, na 'm fàgtadh iad foidhp'.

L.

'S geall-daingnich tha fìor i,
 Bha dhoibh-san air sìothchaint is slàint',
 Trid esan bhi 'm piantaibh
 A ghabh an gaol sìorruidh 'n an àit ;
 D' a bheannachdaibh tìodhlaict',
 Gu 'm b' iadsan am fìor luchd-comh-pàirt,
 Chum an treibhdhireas fìor-ghlan,
 An ùmhlachd do Dhia thoirt le gràdh.

LI.

Bu shoilleir 's bu chòmhnard,
 O theagasg do bheòil e bhi ghnàth,
 Air deas-laimh na mòrachd,
 A' tagradh an còrach gach là,
 'S an t-Athair ro-ghlòrmhor,
 Air caithir na trócair toirt dha,
 Nam beannachdan òirdheirc,
 Thoirt neirt agus treòir dhoibh gach là.

LII.

'S bu taitneach do chluinntinn,
 Mu 'oifig mar Rìgh anns gach pàirt,
 Toirt bruid ann am braighd'neas,
 Is diabhuil 'g an stampadh fo 'shàil,
 Ceangal shàtain fo 'n stamhnadh,
 'S 'g a spùineadh d' a ann-toil le spàirn ;
 Chreach dhligheach le ainnert,
 'G a fuasgladh, bh' air bhann aig', fo 'smàig.

LIII.

'S a' fuasgladh nan geamhlan
 Bhàrr chìomach bha teann aig an sàs,
 Fo dhaors', an staid chaillte,
 Fo ghlasaibh, 's fo chuibhreachaibh bàis ;
 'S toirt anaman bha aingidh,
 'S làn ceannaire', fo cheaunsachadh dha,
 'S gu strìochdadh, o 'n naimhdeas,
 Gu h-ùmhlachd gun fhoill, le fìor ghràdh.

LIV.

Bu leis féin an còir fuasglaidh ;
 Bha 'n anama ro-luachmhor 'n a làth'r ;
 'S an toil theid a bhuain leis,
 'N la a chumhachd gu buadhach le ghràs ;
 'S e togail na fuair dhealt,
 'S eigh-reodhaidh a' chruais dhiubh, le 'ghràdh ;
 Cur casg le trom bhualadh,
 Air naimhdibh thug fuath dhoibh, is dha.

LV.

'S 'g an éideadh fo 'n armaibh,
Mar shaighdearaibh calma, nach eil,
Fo 'n trusganaibh dearbhta,
Nach teirig 's nach searg dhiubh le aois,
'S e féin mar cheann armait,
Le 'bhrataich, an tearmunn nach claon,
'G an dìon 's gach cath gailbheach,
Ged lotar, nach marbhar dhiubh aon.

LVI.

E toirt costuis is lòn doibh,
Gu cogadh gu beó air a thaobh,
Lagh is reachdan 'g an seòladh,
'G an riaghladh le òrduighibh naomh' ;
'S 'g an dìon o luchd-foirneirt,
'S 'g an cobhar le dòchas na sìth',
'S toirt dhoibh thlòdhlaic an òirdheirc,
Bheir dhoibh aoibhneas is solas 'n an cridh'.

FARRANN IV.

LVII.

'S mu obair an Spioraid,
'S tu labhradh gu sgileil is réidh,
'S bu shoilleir 'n ad imeachd,
Gu 'n deach i troimh t' innibh gu treun ;
'S thug e fianuis gu minic,
Gu 'm b' fhèrrinn a dh' innis do bheul,
M' a thimchioll,—a' sileadh,
Toirt a làthaireachd mhilis do d' bheul.

LVIII.

An Spiorad a ghluais
Air na h-uisgeachaibh buan, an ceud là,
'S chuir mais' agus snuadh,
Air a' chruitheachd, le buaidh is le h-àdh,
'S chuir 'anail a nuas,
Air beò-chreutairibh chuantan is bhlàr,
'S nan speur a ta shuas ;
'S a chuir anam neo-thruaillidh an Adh'mh.

LIX.

'S mar Spiorad na firinn,
 Dheachd briathran a' Bhìobaill o n' àird,
 'S a dhealbh 's a ghin Iosa,
 'M broinn Mhuire le mìorbhuil a ghràidh,
 'S dh 'ung nàdur a dhaonachd,
 Gu ofig thrì-fillte le 'ghràs,
 Chur an gnìomh air son saorsa,
 Do anamaibh o dhaors' air a sgàth.

LX.

'S mar Spiorad an dùsgaidh,
 Tha reubadh 's a' rùsgadh brat sgàil',
 Bh' air cridheachaibh dùinte,
 Bha marbh ann an dùsal a' bhàis.
 'S ag oibreachadh dùrachd,
 'N an anamaibh le cùram mu 'n slàint',
 Ag osnaich fo thùirse,
 'S an coguis 'g an sgiùrsadh, gun bhàigh.

LXI.

Tha toirt aithne do thruaghain,
 Air cionta is truaighe le chéil',
 'S toirt eòlas mu 'n Uan doibh,
 A thàinig a dh' fhuasgladh a threud,
 'S air 'fhìreantachd uasail,
 'N a h-ìomlanachd bhuadhaich gu léir,
 Tha sìor thabhairt shuaimhneis,
 Do 'n pheacach is truaigh' tha fo 'n ghréin.

LXII.

'S mar Spiorad an t-soluis,
Tha foillseach' gaoil brollaich an Triath,
'S g' a nochdadh,—thoirt cothroim,
Gu aomadh na toile gu Criosd,
D' an obair 's d' an onoir,
Bhi co-chur na fola dhòirt Ios',
Ris a' choguis,—gu folach,
Gach peacaidh, chum sonais is dìon.

LXIII.

'S mar Spiorad an aonaidh,
Ri Dia ann an Criosda gu bràth,
'N co-cheangal na saorsa,
Le banntaibh nach sgaoil leis a' bhàs,
'N co-chomunn a' ghaoil sin,
Nach fuaraich, 's nach lughdaich le gràin.
'S an co-chumadh na naomhachd,
An gràs, 's ann am fìrinn a' fàs.

LXIV.

'S mar Spiorad nam buadhan,
Tha nochdadh gach truailleachd is gaoid,
'S tha gintinn naomh fhuath dhoibh,
'S na h-anamannaibh luachmhor 'n an crìdh',
'S tha 'g ìsleachadh uamhair,
Is àrdain, 's féin-uail, anns na naoimh,
'S a neartaicheas suas iad,
Gu taic dhoibh o bhuaireadh 's droch dhaoin'.

LXV.

'S mar Spiorad na dìlseachd,
 'S an treibhdhireis fhìor tha gun ghò,
 'S tha cumail gu dìreach
 Ri sgriobtuir na fìrinna 's an ròd,
 'S nach aontaich le daoineibh,
 No deannhnaibh, gu clao nadh o 'n chòir,
 'S nach àicheidh cuing Chriosda,
 Le tàire, gu 'miann thoirt do 'n fheòil.

LXVI.

Spiorad fair' agus ùrnuigh,
 Is furachrais dhùrachdaich, dhian,
 Tha cur freiceadain dùbailt,
 Air na h-anamaibh tha dùinte ri Criosd,
 Cur an cridhe fo chùram,
 'S eagal tiamhaidh 'n a dhùisg annt' roimh Dhia,
 'S thig o 'n àird' dhoibh thoirt ùraich,
 Eagal cadail fo dhùsal, 's fàs crìon.

LXVII.

Spiorad Dhé is na glòir' e,
 Tha gabhail gnàth chòmhnuidh 'n an crì' ;
 Dh'uchd-mhacaich an tòs iad,
 Mar chomhfhurtair mòr dhoibh toirt sìth',
 'S a' nochdadh dhoibh òirdheirceis,
 'S saoibhreas an eòlais tha 'n Criosd.
 An geall nach bu mhór leo,
 Na chaill iad :—'s e 'n glòir' bhi d' a dhìth.

LXVIII.

'S mar Spiorad an t-suaimhneis,
 A labhras 'n a thruas 's a' chuairt-ghaoith,
 Ri anamaunaibh buairte,
 Le doinninn an uamhais 'g an claidh.
 'S bheir foistinn o shuas dhòibh,
 O Ard-rìgh nan sluagh a' toirt cinnt'
 Air a' cho-cheangal bhuan sin,
 Gu bràth bhi do-ghluaiste d' an taoibh.

LXIX.

'S ged bhiodh an geur àmhghar
 Ro theinnteach, neo-ghnàthaicht', r' a luaidh,
 Ni n' Comhfhurtair gràidh so,
 An cumail an sàs ris an Uan,
 A their 's leoir mo ghràs duibh,
 'S mo chùmhnannt iom-làn chumail suas,
 Bhur n-anam nach fàilnich,
 'S treun spionnadh mo ghàirdein mu 'r cuairt.

LXX.

'S mar Spiorad a' ghràidh sin,
 Tha 'g aonach 's a' tàthadh r' a chéil',
 Nam ball ri 'n Ceann àrdaicht',
 'S 'g an gabhail mar phàilliunn dha féin,
 'S an coinnleir d' a lànachd,
 A' taomadh a ghnàth réir am feum'
 N' a lóchran tha deàrsach,
 Thoirt soluis do 'n àros gu léir.

LXXI.

'S mar au Spiorad ro chaomha,
 A ghlanas gach gaoid is droch cail,
 'S ni nàdur a chaochladh,
 Gu maise na naomhachd a 's àilt',
 'S ni 'n taobh stigh 'n a mhaise,
 A ghlanadh gu 'n gnìomh bhi ni 's fèarr,
 'S ni taitneach araon iad,
 'N an seirbhis 's 'n an inntinn a ghnàth.

LXXII.

'S e ghin iad o n' àirde,
 'S tha dòrtadh a mhàn ann an cridh',
 An dòchas nach nàraich,
 Tha cinnteach nach fàilnich an tìm,
 Toirt fàth-uail dhòibh 'n an àmhghar,
 'N an trioblaidibh, sàruicht' is claidht',
 'S o chorp peacaidh is bàis,
 Ann am miann bhi gu slàn aig làn shaors'.

LXXIII.

'S tha 'g an còmhnaidh gu làitheil,
 'N an anmhuinneachd ghnàthaicht' fo sgìos,
 Le osnaich do-ràitinn,
 A' tagradh do ghnàth air sgàth Chrìosd ;
 O theachdairibh shàtain,
 'S na sguilb tha 'g an cràdh gu ro dhian,
 'S a toirt foillseachaidh àrd dhòibh,
 An cainnt ni nach dàna leo inns'.

LXXIV.

A' toirt foillsichidh'n mòr' dhoibh
 'N an inntinn, air òirdheirceas caomh,
 Ard Phàras na mòrachd,
 Dh' ionnsuidh 'n gairmear fa dheòidh dhiubh gach
 'S a ni 'n anama-san lònrach, [aon,
 'N uair dheal'chas an deò riu le aog,
 'S bheir aiseirigh bheò air
 An corpaibh, le glòir tha ro naomh.

LXXV.

An Spiorad thug càil
 Do na h-anamaibh a ghràdhaich e féin,
 Nach riaraich 's nach sàsaich,
 Ach Criosd, is a lànachd air nèamh ;
 S' a meas mar ni 's fèarr dhoibh,
 Bhi triall as am pàillionnaibh cré,
 Gu 'fhaicinn-s' mar tha e,
 'S a mhealtuinn, gun sgàil air an léirs'.

LXXVI.

'S 'g an deanamh féin-àicheil,
 Is strìochdta d' a àitheantaibh féin,
 Gus nach toigh leis am fàgail
 Ni 's fhaid' ann am fàsach nan deur,
 'N am fianuisibh dha-san,
 Gu seirbhis d' a chàs mar an ceudn',
 Chum glòir' a shaor ghràis-san,
 Is comhfhurtachd àraich a threud'.

LXXVII.

An Spiorad, gu saoibhir
 A dhoirt là na caingis gu treun,
 'S a labhair le teangaibh,
 A thuilleadh air Eabhra 's air Ghréig ;
 'S thug so mar gheall-daingnich
 Nach pill e 's nach fanntaich a cheum,
 Gus ann cluin cluasan mall,
 A bheò-bhriathran 's gach cainnt tha fo 'n ghréin.

LXXVIII.

A sgaoileas an fhìrinn,
 Gu soilleir feadh thàiribh an céin,
 'S bheir uachd'rain is rìghrean
 Gu strìochdadh do riaghailt tigh Dhé,
 'S nach bì mòr-roinn na rìoghachd
 Nach aidich 'n an crìdh' 's nach toir géill,
 Do laghannaibh Chrìosda,
 'N a Eaglais, tre bhriathraibh a bhéil.

LXXIX.

'S cha bhi Rìgh no fear-riaghlaidh,
 Ag iarraidh an riaghailtean féin
 A mheasgadh le 'rian-san,
 ('S bhi cheana 'g a dheanamh b' e 'm beud !)
 Gheibh na ceannairceich tìodhlac,
 Bheir fo smachd iad, 's gu strìochdadh gu léir,
 'S bidh aonachd ion-mhiannaicht'
 Gaoil Chrìosda feadh chrìoch chruinne-ché.

LXXX.

Cha b' e 'ghibhtean, ge h-òirdheirc,
Thug thu mar ghruund trócair do chàch,
Dh' easbhuidh 'thoraidh, bu mhò leat,
An creidimh, an dòchas, 's an gràdh ;
Tha n' an gràsaibh sìor bheóthail,
Ann an anamaibh a' còmhnuidh 's a' tàmh ;
Toirt dhoibh aoibhneis is sòlais
Ann an Criosda Iehobhah an slàint'.

LXXXI.

An creidimh tha gabhail,
'S an dòchas tha daingean an greim,
'S tha 'g earbsadh gu faireil,
'S a' feitheamh a' gheallaidh gun fhoill,
'S an gràdh tha sìor tharruing
A' mhiann sin nach fannaich a chaoidh,
'S ag iomchair gach eallaich,
Gu 'n sealbhaich e 'm beannachd gach linn.

EARRANN V.

LXXXII.

Bu ghaisgeach ro chalm' thu,
'N uair bhiodh tu fo t' armachd gu 'n mheang,
'S do shaighdean gun dearmad,
Dol beò n' an geur dhealgaibh gu teann,
Tre inntinnibh marbhant',
'G an dùsgadh le farbhas o d' chainnt,
Fo 'n chiont thug an fhearg orr',
'S fo 'n mhallachd tha leanmhuinn gach feall.

LXXXIII.

Bhiodh na naimhdean air bhall-crith,
'S cha b' ioghnadh, fo 'n arm dhuit bu lann,
Claidheamh lìomhta, geur, earbsach
An fhocail, bha dearbht', ann do làimh,
Le 'dhà fhaobhar gu marbhadh,
'S ath-nuadhachadh 'n an'm'a bha caillt',
An lagh, nach toir tearmun, n,
'S an soisgeul gu 'n teanacsadh air ball.

LXXXIV.

'S tu a lomadh 's a spùilleadh
 Féin mhealltairean dùrr bhiodh ri uaill,
 O 'n cuid luideag mhi-chùbhraidh
 'M féin-fhireantachd, (lùthrach gun bhuaidh ;)
 'S cha 'n fhàgadh tu cùl-taic,
 Aig aon diubh, gun tionndadh gu luath,
 'S tu tairgseadh beath' an coist t' impidh,
 Do gach tuigse, gun ionndas gun luach.

LXXXVI.

'N uair a shéideadh an anail
 Gu treun ort, bhiodh t' anam cho beò,
 'S bhiodh buaidh leat, 's cha b' ainneamh,
 Air clusaibh 's air faireachadh slòigh ;
 'S crith-ghluasad cur cabhaig
 Le luasgadh is grabh ann am feòil,
 Thoirt didean a' bhail' orr,
 'S fear dìolaidh na fol' air an tòir.

LXXXVI.

'S bhiodh na mairbh air an dùsgadh,
 'S gheibheadh doill bha gun sùilibh an léirs' ;
 Agus lomnochdaich rùisgte
 Deadh thrusgan na h-ùir-mhais' 's glan sgèimh ;
 'S neach bha 'n dorchadas dùldaidh,
 Gheibheadh solus an iùl d' a chos-cheum ;
 'S òighean cadail geur dhùsgadh,
 'S bacaich, dannsadh, gu sunndach a' leum.

LXXXVII.

'N neach bha caillt' bhiodh deadh sgeul air,
 'S gheibheadh anmhuinneachd tréine is treòir,
 'S neach bha buairte 's na éigin,
 Gheibheadh fuasgladh o dheuchainn 's o leòn ;
 Gheibheadh ocraich deadh bhiadhtachd,
 Agus iotmhor casg iotaidh 's r' a òl ;
 'S ciomaich ghlaiste fo fhiachiabh,
 Saorsa naisgt' le làn dioladh is còir.

LXXPVIII.

Bhiodh na cridheacha calma,
 'G an sgoltadh 'n an spealgaibh 'n an cliabh,
 'S bhiodh inntinnean dalma,
 'G an tionndadh o ana-gnath gu rian ;
 'S na cuilbheirtich chealgach,
 'G an glacadh mar tharbh anns an lion ;
 'S luchd mi-ruin is ana-miann,
 A' caoidh bhi gun tearmunnn o Dhia.

LXXXIX.

'S na h-inntinnean talnhaidh,
 Bha feòlmhor, 's a dhearmaid roimh 'n àm,
 Gu 'n do thoill iad an fhearg sin,
 Bha nise 'g an leanmhuinn gu teann ;
 A' caoidh fo 'n cor anama,
 'S a nis an ceud earbs' air a call ;
 'S gun didean, gun tearmunnn
 'S an àm ac' an seilbh, o bhi caillt'.

XC.

'S na saoghaltaich mheallta,
 Bha gionach gu saoibhreas is stòr,
 'N an éigin an teanndachd,
 'S an cridhe fo champar gu leòir ;
 'S a' choguis bha stampa,
 Toirt fianuis a naimhdeas bhi mòr ;
 'S an cunnart tre 'n aing'eachd,
 Grad thuiteam an laimh an Dé bheò.

XCI.

'S luchd-misg' agus geòcaich',
 'S luchd-neo-ghloin' do 'n fheòil thug am miann,
 'S luchd-bhreug is gach dò-bheirt,
 Is féinealach bhòsdail gun chiall ;
 Is saobh-chreidmhich ghòrach,
 Bha dorchas, gun eòlas ac' riamh,
 Ag acan gu brònach,
 Mar shaltair iad fodhpa lagh Dhia.

XCII.

Ach, o innibh na trôcair,
 Bha 'n inntinn Iehobhah d' an taobh,
 Chuir a Spiorad gu d' sheòladh-s'.
 'S a lion thu le teò-chridheachd gaoil ;
 Rinn dhiot teachdaire glòrmhor,
 D' an anamaibh,—bha sòlasach, caomh ;
 Dinn thu 'n gairm o 'n staid bhrònaich,
 Dh'ionnsuidh còir, tre dheadh dhòchas, air Criosd.

XCIII.

Mar bha n t-ionmhas neo-chrìochnach,
 Bha 'n tabhartas fialaidh d' a réir ;
 'S cha bhiodh easbhuidh nach riaracht'
 Cia co tartmhor, 's cia ciocrach 's bha 'n treud ;
 'S tu mar stiùbhard, glic, rianail,
 Cur nan geallaidhean lionmhor ri 'm feum ;
 'S creidimh gabhail co-lionaidh,
 Air na beannachdaibh sìorruidh gu lèir.

XCIV.

Bha éifeachd n' ad ùrnuigh,
 Tre dheatach na tùis' a' dol suas,
 'S do chridhe 'n dian dhùrachd,
 A' tagradh gu dlùth trid an Uain,
 Toirt silidh air sùilibh,
 'S toirt leaghaidh le srùladh air cruas,
 'S air inntinnibh brùideil,
 Toirt taiseachd gu drùidhteach fo bhuaidh.

XCV.

'N àm do naimhdibh bhi strìochdadh,
 Air am bioradh fo phiantaibh gu geur ;
 Aig do làimh bhiodh sàr iocshlaint,
 Chum an lotan a lionadh, 's an chreuchd ;
 Fuil a' cho-cheangail shìorruidh,
 Chaidh a dhòrtadh gu fial chum an réit',
 Leis an Spiorad gu sìothchail,
 Chuir an inntinn air rian 's air dheadh ghleus.

XCVI.

Air droch innleachdaibh Shàtain,
 Bu mhòr t' eòlas, mar nàmhaid nan uàn ;
 Tha mar leòmhnan do-shàruicht',
 Ann am miann bhi 'g an tàrisinn le 'chluain ;
 Dh' fhàg sud cùram ro àraid,
 Mu 'n chuile bhrùit' ort a ghnàth chumail suas ;
 'S mu 'n chaol smùid, chum nach bàit' i,
 Ann an tuiltibh nan àmhgharan cruaidh'.

XCVII.

Bu sheannair glic thu 'n ad aimsir,
 Chaidh tre mhòran do dhearbhadh thu féin ;
 Chunnaic blàthan a' seargadh,
 Bha gun toradh is aimrid 'n an gnè ;
 'S geugan iosal nach aithnicht' orr'
 Mòran coslais, 's bha tarbhach 'n a dhéigh ;
 Dh' fhàg sud faic'leach 'n ad ghairm thu,
 Anmhuinn, dìleas, ro earbsach, is treun.

XCVIII.

B' athair caomhail do chloinn thu,
 Air do lionadh le caoimhneas is gràdh ;
 'S tu 'g an iomchar 's an ancachd,
 'S anns a' ghuth àit a dh' oidhche 's do là ;
 Leat a b' ionmhuinn 's a b' aoibhneach,
 Bhi 'g am faicinn a' cinntinn 's a' fàs ;
 'S toradh t' ùrnuighean dìomhair.
 Chuireadh suas leat ri Dia as am pàirt.

XCIX.

Bha thu 'n truas ris na h-aingidh,
 Tearc no lionmhor bha naimhdeil do d' chliù,
 Bha thu giùlan gu mallda,
 Leis gach aon dhuit bha 'n gamhlas 's mi-rùn ;
 Chàrn thu tein' air an ceann-san,
 Leis a' mhaith nochd thu 'n geall an droch dhùil,
 'S cha d' chuir lasan no campar
 Bheag do d' shiochaint an call ort d' an taobh.

C.

'S mòr an t-urram chuir gràs ort,
 Anns an t-saoghal so làthair 'n ad chùrs,
 Clann do chloinne bhi fàs ann,
 'S ag éirigh an àird ri do ghlùn ;
 Toil-inntinn shìothchail do d' ghràdh ann,
 Chunncas sud leat mu 'n d' fhàilnich do shùil ;
 'S aobhar dòchais gu 'm fàs dheth,
 Ni nach fac thu 'n ad là fo bhlàth cùbhr'.

CI.

B' aodhair ath-truasach, caomh thu,
 Ris na caoraich o raointibh an cluain,
 Chaidh le seach'ran air faontrath,
 Ann an rib' an droch aoin iad a bhuair ;
 B' e 'n ath-aiseag o 'n claonadh,
 An t-aon ni d' an taobh a bha uait,
 Chum an ionaltraidh daonnan,
 Ann an innis na naomhachd 's na stuaim.

CII.

Cha b' e 'n reubadh 's am pronnadh
 Bu bheus dhuit, ach tairisneachd truais ;
 'S le t' impidh 's le t' earail,
 An creuchdan a ghlanadh gu nuadh,
 Ann an iocshlaint na fala,
 Dheanadh sgiamhach is glan iad 'n an snuadh,
 Le deadh rùintibh gu h-aithreach,
 Chumadh dlùth iad 'n an caithris o shuain.

CIII.

'N uair a chuireadh tu 'n céill doibh,
 Cia mar mhill siad iad féin le dol cli,
 'S ann bhiodh eangana geur' ort,
 Gus an dealbht' 'n a dhéigh sin annt' Criosd ;
 Spiorad tilgidh gu léir-sgrios
 Cha b' e sud bha 'n ad chré dhoibh ach sìth,
 Spiorad cosnaidh tre dheadh-ghean,
 Neach 'n an àit thug an éiric gu crìch.

CIV.

Bha thu d' nàmhaid do 'n pheacadh,
 Mar theine ro chaithteach is dian ;
 Agus t' eud 'n a ghnàth-lasair,
 Ag iarruidh cur as dha gun sgios ;
 S' nach fàgadh tu fasgadh
 Aig aon bha 'g a chleachdamh 'n a ghnìomh ;
 Gus an iompaicht' air ais iad,
 Gus a fhreumb a ghrad chasgairt an Criosd.

CV.

Bha do chàil co beag tlachd dheth,
 Mar an ni bha mi-thaitneach le Dia,
 Leag a mhallachd mar smachd air,
 Air a leanmhuinn le masladh 's mòr phian ;
 Ged a b' ionmhuinn a Mhac léis,
 Leag se 'fhearg air mar shac a bhruth sìos ;
 'S ann an àite nam peacach,
 Cha robh feòrling dha maithte gun dìol.

CVI.

Bha an ni sin dhuit gràineil,
 A tharruing am bàs air Mac Dhia ;
 Puinnsean nimheil an dràgoin,
 Fìor nàmhaid shìl Adhaimh 's glòir' Chrìosd ;
 Air an aobhar 's cha b' àill leat
 Annad féin no do chàch bhi 'g a dhìon ;
 Ach a dhiteadh tre 'n ghràs sin,
 Thug làn bhuaidh air, 's a ghnàth-chur gu dìth.

CVII.

Thaobh gu 'n d' aon a ghràs tèarnaidh
 Ris féin thu, 'n a ghràdh dhuit an Crìosd,
 Bha do thruas ri d' cho-bhràithribh,
 Obair làmh an Ti 's àird' ann an gaol ;
 'S O ! b' e 'n anama neo-bhàsmhor,
 A thèarnadh, rùn-gràdhaicht' do chrìdh',
 B' e do shaothair 'n ad là sud,
 Gus 'n do thriall thu 'n uair thàinig do chrìoch.

CVIII.

B' e 'n crann-ceusaidh do rìreadh,
 A cheus dhuit an saoghal 's an fheòil,
 'M bonn teagasig gu daonnan,
 O 'm bu mhiaun leat bhi 'g innseadh do sgeòil ;
 Glòir an Uain air chaidh tobradh,
 Bu shoilleir, 'g a inns' o d' chainnt bheòil,
 'S feòil a mhàin ghabhadh sgìos dhìot,
 'N àm dhuit iomradh air 'fhìreantachd mhòir.

CIX.

Bu ghlòrmhor o d' bhilibh,
 Rì éisdeachd, le ciomaich bha truagh,
 Mu 'n ghaol tha gun choimeas,
 Tha chòmhnuidh 'n a innibh bhith-bhuan,
 Do na thàinig e 'shireadh,
 'S a thèarnadh o mhilleadh le 'thruas ;
 Fo theistean an Spioraid,
 Toirt leaghaidh le tiomachd air cruas.

CX.

Do mhacaibh nan tàirneanach,
 B' aon thu bha làidir làn lùths ;
 Gu daingnichean Shàtain
 A leagadh gu làr leat 'n an smùir ;
 'S am ballachan àrda,
 Bha a' cumail a thràillea gu dùr,
 An glasaibh a bhàis leis,
 Gun solus nan gràs theachd gu 'n sùil.

CXI.

'S tric a thugadh leat beàrna,
 Air a chaistealaibh làidir bha doirbh ;
 'S a leig thu ghrian deàrsaidh
 Tre 'sheomraichibh gràineil le toirm ;
 'M fear bu treise 's e làimh riut,
 'G a chreachadh dheth 'àirneis 's dheth 'airm,
 'S an t-anam neo-bhàsmhor,
 'G a fhuasgladh 's 'g a thèarnadh o 'n fheirg.

CXII.

Ann am blàraibh a' chogaidh,
 Bu deas thu fo d' chlogaid 's fo d' sgiath ;
 'S crios do leasraidh 's do choisbheart,
 'S t' uchd-éididh o lotaibh 'g ad dhion ;
 'S claidheamh liomht' an naoimh fhocail
 Ann ad làimh, gu glan nochd thu gach ial,
 Chuir do naimhdean 'n an tosd dhuit,
 Bh' air an gluasad o 'n t-slochd gu mi-rian.

CXIII.

Measg luchd togail na h-aitreimh,
 Leag thu bunait gu taiceil, do-ghluaist',
 'S chaidh thu dhùsgadh nan clachan,
 Bha 'n an dùnaibh 'n an codal fo 'n luaithr' ;
 'S bha do chlachaireachd snasmhor,
 Beo-aointe, làn-mhaiseach 'n a snuadh ;
 'S a' chlach-chinn is snaidhm glaic' aic',
 Air an iomlan, thoirt neirt dhoibh, 's fàth-uail.

CXIV.

Cha robh togail gun stéidheadh,
 Nò éideana bréige gun stà,
 Ris nach cuireadh tu séisdeadh
 'G an tilgeadh gu treun air an làir ;
 'S cinn-iùil dhall, na h-an-aoibhinn,
 'S tric a ghlaodh thu 'n ad eud riuth gu h-àrd ;
 Chum daingnich na réite,
 Iad a philltinn, le 'n treudaibh 's le 'n àl.

CXV.

'S cha b' eud searbh a ba 'g éirigh,
 O fheadhmoireachd fhéineil, gun chonn,
 Tre 'n do ghlaodh thu le d' bheul riu ;
 Ach o 'n spéis do ghldir Dhé bha 'n ad chom ;
 'S meud a' ghaoil ort chuir éigin,
 'S luidh dlùth fad do ré ort gu trom ;
 Gu an an'm thoirt o léir-sgrios,
 Trè bheò-ghràsaibh an Léigh' air deadh bhonn.

CXVI.

Bu tu 'n searmonaich' fosglaidh,
 Air lagh is air soisgeul faraon,
 Gu auama a mhosgladh,
 Fo mhothachadh goirt bhiodh neo-chlaon,
 Air 'a phuinnsein a loit iad,
 S rinn an salachadh co olc leis gach gaoid,
 'S air-san,—Iobairt an cosnaidh,
 'S làn locshlaint am foistinn 's an sìth.

CXVII.

Sheirm thu trompaid Shinài
 Mar ghuth criothnachaidh thàirneanaich chruaidh,
 A chuir luasgadh air àireamh,
 Do na h-anamaibh bh' aig Sàtan 'n an suain ;
 Bhiodh do shaighdean geur-shàitht' ann',
 'S iad 'g an lotadh 'n an àirnibh le buaidh,
 Rinn dhiubh feumnaich air slàinte
 Nach dean aon ach Imanuel suas.

CXVIII.

'S trompaid Shioin gu 'n shéid thu,
 Chuir an anail o nèamh gu treun, beò,
 Thug gu tobar na h-éifeachd
 Iad, gu 'n glanadh o 'n creuchdaibh 's an leòin ;
 'S rinn iad sgeadaicht' 'n an éideadh,
 Fo 'n cuid armachd gu gleust' air deadh dhòigh :
 Fo Ard-cheannard na réite,
 'N aghaidh naimhdean 'n an déigh bh' orr' an tòir.

CXIX.

'S tu nach fàgadh aon chomas
 Aig lethsgèulaibh collaidh gun rian,
 Gu seasamh gu somalt,
 Cur dàil dhol an coinneamh an Triath ;
 'S tu cur teine ri 'm bounaibh,
 'S do shaighdean 'g an tolladh 'n an cliabh,
 Fearg theinnteach 'n a tonnaibh,
 'S tein' ifrinn 'n an sealladh o shìos.

CXX.

Beath'an tairgse do dheis-laimh,
 Do na h-anamaibh a chreideadh an Criosd ;
 'S do na h-anamaibh nach creideadh,
 Bhiodh am bàs's gach mi-leas'n ad làimh chli ;
 'S cha 'n fhàgadh tu teagmhaich,
 Aig stairsnich 'n an seasamh, aig sìth ;
 Ach bhiodh t' impidh 'g an greasad
 Gu an tèarmuinn 's an teasairginn sior.

CXXI.

'S tric a ghlaodh thu gu dìleas,
 O ìochdar do chrìdh' riu gu h-àrd,
 Mar o Dhia as uchd Chrìosda,
 Iad a philltinn gu 'n sìothchaint gun dàil ;
 'S iad gun fhios ciod a dh' fheudadh,
 Uair do 'n ùin' thoirt, gu crìch dhoibh nach fàg
 Uiread 's lethsgèul aig aon diubh,
 Chum an dion o bhinn-dìtidh là-bhràth.

CXXII.

'S gur h-iomadh sgàl cràiteach,
 Tha 'n ifrinn, is fàsgadh nan deòir,
 Aig muinntir chuir dàil,
 Ann an gabhail ri slàinte co mòr,
 O 'n diugh gus am màireach,
 An dùil nach robh 'm bàs orr' an tòir,
 Co dlùth air an sàiltibh,
 Gu an sguabadh co trà gu do-bhròn.

CXXIII.

'S iomadh mac a bha stròthail,
 Is millteach le 'm feòlmhoireachd thruaillt'
 Fo do theagasg fhuair seòladh,
 Gu pilltinn, d' a neo-ghloin' toirt fuath',
 'S braon an aithreachais bheòthail,
 A' sgaaileadh nan deòir air a ghruaidh ;
 'S bu mhòr t' aoibhneas mu 'n chòisir,
 Air do 'n dannsadh 's do 'n cheòl bhi dol suas.

CXXIV.

Cha bhiodh broineag no bàrlag
 Dhiubh, nach tilgteadh le tàir air an cùl,
 'S cha bhiodh salchar co gràineil,
 Nach biodh air ionnlad gun dàil dhiubh, gach gràid,
 'S trusgan fìor-ghlan na slàinte,
 Mar a' chulaidh a b' fhèarr a chur ump' ;
 'N cois 'n laoigh bhiata 'g an àrach,
 Bheirt' am fìon sin a b' fheàrr chum a bhàird.

CXXV.

Bha do bhriathran co cuimir,
 Sgaradh 'n searbh o na mhilis gach uair ;
 Agus cealgairean nimheil,
 O na h-anamaibh a ghineadh o shuas,
 Agus fuirmealaich thioram,
 O an dream a bha 'g imeachd fo bhuaidh,
 Saor ghràsan an Spioraid,
 'S bha 'g an àrach an innis nan uan.

CXXVI.

Bha do theagasg neo-fheallsa,
 Glan, dìleas, 's ro rannsachail, geur ;
 Air faireachduinn mhealltaich,
 'S air mearachdaihh dall bha gun fheum ;
 'S air barailiuh fabhtach,
 Bha 'g éirigh 's gach ceann bha gun chéill,
 Chum an dìteadh mar aimhleas,
 Bh' air an dealbh le àrd-cheann-ard nam breug.

CXXVII.

Bheirteadh milis à searbh leat,
 Agus solus à dorchadas dùr,
 Agus glan as an t-salachar,
 Agus mil o 'n fhear gharg, gu glan, cùbhr',
 Agus spionnadh à anmhunn,
 Agus mòr as a' mheanbh, bha gun lùths,
 Agus còmhnard à garbhlaich,
 Agus dìreach à camachdaich nan lùb.

CXXVIII.

Chiteadh geal leat 's an sgàrlaid,
 'S ann am fuath chiteadh gràdh leat fo theinn ;
 'S ann am fuachd gheibhteadh blàth's leat,
 Agus urram 's an tàire gun suim ;
 'S ann an truailleachd fìor àillteachd,
 Agus 's tric chiteadh slàint' leat 's an tinn ;
 Chiteadh beath' anns a' bhàs leat,
 Far nach faicteadh aon chàil leis na doill.

CXXIX.

Mar bha t' anfhannachd làitheil,
 A' cur feum air ùr-ghràsaibh gach uair,
 Fo 'n do chleachd thu féin-àicheadh,
 Anns gach ceum anns am b' àirde do bhuaidh ;
 Cumail féin fo do shàiltibh,
 Uiread 's dìoghlum cha b' àill leat a bhuain ;
 Bu le ainm an Ti 's àirde,
 T' iobairt-mholaidh bha ghnàth dha dol suas.

CXXX.

'S iomadh teachdaire gràdhach,
 Thaobh ghibhtean is gràis nach robh cli,
 Leis 'm bu mhiann a bhi làimh riut,
 'N àm bhi 'g iomradh gu blàth air gaol Chrìosd ;
 Aig do chosaibh gu sàmhach,
 Gabhail oilein is àraich faraoon,
 Fo do sholus o 'n àirde,
 Deanamh aoibhneis is gàirdeachais crìdh.

EARRANN VI.

CXXXI.

Cha bu duirche do bhriathran,
 Na do sholus, dh' fhàg dlomhair air pàirt,
 Cuid do d' phuingibh mu 'n diadhachd,
 'S mu oibreachadh m'orbhuileach gràis ;
 Ach am breithneachadh ìosal,
 Air doimhne, fad, leud, agus àird',
 Gliocais, gràidh, tha neo-chrìochnach,
 Nach tuig crèatairean crìochnach 'n a làn.

CXXXII.

Fhuair thu còmun 's an Trianaid,
 Nach robh aon uair 'n a cheud staid aig Adh'mh ;
 Ged bu ghloir mhór 'n a iomhaigh
 E, mu 'n d' thuit e, le strìochdadh d' a nàmh ;
 'S ni bu dlùith' mar an cèudna,
 Na bh' aig ainglibh 'n a fhianuis gu h-àrd ;
 Ann ad aonadh rì Crìosda,
 Fhuair thu 'n nàdur na diadhachd còmh-pàirt.

CXXXIII.

'N uair a rugadh an Ceud-ghin,
 'S 'n uair chualas an Ephrata 'n fhuaim,
 Sheinn aingle nan nèamhan,
 Gu binn air àrd sgeul nam buadh ;
 Ach fhuair thusa mu 'n sguel sin,
 Gus a ghnàth chur an céill leat do 'n t-sluagh,
 Ni nach d' fhuair na naomh-cheruib,
 Ged is mòr th' ac' do léirsinn mu 'n Uan.

CXXXIV.

'S fear do ghibhtean do réir sin,
 Ciod an t-iognadh ged dh' éireadh e 'n àird',
 'N cuid do phongaibh, thar léirsinn
 Iomadh aoin do d' cho-chreutairibh gràidh ;
 Dh' eashbuidh tuigse, 's le 'n reuson,
 Nach cumadh 'n ad cheumaibh ort fàir',
 Ach 'n a dhéigh sin, fhuair feum dheth,
 'N uair a thuig iad uait féin e ni b' fhèarr.

CXXXV.

Chreid thu Dia theachd 'n ad nàduir,
 Agus dh' fhairich thu 'n gràdh ud 'n ad chrìdh' ;
 Agus innleachdan Shàtain,
 Dùsgadh truailleachd an àird' gus a chlaoidh ;
 'S mar tha Ceannard na slàinte,
 'N a chùl-taig do 'n dream ghràs-mhor tha sgìth,
 Fo na tuinn mar mhuir bàithte,
 Tigh 'nn mu 'n timchioll, 's 'g am fàgail gun chll.

CXXXVI.

'S iomadh uair dhoibh a thàrlas,
 Mar bha òglach an fhàidhe fo thùirs',
 Fo gheur uamhas 'g a fhàsgadh,
 'N uair bha 'n sluagh is feachd nàmhaid air dlùth ;
 'S ged bha e 'n staid tèarnaidh,
 B' i an truaighe a mhàin ri 'n robh 'dhùil ;
 Gus am fac e 'm feachd làidir,
 Bha m' a thimchioll o 'n àirde, le shùil.

CXXXVII.

Is bochd, mi-shuaimhneach, is brònach,
 Do chuspairibh tròcair is trùais,
 Tre as-creidimh 's mi-dhóchas,
 'S do réir seallaidh, bhi 'm fòir-eigin chruaidh,
 Agus naimhdean an tòir orr',
 'S ann an cìocras gu 'm beò-shlugadh suas,
 'N uair th' aca tèaruinteachd ghlòrmhor,
 Na 'm bu léir dhoibh, 'g an còmhnaidh mu 'n cuairt.

CXXXVIII.

'S e 'm beò-chreidimh ni làidir,
 Na h-anamanna gràsmhor gu léir,
 Ann an neart an tréin ghàirdean,
 'S am mòr iomlanachd àrdaicht' Mhic Dhé ;
 Thogas suas iad ri 'ghràdh-san,
 Is o 'n talamh gu 'làith 'reachd air nèamh,
 'N uair tha 'm faireachduinn cràiteach,
 'S iad 'n an anmhuinneachd sàruicht' dhiubh féin.

CXXXIX.

Thaobh an tairt 's am mòr ìotadh,
 Bh' air an t-sluagh, air do bhriatbraibh an tòir,
 Bhiodh na mìltean 's na ceudan,
 As gach sgir' teachd le cìocras 'n ad chòir ;
 'S cha bu sgìos le cuid lìonmhor,
 Fichead mìle, ged dheanadh iad, 's còrr,
 Teachd a dh' éisdeachd do sgeula,
 Bha 'n a slàinte, 'n a dìon dhoibh, 's 'n a lòn.

CXL.

'S bhiodh gach tiormadair féineil,
 Leis an fharmaid, 'g an léireadh 's 'g an leòin ;
 'S an luchd-leanmhuinn 'g an tréigsinn,
 Teicheadh as uath' mar threud o dhroch cró ;
 'M freasdal iomraidh mhi-chéillidh,
 Bha gun iùl, dh' easbhuidh cheud-faithean beò,
 Ceang'lt' aig mealltair nam breugan,
 'N inntinn, talmhaidh, gun spéis ach do 'n fheòil.

CXLI.

Bha do theagasg co tarbhach,
 Do mhòr àireamh do anamannaibh caillt',
 'S nach robh ceum fhad 's a dh' fhalbh thu,
 Nach robh 'n sluagh air do sheanchas an geall ;
 Ann an Sasunn luidh ainm dhuit,
 Leis an uirighioll dhearbht' a bha d' chainnt ;
 Ghoir iad Abstol na h-Alb' dhiot,
 Thaobh na glòir' bha 'n ùr-labhradh do theang.

CXLII.

'S fad 's is farsuing a sgaoileadh,
 Còmhradh t' oibre, 's na crìochaibh mu 'n cuairt ;
 Chaidh e mach feadh gach tìre,
 Ann am Breatunn measg mhìltean do 'n t-sluagh ;
 Sasunn, 's Eirinn, 's tìr Ìosal—
 Na h-Alba, 's gach dìthreabh mu thuath ;
 S ghabh na h-Ìortaich le mìlseachd,
 Rì do theisteachas ro dhìleas mu 'n Uan.

CXLIII.

'S nì nach comas dhomh innseadh,
 Dh' easbhuidh cainnt agus inntinn g' a luaidh,
 Leat mar shoirbhich an fhìrinn,
 Leis na beannachdaibh prìseil 's mòr luach ;
 Cha b' ann a mhàin anns an rìoghachd-s',
 Far am b' ait leinn bhi cluinntinn a fuaim,
 Ach do thoradh do shaothrach,
 Chaidh a null do na h-Innsibh thar chuan.

CXLIV.

Toradh saothrach do ghaoil-sa,
 Tha r' a fhaicinn 's na h-Innsibh an uair-s'
 Toradh ùrnuigh o d' mhaoth chridh',
 Agus t' oileanaich naomha 'n am buaidh ;
 Ais do cheud mhac, bha caomhail,
 Measg nan anama thug gaol dha gun fhuath,
 Fad a chuairt anns an t-saoghal,
 Ged a chrìochnaich a shaothair co luath.

CXLV.

Ciod a their mi cha 'n eòl domh,
 Mu do shoirbheachadh mòr fad do chuairt,
 Ann am flon-lios Iehobhah,
 Rinn thu dìleas mar 'òglach-s' le buaidh ;
 Leam cha teagamh nach d' chòmhlaich,
 Cuid do d' chloinn le mòr shòlas riut shuas,
 'S cuid 'n ad dhéigh an gleann deóir dhiubh,
 Bhios fa dheòidh dhuit 'n an glóir 's 'n an crùnuail.

CXLVI.

Ged is lìonmhor tha brònach,
 Tha 'g ad chaidh o chaidh fòd ort le h-eug ;
 Cha 'n e 'm bròn tha gun dòchas,
 Tha 'g am fàgail co leòint' ann do dhéigh ;
 Oir is cinnt' leo gur beò thu,
 Ann am Pàrras na glòire air nèamh,
 Measg nan ainglean thug còmh-dhail
 Dhuit, 'n uair dhealaich an deò ri do chré.

CXLVII.

'N uair bha 'm foghar tigh'nn dlùth ort,
 Bha do bhagaidean cùbhraidh fàs làn ;
 Tòradh trom ort 'g a ghiùlan,
 Mar làn arbhar a' lùbadh gu làr ;
 Air do 'n ghairm teachd do d' ionnsuidh,
 Gu dol imrich do 'n lùchairt a 's àird',
 Dhol air falbh 's tu nach diùltadh,
 Gu làn sheilbh ann an cùirt Fìr do ghràidh.

CXLVIII.

Leis na h-ainglibh bu phrìseil
 Bhi 'g ad fheitheamh, 'n uair lìbhrig thu 'n deò ;
 Air an sgiathaibh 'g ad dhìreadh,
 Chum an aoibhneis gun sgìos thar na neòil ;
 Chum a' chomuinn nach crìochnaich,
 Air an tric bha do mhiann, 's tu fo bhròn,
 Anns an dealraich mar ghrian thu,
 Ann am fireantachd fhìor-ghlan gun sglead.

CXLIX.

Anns an fhìreantachd dhealraich,
 Anns an d' àrdaich t' fhear-gràidh thu gu mòr ;
 'S tu 'g a fhaicinn mar tha E,
 Ann an iomlanachd àillidh bhi-bheò ;
 'S tha ris cosmhuil 'n ad nàdur,
 Air do chaochladh o chàileachd na feòl ;
 Tha do chìocras làn-shàsuaicht',
 'S ioma-riaraicht' an làth'reachd a ghlòir'.

CL.

Glòir nach b' urrainn thu ghiùlan,
 Tre aufhannachd shùl anns an fheòil ;
 Ach bu tric ort bha drùidhteach,
 Mar bhlàth bhraonaibh ro chùbhraidh o neòil ;
 Air do chridhe maoth, brùì e,
 S' do ghruaidhean a' srùladh nan deòir ;
 Ach cha 'n fheum thu nis gnùis-bhrat,
 'G a làn-mhealtuinn gu dlùth 'n a làn-chòir.

CLI.

Chaidh gach doilghios air chùl dhuit,
 Chaidh gach àmhghar is tùirse mu làr ;
 Theich gach duibhre 's gach dùldachd,
 Theich gach buaireadh, 's gach ciùrradh, 's gach cràdh;
 Theich gach iomaguinn, 's gach cùram,
 Theich gach dìomhanas sìubhlach, 's gach sgàil ;
 Theich gach caoidh leis gach ionndrain,—
 'S tha gach sgìos dhuit air tionndadh gu tàmh.

CLII.

Sgaoil do phàilliunn o chéile,
 'S am bu tric bha thu deurach fo bhròn ;
 Sgìth le osnaibh, fo chiùrradh,
 'S iomadh deuchainn bha dùr 'g a do leòn ;
 Ach tha thu nis 'n ad làn éideadh,
 Aig làn shaors' 's an tigh nèamhaidh, ag ól
 As an lànachd nach tréig thu ;
 'S linn nan linn, cha tig éis air do stòir.

CLIII.

Thionndaidh bròn dhuit gu h-aoibhneas,
 Thionndaidh duibhre na h-oidhche gu lò ;
 Cha tig sgaòil air do shoillse,
 Tha do dhealradh 'n a bhoillsgeadh gun cheò ,
 Thionndaidh t' ùrnuigh gu seinn dhuit,
 Air a' chlàrsaich ro bhinn, tha do 'n òir ;
 Seinnean nan dàna 's nan laoidhean,
 Air a' ghràdh rinn co-lìonta thu le glòir.

CLIV.

Fhuair thu crùn na làn duaise,
 Mar an gleachdair a bhuadhaich 's an réis ;
 A' chlach gheal, 's an t-ainm nuadh oirr',
 Nach tuig aon, ach na fhuair i iad féin ;
 'S an deis fhìor-ghlan- neo-thruaillidh,
 Chaoidh nach caochail 'n a snuadh, 's 'n a glansgèimh,
 'S craobh na beatha, bhith-bhuan dhuit,
 Le naomh thoraibh ro luachmhor a geug.

CLV.

'N uair a shéidear gu fuaimneach,
 An trompaid le 'n luaisgear na sléibht',
 'S a dhùisgeas o 'n uaighibh,
 Na mairbh bha 'n an suain annt' gu léir ;
 Chi na slòigh do ghlòir uasal,
 Air deas-laimh an Uain, 's mar-ris féin,
 A 'toirt breth air na h-uaibhrich,
 'N aghaidh t' iomraidh chuir suarach an Léigh.

CLVI.

Sin an là 'm bi do shólas,
 Air a lònadh do ghlòir 'n a làn sgèimh ;
 Anns an iomlanachd òirdheirc,
 Anns an sgeadaich Iehobhan a threud ;
 'N uair theid diabhuil air fògradh,
 'S na shaltair fo 'm brògaibh Mac Dhé,
 Fo bhinn-dìtidh gu dòlas,
 Gu loch teine na dòruinn 's na péin'.

CLVII.

Chi na h-aingidh thu 'n uair sin,
 'S bidh do ghlòir 'n a mhòr uamhas dhoibh féin ;
 A' cur ri 'm piantaibh, 's ri 'n truaighibh,
 Nach do chreid iad na chual iad o d' bheul ;
 Ach bidh aoibhneas le luathghair,
 Aig a' mhuinntir thug cluas do do sgeul ;
 Toirt na glòir' do 'n Ard-uachd'ran,
 Thug thu riamh dhoilh mar bhuachaille treud'.

CLVII.

'S dhuit cha 'n aithreach gach deuchainn,
 Rinn thu ghiùlan 'n a aobhar 's an fheòil ;
 Shiab o d' shùilibh na deura,
 'S t' aghaidh ungt' le h-ol-aoibhneis gun sgleò ;
 'S cha tig neul air do léirsinn,
 O làn mhealtuinn do Dhé 'n a làn-chòir ;
 Oir tha ghrian ort air éirigh,
 'S tu mar shoillseadh nan speur 'n an làn ghlòir.

CLIX.

Deatach smùididh am pian-san,
 Bhios a' dìreadh, 's a slor dhol an àird',
 Cha toir osnadh o d' chliabh-sa,
 Ann an truas ruith', oir chrìochnaich dhuit cràdh ;
 Oir bidh t' anam co lìonta,
 Leis a' ghlòir air 'n d' rinn iadsan mòr thàir,
 'S t' Aleluia gu sìorruidh,
 Bidh dol suas 'n uair tha 'n pian-s' n a làn àird'

CLX.

Bidh an caochladh co iomlan,
 Air na naoimh, nach gabh iomradh an dràs ;
 'S nach tig gluasad le duilchinn,
 Air an sonas, le h-urchuidibh chàich ;
 O ! faiceadh peacaich an iomrall,
 Gabhail impidh le h-iomaguinn 'n a thrà ;
 Ann an dòchas 's am muinghinn,
 Tréigsinn uile ann an iomlaid saoir ghràis.

CLIX.

Ach, tha sinn' air ar fagail,
 As do dhéigh, ann am fàsach nan dedir ;
 Fosgailt', buailteach do àmhghair,
 'S do gheur-leanmhuinn tha ghnàth oirnn an tòir ;
 Ach an tròcair nach fàilnich,
 Tha ni 's leidir ann a ghràs gu 'r toirt beò ;
 Chum ar n-anama 'n a chàs-san,
 Chumail suas ann an tàbhachd 's an treidir.

CLXII.

A Thi iochdmhor, 'n ad fhàbhar,
 Dean 's a' chreidimh sinn làidir is beò ;
 'S nochd gu treun dhuinn do ghàirdean,
 Toirt do naimhdean fo 'd shàil mar chos-stòl ;
 'S lùb do nèamhan o 'n àirde,
 Leig do dhealanach deàlrach feadh shlògh,
 'S cuir do shaighdean geur-shàithte,
 Ann an cridhe t' eas-càirdean, 'g an leòn.

CLXIII.

Gus an strìochd iad gu làr dhuit,
 Tre ghràs aithreachais shlàinteil, d' an dedìn ;
 Le féin-ghràin is féin-thàire,
 'S ann an ùmhlachd a' ghràidh mar bu chòir ;
 Gabhail tlachd ann do stàtuibh,
 'S air son peacaidh fo nàire 's fo bhròn ;
 Dol fo d' chuing gu féin-àicheil,
 Le toil-inntinn is gairdeachas mòr.

CLXIV.

'S leudaich ionad ar pàilliuinn,
 'S brat ar bùtha chur sgàil oirnn is dìon ;
 Sgaoil ar cùird feadh an fhàsaich,
 Ann am farsuingeachd tàirngte 'n ad rian ;
 'S dean ar cuailleachan làidir,
 Is do-ghluaiste 'n ad stàtuibh gach ial,
 'S thigeadh slìochd air gach làimh oirnn,
 Réir do gheallaidh, le gràdh dhuit bhios lìont'.

CLXV.

'S meudaich maoin do dheadh chàirdean,
 'S leat an t-airgiod, an tain, is an t-òir,
 'S dean iad fialaidh, pailt-làmhach,
 Chumail bìdh ann ad fhàrdoich mar stòr ;
 Chum do theachdairean gràdhach
 Chumail suas chum do chàs bhi dol leò ;
 Sgaoileadh sgeula na slàinte,
 Le deadh shoirbheas nan gràs chum do ghldòir'.

M A R B H R A N N

DO

DHOMHNUL MUNRO.

AN ROIMH-RADH.

RINNEADH am Marbhrann a leanas air an “fhirrean choir” agus ainmeil, Dòmhnall Munro, leis an duine chomasach dhiadhaidh a dh’éug o cheann ghoirid sna Hearadh, Iain Moristan, mu’m faoidte a ràdh^a an là dh’eug e, “gu’n do thuit Uachdaran agus duine mòr ann an Israel,” agus d’am bfhearr “là a bhàis, no là a bhreith,” neach nach d’fhàg a leithid eile sa Chinneach-Ghàidhealach a thaobh a ghibhtean, agus a thàlann mar Bhàrd.

Rugadh an duine cliuiteach so Dòmhnall Munro, an sgìre-Phort-rìgh’s an Eilean sgiatanach, mu’n cuairt do’n bhliadhna 1773. Agus chaill e ’fhradharc ann an laithean òige leis a Bhric, mu’n d’fhosgail an Tighearna sùilean inntinn, gu bhi a faicinn agus a’ cur an céill, saibhreas do-rannsachaidh Chrìosd d’a cho-pheacaich, a thaobh an robh iadsan dall ge d’ bha fradharc an sùl aca. Bhàsaich e air a bhliadhna 1830. An dèigh na stiubhardachd a fhuair e o’n Tighearna a choimhlionadh gu dìleas, a chum glóir Dhé, agus slàinte lomadh annam neo-bhàsmhor d’am bheil “a chuid is mòr beò

gus a nis, ach tha cuid diubh nan cadal." 'San là an robh-^{as a} aineolas agus dorchadas a còmhдахadh na Tìre agus nach robh "guth an turtuir, ach ainmig r'a chluinntinn innte," gidheadh 'san là dh'orcha sin thog e suas 'na aonar Bratach, agus Fianuis Iosa Crìosd, agus chum e suas iad araon gu treun gu la a chriche, an aghaidh iomadh doinionn uamhasach a shéid air, is gann is urrainn do dhaoine, anns an là mheagh-bhlàth so a thuigsinn, no a ghabhail a stigh, a thaobh "gu'n do sheas an Tighearna làimh ris, agus g'un do neartaich se e, do bhrìgh gu'n do mheas e dileas e."

Cha bhiodh e dhomhsa, ach ionann is diombain facal a ràdh mu chliù an duine dhiadhaidh so "òir bha deadh-theist aige o na h-uile dhaoine, agus o'n fhirinn féin" agus ge d bhithinnse cho comasach, agus cho fòghluimte ri aon duine 'san Tìr, cha tìgeadh aon ni a b'urraìnn mi 'ràdh mu dhéibhinn, ach fada, fada goirid air na tha'n Dàn so féin a' cur an céill d'a chliù.

I. M. G.

ACROSTICK.

Annas am bheil a cheud litir do gach sreath a deanamh suas na facail a leanas. Roimhradh do bheatha Dhomhnuil Munro.

R uibhse tha guth anns an dân so
 O ' luchd siubhail an fhàsaich,
 I s tha 'g imeachd 'nar tràilleann
 M ar ri sàtan na truaigh';
 H o! nach gabh sibh gu tràthail
 R is a' ghlaodh tha o'n àirde
 A nn an trócair shaor gràsmhor
 D hé tríd fàbhair an Uain;
 H -àr ro mhòr, a's creach làidir
 D huibh bidh cinnteach mur tàr sibh,
 O bhinn pheacannan gràineil,
 B ha 'gar tàladh 's gach uair,
 H -aon tha feumach an tràth 's air,
 E isdibh cuireadh na slàinte
 A gus gealladh 'na ghràdh dhuibh,
 T hogas dhàsan sibh suas.
 H o! grad theich 's thig na chódhail
 A ghabhail seilbh air a thrócair,
 D haingnich briathran a bheòil dhuibh,
 H -àmhghar mòr bhi 'teachd dlùth
 O 'n tha gealladh a' ghloire;
 M òr mu ghabhas tu coir air,
 H o! dean cabhag 's e'n t'òir ort,
 N uair tha chòmbla neo-dhùint',
 U aith' bidh do sgaradh do-bhrònach
 I meachd t-anma gu dòruinn,
 L eis gach mallachd a's dòlas
 M ar do thrócair nach lùb,
 U ! bidh do leir-sgrìos gu'n dòchas,
 N i gu'n fheum bidh do dheòir dhuit,
 R igh nan dùl dheanamh trócair
 O rt ma dheònaich a rùn.

I. M.

MARBHANN

DO

DHOMHNUL MUNRO.

Bidh cuimhn' is iomradh an còmhnuidh
Air na fireanaibh còire,
Dh-ullaich Criosd 'na thròcair
A' chùm na glòire tha shuas,
Is bidh an dàn so 'na chòmhradh,
A' cuir an céill ann an òrdugh,
Cliù is béus an deadh òglaich
Dòmhnul Munro 'na mòr-bhuadh,
A dhaingnich fianuis na chòir-san
Ann an Ios' fhad's bu bheò e,
'Sa shaoithrich dian ann an còmhrag,
Air taobh a' ghildir' fad a chuairt'
Fo àrd-bhrataich na mòrachd,
'Sna ghabh e dìon ann an dòchas

Fo'n ghabh e fasgadh an còmhnuidh
 'Sa bha 'ga chòmhdach mu'n cuairt.
 'S aobhar iùndrain 'san uair's thu
 Do mhòr àireamh mu'n cuairt duit,
 A rinn thu fhàgail nan truaghain
 Fo thròm smuairin a'd' dhéigh,
 Na lìonas t'àite cha d'fhuair iad
 Ann an gibhtean 'sam buadhan :
 Leis gach tiodhlaca luachmhor
 A thàinig 'nuas ort o néamh,
 'S mar rinn gràs an ath-nuadhaich
 Anns gach pàirt thu cho buadhach :
 'S ni ro àrd e r'a luaidh dhomh,
 Gu a chuir 'san uair so an céill ;
 'S gu'n mo chomas ach suarach,
 Gus do theist thogail suas leam,
 'S gun mo chliù-s' ort ach luatha
 G'a cur air snuadh do ghlan-sgéimh.

Fhuaradh creidimh o Dhia leat
 Air an ìobairt choimhlionta,
 Dhaingnich còir tha neo-chrìochnach
 Dhuit gu sìorruidh 'na shìth,
 Fhuair thu'n Spiorad mar thiodhlac
 A rinn do bhuadhan a riaghladh,
 Chum an cleachdadh 'na rian-san
 A rinn do lìonadh le 'ghaol :

Ghineadh clann ann an Criosd leat,
 Air do bhrollach chuir cìochan
 Chum an altrom mar chìochrain,
 Le bainne fìorghlan gu'n ghaoid,
 Lag a's làidir 's am meudachd,
 A réir am fàis anns an diadhachd,
 Mar stiùbhard glic rinn thu'm biadhadh
 Oir bha'n fhialachd dhoibh saor.

Bha thu 'd'fhìrean treun buadhach
 Air carraig slàinte do-ghluaiste;
 Bu shaighdeir dìleas bha stuam' thu
 Gu treun tòirt buaidh air feachd nàmh
 Gidheadh mar naomh fad do chuairte,
 Anns an t-saoghal cha d'fhuaradh
 Aite fuirich bhiodh buan leat,
 Gu gabhail suaimhneis no taimh,
 Chum thu agad na fhuair thu
 'Sna h-uile ceum anns na ghluais thu,
 'S tù coiseachd teann le dian luas-ruith
 A chum na duais 'bha gu h-àrd,
 'S ge d' bha do naimhdean mu'n cruairt duit
 A' cur nan' geimhlean gu cruaidh ort,
 Do dhlighe Chrìosd t-fhear còir-fuasg-laidh
 Cha d'fhuair an diabhl uat càil.

Bha do bhuadhairean nàdur'
 O's ceann mhórain 'nar là-ne,

Farsuing fosgailt' am pàirtibh
 Mar thaisgeach làn bha do chridh' :
 'S tu gabhail beachd air mhodh àraid
 Air gliòr a's mòrachd an àrd-rìgh,
 Air oibre cruthaichte a làmh-san
 'San doimhne, air làr, 's os do cheann,
 'S do fhradharc sùl ge do dh'fhàg thu
 Ri aimsir t-òige 'nad phàisde,
 Fhuair thu dùbladh na àite
 Gu d' ùngadh, slàinte an Rìgh,
 Och mo bhròn 's m'aobhar nàire
 Ge d' tha mi mealtuinn mo dhà shùl,
 Nach robh mi faicinn mar bha thu
 Ri faicinn 's iad ort a dhìth.

Leis mar lìonadh o'n àird' thu
 Leis gach tiodlaca gràsmhor,
 A chur rian air do phàirtibh
 A' theagasg chàich air gach àm
 Le faire dìonaidh bu ghnàth leat
 Bhi cur an céill dha do chàirdean,
 Gach inneal gleusaidh bha'n nàmhaid
 A' cur an àird' gus an call,
 'S tù faicinn cuilbheartan shàtain
 A' sgrios na'm mìltean gu'n tearnadh
 Bha t'anam fireanta cràiteach
 'S do chridhe 'ga fhàsgadh 'gu teann
 'S a thaobh mar ghleusadh le gràs thu

'S le beò eud chum an slàinte,
 'S tric a dh'eubh thu nach b'fheaird iad
 Luchd-teagaisg fàs nam balg mall.

Is aobhar nàire do mhòran
 A shealbhaich tàlannan mòra,
 'Sa thogadh suas ann am foghlum
 Fo ainm bhi beò 's iad fo'n bhàs,
 Nach d' ruith a' choi-lige còmhladh
 A chumail coiseachd 'san ròd ruit,
 A ghlac an crann na do dhòrnaibh,
 'S nach d' sheall ri d' bheò air do shàil
 O nach do bhris iad na còrdaibh,
 A cheangail teann ris an fheòil iad
 A dh'fhàg neo-fheumail 'nan lò iad,
 Gu sliochd thoirt beò a' chum fàis,
 Is nach robh 'n anmaibh an còmhnuidh
 Fo chumhachd teagaisg am beòil duibh,
 A dh'fhàgadh éifeachdach beòthail
 E 'shluagh ro'-òrduicht' saor ghràis.

Is mar a lionadh le eud thu
 Mar shearraig nuadh bhiodh gu reubadh,
 Air taobh aobhar an Léigh sin,
 A leighis creuchdan do chridh' .
 Thogadh fianuis gu treun leat,
 An aghaidh teagaisg 's mi-bhéusan
 Chinn-iùil nan dall bha gun léir-sinn,
 'S nan naimhdean geur a bh'aig Ios'

Mar bacadh trôcair Mhic Dhé iad,
 Rinn thu dhearbhadh 'sa shéuladh
 Air dhoibh bhi trom fo'n an-aoibhinn
 Gur sgrios-léir dhoibh bu chrìoch,
 'S cha b'ann a mhàin le do bheul
 A rinn thu 'chaismeachd sin éigheach,
 'S do bheatha sìr chur an céill doibh
 Gu'm b'aon bha ceusd thu le Criosd.

'S ni bha ghnàth 'ga' do leònadh
 Bhi faicinn rian an luchd-treòraich,
 An aghaidh 'n teagaisg 's an eòlais
 Air reachdaibh glòrmhor 'n àrd-rìgh,
 'Sa toirt dearbhaidhean mòr air,
 A' chliù th'air gràsan Iehobhah
 'S an gnàth toirt fianuis 'sa còmhach,
 Nach b'ionann beòil doibh is cridh' ;
 Freunh gach uile bhi fo'n chleòca
 Gaol an airgiod bu mhò leo,
 Mar shaibhreas 's buannachd a b'òirdheire
 Na masladh 's bròn fo chuing Chrìosd,
 'San cleachdadh féin air an dòigh sin
 'Se toirt na bréige da'n còmhradh,
 'Sa mhuinntir eudmhor an còmhnuidh
 Fo lotaibh mòra da'n trìd.

bha dìomhanas sgrìobhta
 shealladh gach aon uair,

Air gach ni bh'anns an t-saoghal
 De'n d'rinneadh ìodhail do mheall,
 A's ann bhiodh t'anam fo ìoghnadh
 Ag amharc nitheanaibh tìmeil,
 'S tu faicinn làmh fir do ghaoil annt'
 O ! b'e do shìochaint gach àm
 Bhiodh tu sealbhachadh mìlseachd,
 Anns an tròcair a' b'ìsle
 'S ann a mheasadh a prìs leat,
 'Se luach na h-ìobairt a bh'ann
 'S ged bu gheall-daingnich iad daonnan
 Dhuit-s' air lànachd t'Fhir-saoraidh
 Timchioll-ghearrta bha do chridh' leo,
 Gu dlùth air Criosd o's do cheann.

'Nuair bu dlùith' bhiodh do chòmhradh
 Air nithe talmhaidh no feòlmhor,
 Bha 'n earail naomh a thug Pòl dhuit
 An cleachdadh beò na do chridh,
 Bhiodh do chainnt an deadh òrdugh
 Fo bhlas ùr-labhraidh an còmhnuidh,
 Le salann gràis a chum fòghluim
 'S cha b'ann gu counspaid no strì,
 Bhiodh t-inntinn shuas ris a' ghloir sin
 Air 'n do dhaingnicheadh còir dhuit ;
 Lìont' le iongantas sòlais
 'S tu 'mealtuinn dòchais làn-chinnt,

Air na beannachdan mòra
 Tha'n co-cheangal siorruidh na tròcair,
 Tre'n mheasadh tìm leat ro òirdheire
 Ach air mhodh sònraicht' ro fhacail.

Ge d' mheasadh aimsir diom-buan leat
 Mheasadh tìm leat ro luachmhor,
 A chleachdadh dìchioll a's cruadail
 Air taobh an Uain fad do là,
 Do shiochaint féin 'dheanamh suas ris
 Cha b'e a mhàin bh'ort mar uallach,
 Ach anmaibh gbràsmhòr a shluagh-san
 A thogail suas dha do ghnàth,
 'S o'n ghabh thu chuing air do ghuailibh
 Gu dol tre dheuchainnean cruaidhe
 B'e do chrìoch mar fhear-cuairte,
 Do thoradh suas a bhi fàs
 'S do shùil a ghnàth togt a suas ris,
 An dùil ri gràs an àrd-bhuachaill'
 A chum do shaothair 'bhi buadhach,
 Gu anmaibh truagh 'thoirt gu slàint'.

Bha thu truacanta bàigheil
 Ris na braighdean bu tràilleil',
 A bhà 'nan ciomaich aig Sàtan
 'Gan cumail làidir fo dhaors',
 'S t'innidh thròcair làn gràdh dhoibh
 Ge d' b'iad do naimhdean 's t'eascàirdean

B'e t'fhìor dhùrac tre ghràs doibh
 Gu sealbhaicht' slàint' leo gach aon
 A thaobh du chaoimhneis do'd' chàirdean
 A bha tre Chrìosd duit na'm bràithrean,
 'S ann bha do mhaoth-chridh' gu làthail
 Cur thairis làn doibh le gaol,
 'S tu giùlan ìomhaidh an t'Slànuighear
 Anns gach buaidh agus pàirt dhìot,
 'S mòr a chite 'na d'fhàiltibh
 Dheth 'naomhachd àluinn ro chaomh.

Fhuair thu neart 'na do ghàirdean
 Gu bhì gleachd ann an tàbhachd,
 Fo na h-airm nach do dh'fhailnich
 Rinn treun thu 's làidir fo d' cheann,
 A chaidh a mach 's gach cruaidh chàs leat
 An aghaidh armailt an nàmhaid
 Air 'n tugadh buaidh fad do là leat,
 Ge d' bha e ghnàth ort an geall
 Ach fo cheannard do shlàinte
 Bhrùth do naimhdean fo d' shàiltibh
 Is chuir thu'n ruaig anns gach blàr orr',
 'S do chlàidheamh sàith' annt gu teann
 Bhiodh amhladh mòr air feachd Shàtain,
 Ag éisdeachd gleusaidh do chlàrsaich,
 Is t'ìollach fhuaimneach buaidh-làraich,
 'N uair bhiodh an àire 'ua do chàmp.

'S mar bha t'anmhuinneachd làthail
 A' cur feum air ùr ghràs leat,
 B'e do bheus bhi fein-àicheil
 Cia cho àrd 's bhiodh do bhuaidh,
 'S faire shònraicht' a ghnàth ort
 Nach deanta dìmeas no tàire,
 An cor iosal air gràs leat
 Ach g'a àrdachadh suas :
 Cha b'ann le lòchran a mhàin
 A dh'imich Dòmhuill tre'n fhàsach,
 Ach ola an còmhnuidh o'n lànachd
 Nach do thràigh fad do chuairt,
 Tre fhéin-fhiosrachadh gràsmhòr
 'S tric a theagaisg thu chàch e,
 Nach b'ann uatha féin a bh'an slàinte
 Ach tre fheartaibh blàth fuil an Uain.
 Do sholus naomh rinn thu leanmhuinn
 Le cogais mhaoth agus anmhunn,
 Is t-inntin chaomh cho neo-mharbhan't
 O's ceann na talmhuinn do ghnàth,
 Fhuair thu'n saoghal na chealgair
 Le bhrionnal baoth cho neo-earbsach,
 'S gun chuir thu thaobh e le 'shalchar
 Mar phlaosgaibh falamha gun stàth,
 Bu ghaisgeach treun thu 'bha calma
 An aghaidh séisdeadh nan garbh-chath,
 'S tu air do ghleusadh fo t-armachd
 Uchd-éididh 's ceann-bheairt na slàint',

Gach ni bh'an déigh air sgrios t'anma
 Rinn thu cheusadh 's a mharbhadh,
 Is chlaoidh thu'n fhéin toirt beul balbh dhi
 Gu'n chomas labhraidh ach gràs.

Bha do bhuadhaibh 's do ghràsaibh
 A' co-chòrdadh gun fhàillinn,
 Ged bha'n fheòil 's a gath sàithte
 Le teachdair Shàtain a'd dhéigh,
 B'fhior fhear-leannmhuinn air Paul thu
 Fad do chuairte tre'n fhàsach,
 'Giùlan uallach an àlaich
 Is cùram gnàthaicht' an treud,
 Bha'n ro-chùram-san làthail
 A' luidhe dlùth riut mu t-àirnibh,
 Is eallach trôm aig cathair-gràis ort
 Far 'm bu ghnàth leat bhi treun,
 'San Spiorad uchdmhacaich o'n àird ort
 Aig éigheach suas ri d' naomh Abba,
 Gu'n cumta suas iad 's gach gàbhadh
 A chum's nach tàrladh dhoibh beud.

Thugadh gliocas a's ciall duit
 A ghlacadh shionnach chum dìonaidh,
 Dearcan ôg nan crann-fiona
 Mu'n rachadh 'n crìonadh 's iad maoth,
 Bha do phuincibh cho fìor-ghlan
 'S cho geur-rannsachail dìomhair,

'S nach tugta fasgadh do shìon leat
 A bhacadh diadhachd le daors' ;
 Is t'fhaicill dlùth mar an ceudna
 Nach mùchte gràs cia cho ìosal,
 A dh'fhaodadh Sàtan le liontaibh
 A chumail shìos fo chruth gaoid,
 Ach 'cumail taic' ris le dian-spairn
 An aghaidh innleachd an diabhuil,
 'S an t-ionmhas làn bha o Dhia dhuit
 Cuir buil air t'iarrtuis gu saor.

'N uair dh'fhosgladh suas duit gu fialaidh
 Stòr na'm beannachdan siorruidh,
 'S a rinneadh stiùbhard le Dia dhìot
 A chum a riaghladh gu saor,
 Bhiodh pailteas lóin do na cìocraich
 Is uisge beò do na h-ìotmhoir,
 'S do na leòntaibh sàr-iocshlaint
 A ghlanadh iorbhail gach gaoid,
 Gach soitheach falamh bhiod lionta
 Dheth'n ola a' dhioladh na fiachan,
 'S cha bhìoch aon diubh nach riaracht'
 A nuas bho lìontachd na maoin
 Oir bha'n t-ionmhas ud siorruidh,
 Is creidimh 'gabhail coimhlionaidh
 Air na geall'aibh ion-mhiannuicht' ;
 A cuan neo-chrìochnuicht' a ghaoil.

Gheibheadh lomnochdaich éideadh
 Is balbhain fosgladh am béil ann,
 'S lotan chridheachan réubta
 Leigheas chreuchdan is leòn,
 A 'neach bha caillte bhiodh deadh-sgeul air
 Is gheibheadh anmhuinneachd tréine,
 'Sa neach bha'n dorchadas léirsinn
 Is laigse an euslaintich treòir
 Is luibhre a' glanadh o 'bréine,
 'S gach cneidh-ghalair no eucail
 Is uisgibh Iordain làn éifeachd,
 Gu'n toirt gu sgéimh mar bu chóir,
 Dh'fhàs Abana neo-spéiseil
 'S fhuaradh Parphur gun fheum dhoibh
 Buailt' le plàighean na h-Eiphit,
 'S a n uillt nach faoidte leò an ól.

'S an uair a shileadh an driùchd ort
 Bu treun an gleachdair thu 'g urnuigh,
 'S do chridh' teth cho maoth-bhrùite
 'S tu tagradh dlùth trid an Uain,
 T'innidh ghràidh an geur-dhùrachd
 Fo fhrasaibh blàth nan gràs ùraich,
 A' mealtunn làthaireachd a' ghnùise
 Is deatach tùise a' dol suas,
 B'fheairde neart na caol-sùmud' sin
 Is b'fheairde taic na cuile bhrùite,

Toradh blà t'lobairt-chùbhraidh
 Dheth 'n ola ùngaidh a nuas
 Gheibheadh doill an sabh-shùl ann
 Is bacaich leumnaich gu sunntach,
 S rach' òighean cadail o dhùsal
 Is mairbh a' dhùsgadh o'n suain.

Leis cho éolach sa dh'fhàs thu
 Air fear-casaid nam bràithrean,
 Tha ri foireigneachd an àlaich
 'S gan toirt a ghnàth leis a thaoibh,
 Bha do mhaoth-chridh' cho bàigheil
 'S gu'n rach' tu sios air a sgàthsan,
 Do'n doimhne g'an tearnadh
 'San toirt o mhàig an droch aoin,
 'Ga leantuinn fein air an sàiltibh
 A chum 'nam baideal a b'àirde,
 Do chruth chosamhlachd Shàtain
 Ri obair gràis anns na naoimh,
 Is cùram mòr ort mu'n tàrladh
 Le Prionnsa Thiruis an àrdain,
 Gu'n sgriosta a h-aon diubh le bàs
 An neo-thimchioll-ghearrt ann an cridh.

Nuar ghairmeadh t'anam do'n t-suaimhneas,
 Dh'ullaich àrd-rìgh nam buadh dhuit
 Bu ghoirt cràiteach an sluagh sin,
 A bha mu'n cuairt ort a ghnàth

Bu fhrasach deòir air an gruaidhean,
 'San cridhe leòinte fo chruaidh-chàs
 Do thigh bu Bhòchim e'n uair sin,
 Le gal nan truaghan thu dh'fhàg,
 'S cha b'ioghnadh mor ged bu chruaidhe,
 Air fuil 's air feòil do thoirt uatha
 Sàr oid'-altrum cho luachmhor
 A thogail suas uath' cho tràth,
 'S ge d' b'aobhar bhròin e cho luath leò
 'Sa chaill iad comunn an uasail,
 Bha caoimhneil carthannoch truasail
 S' an anmaibh fuaighte ruit an gràdh.

Bha thu'd chobhair gu fuasgladh
 Air na bochdan fo thuairgneadh,
 Bhiodh aig osnaich fo smuairin
 Fo thuinn 's mi-shuaimhneas an sàs,
 B'iuchair-fhosglaidh bha buadhach
 Air cor nan dedraidh 's nan truaghan
 A bhiodh le Sàtan g'am buaireadh
 'S 'gan cur 's gach uair fo chruaidh-chàs
 Is iomadh eire a's uallach
 A bhiodh ro throm air an guailnibh,
 O'n d'fhuacadh saors' iomadh uair leò
 'N uair ghlaoidhte suas leat nan ainm,
 Sa spealgta an cuibhreach gu luath dhiù
 Fo ghiallaibh bàis bhidh làn-bhuaidh ac

'S bhiadh cliù saor ghràis a dol suas leò
 Chum gloir àrd-bhuachaill an slàinte.

Nuair thigeadh 'n làn sin a nuas ort
 Gheibheadh peacaich iom'-ruaigte,
 Fo dhìteadh cogais 's làn uamhais
 'S fo throm uallach a's sgìth,
 Fois do'n inntinn thonn-luaisgte
 Saorsa o gheimhlichibh cruaidhe,
 'San Spiorad naomh gu'treun buadhach
 'Gan toirt gu suaimhneas le sìth,
 'San crìdhe rèit bha fo'n fhua r-dhealt
 Thigeadh beò le crith-ghluasad,
 Is anail bheòil Rìgh nan sluagh ort
 A' teachd a nuas mar threun ghaoith,
 'S am fear bu treise 'se 'n uachdar
 Is creach an t-Sàtain ga fuasgladh,
 'S bhiodh ceòl do ghàirdeach ais fuaimneach.
 Toirt sgrios air cluain an droch-aoin.

Fhuair thu gealladh ro àraidh
 A choimhlionadh a'd' là dhuit,
 Clann do chloinne fo àrach
 An t-soisgeil ghràsmpoir ri d' linn,
 Rìgh nan uamhas 'nuair thàinig
 Cha d' chuir e fuathas no sgàth ort,
 Cha robh gath anns a' bhàs dhuit
 Ach gairm o àmhghar gu sìth,

Thàinig samhradh an àigh ort
 Theich gach duibhre agus sgàile,
 'S cha tig oidhche gu bràch òrt
 Do sholus làn bidh a chaoidh,
 Dh' fhàg thu Senir 's Amana
 'S gach leòmhan's béisd a bha tàmh annt
 Do bheinn a mhirr is tùis aloes
 Thug Aingle thu'n làthair an Rìgh.

'S ged tha do chomhar air f halmh' cha'
 Shìos fo fhòidean na talmhuinn,
 Tha t-fhianuis beò gu bith-labhraidh
 Ris na h-aingidh 'san t-saoghal,
 'S mar tig gràs orr' ri aimsir
 'Gan toirt beò tre'n ath-ghineamhuinn
 Chi iad Domhul ge d d' h'f halbh e,
 A' teachd an armailt nan naomh
 A nuas o nèamh chum a dhearbhadh,
 Nach breug no sgleò bha na shean' chas
 'Sa chur Amen ri binn-damnaidh,
 An dream a dhearmaid an saors',
 A dhionnsuidh léir-sgrìos d'an anmaibh
 Gu ifrinn-theinteach g'an tearbadh,
 Gu cuan neo-chrìochuach gu'n tean' cas
 Do dh'ionmhas feirge nach tràigh.

'S sin an t-àit am bi a ghairstinn
 Anns na lasraichean feirge,

Is gath na cogais g'an teirbheart
 'S Deimhnibh foiréigneach g'an cràdh,
 'N àmhunn-ghoilteach is deirge,
 Is tonn air thonn a sìor ghairm dhoibh
 Air peanas peacaidh ni's gairge,
 'Sa dol an gairbhead gach tràth
 O'n chuir iad cùl ri san tairgse,
 Bidh teas na fùrneis nis seirbhe
 'Sa deatach smùidreach bidh doirbh dhoibh
 Gun dùil ri teanacas gu bràth,
 'S ma mheas iad Domhul air mhearachainn
 'Nuair chuir e'n céill doibh an amaladh,
 Innsidh siorruidheachd d'an anamaibh
 Gu'r iad gu dearbh' a bha baoth.

Ach'n àm bhi tional an iarmaid
 A ghineadh l'esan an Criosda,
 Na shaothair-ghràidh anns an fhionlios
 Tre fheartaibh siol-chur nan gràs,
 'Sa théid an gairm-san gu fialaidh
 G'an togail suas anns na neulaibh
 An còdhail àrd-rìgh na sìochaint
 An culaidh chiataich gun sal,
 'Sa sheasas Domhul 'na fhianuis
 Air ceann a shliochd nan cruth-fiorghlan
 Na thrusgan maiseach geal sgiamhach,
 Le gnùis gun fhiamh ach gean-gràidh

'San Glaodh e'n àird le beul lìonta,
 Feuch mis' sa chlann 'thug Dia dhomh
 A' mhealtuinn sòlais ion-mhiannuicht',
 An tobair shiorruidh nach tràigh,

O'n fhuair iad fois ann an Criosda
 Le'n chuir iad dòchas 'na ìobairt
 Tre chreidimh beò air fuil phrìscil,
 Bhiodh dhoibh mar ioc-slàint' an slàint'
 Air dhoibh bhi 'g osnaich gu h-ìosal,
 Bha corp a bhàis dhoibh na Phrìosan
 'S ge d bha gleachd ris na phian doibh
 Bha suaimhneas sior'uidh do'n ghràdh,
 B'e sud an sòlas a lion iad
 An dùil an còmhnuidh làn mhiann air,
 'S nuair thig cò-làmh an triall dhoibh
 'S iad làn choimhlionta na làthair,
 Bithidh aobhar glòraich air Dia ac'
 Feadh linn nan linntibh gu shiorruidh,
 Gu'n ghairmeadh Domhul g'an spionadh
 A mach a liontan a bhàis.

Ach tha thu nis anns na nêamhan
 Le d chlàrsaich òir air ùr-ghleusadh,
 'S cha lagaich fuaime a cuid téudan
 O sheinn laoidh éibhinn an Uain,
 Cha chuir sruth Bhabiloin éis ort
 O sheinn air gloir nan làithean réite,

Chrìochnuich bròn bùthaibh Chédair,
 'S cha'n i tìr Mhesech do chuairt,
 Ach ionad còmhnuidh an Dé sin
 A rinn le 'ghlòir do làn-éideadh,
 Cha tig sgledè air do leirsinn
 'S cha'n fhaicear deur air do ghruaidh,
 Is gearain cràiteach fo dheuchainn
 Cha tig gu bràch o do bheul ann,
 Ach sonas lànachd nach tréig thu
 Le Aingle treun ort mu'n cuairt.

'S neo-fhoirfeachd an tràthsa
 Tha mar easbhuidh a mhàin ort,
 Nach robb Diomhair an t-Slànuighear
 'Na iomlàineachd leat shuas,
 Ach 'na àm thig an là sin
 'S nach bi easbhuidh no fàilinn,
 Air bhùill-eàn dheth lànachd
 Nuair thig an t'àrd-Rìgh a nuas,
 Bìdh an cuirp mar ghlaine a' dearsadh
 Air a ghlanadh 'san àmhuinn,
 'Sa'n loisgear suas na h-eas-càirdean
 Le'n d'rinneadh tàir air an Uan,
 'S bìdh an anma geal a sìr dhealradh
 'San com cho cuimte san aon nàdur,
 An aonachd ghlòrmhor ro àluinn
 Nach sgar am bàs gu bith-bhuan.

Ach tha sinne air ar fàgail
 As do dhéigh anns an fhasach,
 A dol fo bhròn tre ghleann-Bhàca
 'Sa Dhé bi ghnàth air ar stiùir,
 'S lion do thobraichean làn dhuinn
 Slochdaibh dìonach neo-thràighte,
 'S thor dhuinn ciochan bhios slàinteil
 Mu'n téid sinn bàs leis a ghrùid,
 Thoir sinn beò le t'ùr-ghrasaibh
 'S daingnich còir dhuinn na t'f hàbhar,
 'S ullaich lòn dhuinn g'ar n'àrach
 'S bi féin a ghnàth aig ar bùird
 Thoir dhinn innealaibh-tàir'nidh
 A chum gu'n deòthlair ar sàth leinn,
 Do ionmhas sòlais na lànachd
 Tha'n cliabh an t-Slànuighear chiuin.

Cum bho dhion o na tairbh sinn
 Oir tha'n bùireich a' seirm ruinn,
 'S dìon fo'd sgàil sinn o ghairbhinn
 Droch cuideachd choirbte a mhi-rùin,
 Dean ro chinnteach do ghairm dhuinn
 Sgeaduich dìongmhalt' fo t-airm sinn,
 'S dean dhinn saighdearan eirmseach
 Is aimsir dhoirbh oirnn teachd dlùth,
 Dìon o chlosaich a' mhairbh sinn
 'S dìon o thrombaid na foirm sinn,

Na biodh t'fhacal gun tairbhe
Ach ro shoirbheasach dhuinn
Na fàg air cladach na failbh' sinn
Thoir fo sgàil nan craobh-pailme sinn,
'S bi na d' dhìon o gach stoirm dhuinn
Is neul na feirge o's ar ceann.

AM MELLENIUM.



AM MELLINIUM.

I.

A CHOISICHE bi treun,
Ged, tha geur airc ort,
Chionn mar chasaibh éild,
Nach robh do cheum farsuing,
'S mór an comhar' slàint'
Ciocras bhi 'sa chàil ;
'S Ioseph cho làn bàigh ;
Gu sàsachadh t'acrais :
Rach an sàs ann 's tagair ;
'S cuir na làthair na th' agad
'S feuch nach ceil thu càil
Glaoidh gu h-àrd is abair :—

II.

Tha mi tùrsach tinn
 Tha mi sgith dochart,
 'S ceangal air mo bhuill
 'S cha dean mi coiseachd ;
 Mallachd feadh gach linn
 Air na h-vile a mhill :
 M' anam 's mi gun chlàth
 'S mi ri sìor osnaich,
 Thug iad spuill is creach dhìom
 'S dh' fhàg iad mi làn airtneil,
 Thi thuirt 's leòir mo ghràs
 Thoir mi 'n àird' tharta.

III.

Thug e sud dhuit sgrìobht
 Ann an trì facail,
 Thusa gràs IS MI ;
 Beatha 's brìgh à cho-cheangail,
 Fhireantachd a chaoidh
 Do chùl-taic' 's do shìth,
 Chuir do nàmh fo chìs
 Bheir lùs crì a's chas dhuit,
 Thug thar Shàtain feachd dhuit
 Bhrùth fo shàil le neart e,
 'N aghaidh thuiltean bàis
 Thog e'n àirde bratach.

IV.

Ged tha fuil as feòil,
 Ri gràs beò a' gleachdadh,
 Tric 'gad' chur fo bhròn
 Dh'fhàg thu leòint as meata ;
 Ni a chumhachd mòr
 T'anmhuinneachd gun treòir,
 Chumail suas ri d' bhed
 Bho gach sgleò as seachran,
 'S gheibh thu lòn o 'fhacal
 Fad do chuairt as t'astair,
 Gu'n ruig thu fadheòidh,
 A chum glòire dhachaidh.

V.

Biodh do chreidimh làidir
 'S gu bràch na fannaich,
 Buainidh tu mar fàilnich thu,
 Sud an gealladh
 Cùm agad na thàrr thu,
 'S dean féum aig cathair gràis de
 'S thig ort a nuas o'n àird' ;
 Ni's feàirde t'anam
 Biodh t'ùrnuigh 's do ghearan,
 An càraid ri faire
 'S an co-pàirt ri gràdh ;
 Do'n t-Slànuighear bheannuicht.

VI.

Na biodh geilt no sgàth ort
 Gu dol dha'n goire,
 'S e Bòas t'fhear-dàimh
 'S tù thréubh Elimelich ;
 Se bheir dhuit corran fiachlach
 Gu dlòghaibh 'leagadh sìos leis,
 Gu beathachaidh luchd-dioghluim
 Nan diasan foghair,
 'S éigin dhuit do ghreimibh
 'Sau fhion-ghéur a thumadh,
 Ni bhios dhuit ro-fhéumail
 Gu géurachaidh do ghoile.

VII.

Cha ruig thu leas bhi diùid,
 'S dlùth dhuit e mar charaid
 'Se t' Athair e an tùs ;
 Trid na h-ùr bhreith fhallain
 T'fhear-pòsd nach cuir riut cùl.,
 T'fhear-tagraidh sa chùirt
 'S dàna a dh'fhaodas tù,
 Del dh'ionnsuidh na cathrach
 'Se do bhràthair barraicht' ;
 T'urraas lài lir daingean
 'S do bhreitheamh nach dìt
 'Thu chaoidh le binn-sgaraidh.

VIII.

O'n thug e dhuit e fein
 Gu léir leis gach beannachd,
 Air talamh 's air neamh
 Air son cré as anam ;
 Ciod bhios ort mar éis
 'S e 'g ràdh riut nach trèig,
 Le focal a bhéil
 Ga shéulachadh daingean,
 Bheir creidimh e ceangailt'
 Ann am bàntaibh geallaidh,
 Gu sheòmhraichibh féin,
 'S cuiridh 'n fhéisd ud gean ort.

IX.

'S bu niarachd dream d'an gràdh e
 Mar chéile falaicht',
 Dh'fhaodas dol 'na làthair
 Le dànachd' anam,
 Ag imeachd tre'n fhàsaich
 An taice ri threun-ghairdean
 'S e dh'fhuasglas as gach càs iad
 A thig na'n caraibh,
 Ge nàr leis 'n aobhar ghearain
 Ni do chàch nach aithne
 Bheir e pòg le failt dhoibh ;
 'S bidh boladh gràis d'a anail.

X.

'S truagh nach robh mo ghràdh
 Anns an ionad fhalaicht';
 Lìnnigte rim' àirnibh
 'Sa tàmh 'nam anam,
 Gu peacadh mo nàduir
 'S gach gaoid a ta na plàigh dho'
 A dh'fhàg gu tinn fo chàdh mi,
 Làn àmhghair 's carraid,
 Uam an tiomchioll-ghearradh
 'S m'aonachd ris a' ceangal ;
 Spiorad naomh nan gràs
 Bhi 'gam 'àiteachadh air talamh.

XI.

O ! nach ann tha'n drùidheachd
 Air daoine dalla,
 Nach sealladh 'na aodann
 Gu gabhail aithn air,
 Fàgaidh sud fo dhaors' iad
 Mar bhruid aig dia an t-sao'il,
 Ged ghairmeir iad gu saorsa
 Chàidh daor a cheannach ;
 'S uamhasach an sealladh
 Uaith 'n uair théid an sgaradh,
 Dh'ionnsuidh léir-sgrìos siorrui'
 O chomunn Dhia 's nan aingeal.

XII.

'S uamhassach gu siorruidh
A bhios am peanas,
Ann an t-slochd gun iochdar
A' gul 's a' gearan,
'Sa giosganaich fhiacal
Gn bràch a measg nan diabhol,
Gun fhuasgladh on géur-phiantan
A bhios do-labhairt ;
Teine ifrinn 'na lasair
'San cogais gan agairt,
'S fad linntibh nan saoghal,
Cha'n fhaod iad teachd a mach as.

XIII.

O ! nach gabh sibh iompaidh
Le cùram anam,
'S am bàs a' tighin dlùth dhuibh
Mar dean sibh cabhag,
Fhad's tha ghairm nar clusaibh
Nach éisdeadh sibh gu luath ris,
'Sa thrócair cho làn truais dhuibh
Tha buan is maireann
'S leaghaidh 'ghaol 'tha tairis,
Cridh' tha cruaidh mar charraig
Thugadh buaidh air sluagh leis,
A bha cho truagh ruibh cheana.

XIV.

'S iongantach an spéis
Thug Mac Dhe da leannan,
Chuir a gaol e 'n éigin
Gn teachd g'a ceannach ;
Nuair dh'fhàg e glòir na neamhan
Do phiantan ifrinn léum e,
Ni dhóirt mar thuil gu géur air
'S gu léir a mallachd,
Chùm an réite a cheangal
Pòsd ris fein gu daingean,
'S cha'n ioghnadh a h-aoibhneas
Bhi saibhir aig a bhainis.

XV.

Cha b'e 'cuid maoin no saibhreis
A thug a thlachd dhì,
Cha b'e h-inbh no h-oighreachd
No loinn a pearsa,
Cha b'e dreach a h-eudainn
No'n teist 'bha air a béusaibh,
As cha b'e cliù a céille
No sgéimh a maise,
Ach gràdh 'bha do cheannuicht,
Nach cualas a shamhuil,
Thaobh a dhoimhne is àird',
Cridhe nàdurr cha ghabh aithn air.

XVI.

'S gràdh os ceann gach cainnte
A bh'ann gu beachdaidh,
Cha ruig eòlas ainglean
Air dol a steach ann,
Gaol siorruidh bha do-rannsaicht
Neo-chrìochnuicht gun cheann air,
A ràinig air na h-aingidh
'Nam braighdibh peacach ;
'S gràdh nach gabhadh casg e
Thug o dhaors air ais iad
Dh'ionnsuidh sith do-labhruidh,
Ri Dia 's e'n daingneach neart'or.

XVII.

Gràdh iongantach d'a-rìreadh
Thug Crìosd d'a leannan,
Fhuair e i 'na striopaich
Làn mi-chliù as sgannail ;
'N cuibhreach fo bhinn-ditidh
Na ban-mhortair sa phrìosan,
Gu'n d'leig e féin fa sgaoil i
'S bu daor dha h-anam,
Aice cha robh tochradh
'S ann 'dh'ioc e gu goirt e,
'S i gun ghràdh ach naimhdeas,
Gu'n cheannsuich e a droch-bheart.

XVIII.

'Se 'thug an gaol nach tréig e,
D'a chéile caidreach,
Ri 'glaodh rinn e éisdeachd,
'S gach éigin 's airce,
'G itealaich air sgiathaibh.
Na gaoith go toirt a déuchainn,
As lùb e fòs na neamhan,
'S air cherub mharcaich,
Dorchadas 's du-aigean,
Chnir e sios fo 'chasaibh,
'S chriothnuich sléibhte mòra
Roimh 'ghlòir nuair leig e'faicinn.

XIX.

'Nuair thainig e o Edom
Le 'chulaidh dhaithte,
'Se sgiàmhach na éideadh
Mar thréun-f hear neartmhor,
Tighin seachad le cruinn-léumaibh
Air tulaichibh a h-éuceart,
Is tarsuing le buaidh-thréubhaich
Air sléibhtibh peacaidh,
Fhuil na braonaibh frasach
Shruth troimh'n aodann mhaiseach
An t-amar fion na aonar,
Mar laoch 'nuair rinn e 'shaltairt.

XX.

Sgiamhach air na sléibhtibh
 Tha céum a chasaibh,
 Mar theachdair an deadh-sgéil
 Tha 'g éubhach caismeachd,
 An t-soisgeil da chéile
 'Bheir orra gu'm briosg léum i,
 'Sa lionas i le aoibhneas
 Nach mill àm peacadh,
 'S mòr a bhios a h-aiteas
 Sa làn mhiann ga mhealtuinn,
 Cuartaichte làn sòlais
 Na glòir 'tha aic' fo bhrataich.

XXI.

'S iongantais air neamh i
 Do réir an taisbein,
 Sgeaduicht' leis a ghréin
 Fhuair i 'u ré fo 'casaibh ;
 Ged 'bha tuil na béisde
 Ga ruagadh 's i na h-éigin,
 Ghrad shluig na talamh fein i
 Na bhéul gu h-aith-ghearr,
 'N uair bu mhò 'bha a h-airce
 'S ann bu dlùithe bha 'h-asaid,
 An dràgon cha d'thug buaidh,
 Phronn an t-Uan a chlaigean.

XXII.

Ach O ! nach sinn tha féumach
 A nis air creidimh,
 Gu'm faigh sinn sinn féin
 Leis a ghréin ud sgeaduicht ;
 Fireantachd Mhic Dhe 'bhi
 Mar thrusgan a cuir sgéimh òirnn
 A dh'f hàgadh sinn geal glé-ghlan
 Gun smal gun phreasadh,
 Na'm bu leinn an deise ud
 Ged' rinn daoine sgeig òirnn,
 Gheibhte sinn mar laochraidh,
 Os ceann an t-saoghail seasmhach.

XXIII.

Ged' tha sinn fo àmhghar
 A nis 's ro dhuilich ;
 'S luchd teagaisg gù'n ghràs
 Air teachd òirnn ga b'oil leinn,
 Tha gealladh dhuinn nach fàgair
 Fo chùing sinn aig lùc Pàtroin,
 Oir thig ar saors' o'n àirde
 Le slàint as sonas,
 Thà ar 'Buachaill gàisgeil,
 'S bheir e buaidh a mach dhuinn
 'S leis féin ar coir fuasglaidh,
 O'n daorsa chruaidh air teac òirnn.

XXIV.

'S feitheamaid gu ciallach
 A nis car tamuill,
 Gus an d'thig coimhlionadh
 Dhuinn air a ghealladh,
 'S nach bi ciéir an-diadhaidh
 Le airneart òirnn a riaghladh,
 Oir gheibh sinn fuasgladh fiorghlan
 Ri'n fhiach dhuinn fantuinn,
 Tha'n t-àm ruinn a teannadh
 Faisg air làimh le cabhaig,
 'S théid cinn-iùil na'n dall
 A mach o'r càmp a sgaradh.

XXV.

Tha sinn fann le strì
 Sgìth 's a gabhail fadachd,
 Gus am faigh sinn sìth
 Le libhrigeadh farsuing ;
 'S ar cridheachan gu miannach
 'S a plogartaich le ciocras,
 Ag iarruidh saors o'n diabhol
 'S o fhiaclaibh casgraidh,
 Fois o 'shaighdean sgaiteach
 Saors o gheimhlibh peacaidh,
 'S ar n-anma fo ghéur ìota
 O Thriath nach leag thu dealt oirn'

XXVI.

Cha do dhruid thu tròcair
Suas a'd chorruidh,
Gu'n bochdan an òtraich
A thoirt gu sonas,
'S fireantachd Iehobhah
'N uair 'shaoras e na deòiridh,
'Bha'm braighdeanas gu brònach
Tre dhortadh fhala,
Gu'n chaochladh air onair
Am firinn no'n cothrom,
Tha'n ceartas làn riaruicht'
An lagh 's a mhiann làn toilicht'.

XXVII.

Deanadh claun a chùmhnant
Sì'r ùrnuigh 's faire,
'S tagradh iad gu diùth ris
Air son a gheallaidh,
Gun chlò 'thoirt do'n sùilibh
Gu'm faic iad glòir Ierusalem ;
A sgaoileadh feadh gach dù' cha
'S na cliù air talamh,
Gus am brist a mach dhi'
Fireantachd ro unhaiseach ;
Bhios mar sholus dealrach
S a slàinte mar léus lasrach.

XXVIII.

'S gheibh a chéile a còir-bhreith
 A dheòin no a dh'ain deòin,
 Bheir an Rìgh a tòrachd
 A mach le 'lannaibh,
 Leis gach ait' a lionadh
 Le corpaibh luchd-an-riaghlaidh.
 A shàruich i gu h-ìosal
 'S bha dian gu 'casgairt ;
 Eisdidh e r' a h-athchuing
 'S theid a saors 'thoirt seachad,
 Ged' bhiodh fuil an-diadhach
 Cho àrd ri srian na'n eachaibh.

XXIX.

Tha duilleach na craoibh fhige
 Aig innse mar theachdair',
 Gu bheil samhradh sìochail
 A tighin am fagus,
 Sa'm bi glòir is rioghachd
 An t-soisgeal a craobh-sgaoileadh,
 A mach air feadh an t-saoghail
 Gu chrìochaibh farsuing,
 Cha chùm naimhdean bacadh
 No feachd Shatain casg air,
 Aig Crìosd bidh buaidh làraich
 Air raoin gach blair as bàtail.

XXX.

Bu ghlormhor a ni leam.
A bhi 'ga fhaicinn,
Air ceann a dheich miltibh
'S mi 'bhi fo bhrataich,
Le'n claidheamh air a liobhadh
'S an saighdibh le'n geur-rinnibh
'Toirt buaidh air dia an t-saoghail,
Le sgrìob 'ga chreachadh
Carbaid theine as eachaibh
Cuartachadh ar feachdiabh,
'S armaitibh do ainglibh
Mu 'r càmp mar theine lasrach.

XXXI.

'N uair théid an Ceann-armait
A mach air toiseach,
Eideir iad fo 'n armaibh
Na 'n carbaid chogaidh
Sgeaduichte le ceann-bheairt,
Le'n sgiath s le'n sleagh s le'n taraid
A naimhdean théid air bhall-chrith
Le farbhas romhpa,
'S leomhant iad na'n coslais
Uamhasach fo'n clogaid,
Cuiridh glòir an gnùise
Gèur mhùiseag air luchd-drochbheairt.

XXXII.

'S glormhor am feachd rìgh iad
 Air raoin ri'm faicinn,
 'N uair a théid gach aon diubh
 Fo'n *Regemental* ;
 Le'n claidheamb dà-fhaobhair
 Slios crioslaichte le firinn,
 'S uchd-éididh an fhior ionracais
 'S laoiach nach meata iad,
 Tha'n ceann-feadhna gaisgeil
 Air each-geal a marcachd,
 'S dileas agus fìor e
 Gu 'bhriathran thoirt gu teach dhoibh.

XXXIII.

Na làgaicheadh ar làmhnan
 A nis le gealtachd ;
 Ged' bhiodh fearg an dràgoin
 Le ràs a' lasadh :
 Ged' bhéucadh e gu làidir
 Le ainneart gu ro-dhàna,
 'S e feuchainn co na tharlas dha
 An tràth's a ghlacadh,
 'S fios dha fein gur faisg air
 Am a chur 's na glasaibh,
 'Sa'n ceanglair gu teann e
 Gu'n chomas feall a chleachdadh.

XXXIV.

Na'm faicinn e 's na geimhlibh
'S ann leam a b'ait e,
Ceangailt leis an t-slabhruidh
Sa'n t-slochd gun aigeal,
'S mo chasan a bhi stàmpadh
Air muinealaibh mo naimhde,
As m'anam a si'r dhannsa
Neo-fhann gun airtneal ;
'S Emanuel na'm beannachd
Faighinn glòir o'n talamh,
Is uil luchd-àitich
A seinn le lànachd anam.

XXXV.

Ach tha'n t'àm a luathacha'
'S cha dean e maille,
Gus am faigh sinn buaidh air
Le fuasgladh ealamh,
'S gach rìgh chuir Iosa suarrach
Sa spealg a chuing da'n guailnibh
Sa thaisbein da naomh-shluagh-san,
Géur fhuath 'bha nimheil ;
Cuiridh Triath na'm feartaibh
Sios iad na'n stòl chas dha,
'S naimhdean a chruinn-chéusaidh
Nach d'thugadh géill da f hacal.

XXXVI.

Theid prionnsachan 'chinn-làidir
 Gu tàir as masladh,
 'S uachdarain an àrdain
 Gu làr a shaltairt ;
 'S tilgear sios am Pàp'
 Le 'chuid Easbuigibh gun ghràs,
 'S fàth'n eagail gu'm bi àireamh
 Gheibh bàs gun sagairt,
 'S théid a Chléir a sgàpadh
 'S druidear beùl na'm madadh
 'S cha bhi aon a 'g èisdeachd,
 Luchd-réubainn no luchd-gadachd.

XXXVII.

'S e'nis an seathamh là dhuinn
 'S na bitheamaid làpach,
 'Dh'ullachadh do'n t-sàbaid
 'Bhios air an t-seachdamh ;
 Gu Biòbaill chur's gach càinain
 Is càinnt 'tha fo na h-àrdaibh,
 Ga'n sgaoileadh feadh gach cearnuidh
 Do'n fhàsach thartmhor,
 Chùm tre ghràs an fhacail
 'S le éud blà na'n teachdair,
 Gu 'm bi rùm is àite
 Do'n làn a ta ri teachd oirnn.

XXXVIII.

Tha mìle na sàmhchair
A nis air teachd oirnn,
Iubile na slàinte
Ri tighin am faisg oirnn,
Sa'm bi glòir an Ard-Rìgh
A' còmhachadh gach ceàrnuidh,
'S a lionadh gach tìr fhàsail
A bha gu'n tàisbean,
'S lionaidh gràsaibh pailte
'N cridh' le gradh ro làiste,
A' séinn gu binn 'nan dànnasadh
Air cliù saor-ghràis le h-aiteas.

XXXIX.

'S théid gach cridhe bha calma
Gu dealbh gach droch-bheairt,
A sgoltadh na sgealbaibh
Gu'n anma a chòsnadh,
'S leaghair iad le aithreachas
'S le gaol do'n Uan a mharbhadh
A dhòirt dhoibh fhuil gu'n teancadh
O'n fhearg bha goirt dha,
'S cuiridh e gu sòcair
Ioc-shlàinte ri'n lotaibh,
'Ghlanas iad o'n salchar
A bha ro shearbh r'a nochdadh.

XL.

'S cha bhi sànnut no farinad
Nach d'théid a dhochann,
'S cha chluinnear fear-feargach
A bhios ri trodan ;
'S théid an fhéin na balbhan
'S cha'n éisdear ra cuid ana-glòir,
Oir gheibh i buille mharbhtach
Bheir searg is clos orr',
'S théid gach àrdan 's sodal
Suas le tair a chrochadh,
Sgriosar gaoid gach an-meinn
As cealg théid a troimh-lotath.

XLI.

'S bidh bilean na'm balbhan
An sin ga'm fosgladh,
'S le'n teangaibh binn labhrar
Gu'n cheilg na'm focail ;
'Ni gach aon diubh searmoin
Le spiorad na h-ath-ghineamhuinn,
Le'n dùisgear suas na marbhaibh
'Bha seargt' air grodadh,
Eiridh bacaich bhochda
'S crioplaich air an cosaibh,
'S léumaidh iad le aoibhneas
Ri fuaim ro bhinn an t-soisgeil.

XLII.

'N uair chluicheas na leanbaibh
 Ri toll na nathrach,
 Bidh gach aon diubh 'sealbhachadh
 Dearbh-bheachd anam,
 Ban-rìghrean làn oircheis
 Aig altrom clann ath-ghineamhuinn,
 'S gach rìgh na oide tearmuinn
 Neo-fheargach tàiris,
 S bidh aonachd co-cheangailt'
 Measg gach tréubh is teangaidh ;
 'S bidh Iùdhaich 's Gréugaich
 Na'n tréud aig an aon mhainnir.

XLIII.

Cha bhi luchd na'n stipin
 'S na'n glìbean farsuing,
 'Ghoid a steach o's iosal
 Air son am beartais ;
 Ri téumadh na'm firean
 'S a claidh na muinntir dhileas,
 A sheasas taobh na firinn
 Ga dìon mar ghaisgeich,
 'Cha bhi iad ga'n lotadh
 'N aghaidh solus cogais,
 Mar tha cuid 'an tràths
 Tha fo mheas luchd-gràis thaobh coslais.

XLIV.

Cha bhi Rìgh no Prionnsa
 No Diùc air talamh,
 Nach bi seinn 's a 'g ùrnuidh
 'S mar thùis bidh 'n anail,
 'S riaghlairean 's gach dùthaich
 Gu sìochainteach làn ciùine,
 'S gach searmonaich sa chùbaid
 Fo dhriùchd na'm beannachd,
 'S iochdarain gu ceanalt
 Riaghailteach gun charraid.
 'G altram an fhìor-chùram
 Le tlachd is dùrachd anam.

XLV.

Cha bhi cuirp no anamannaibh
 Ann an àinnis,
 Bidh beannachdaibh àimsireil
 Ann gun ghainne,
 Bidh toraidhean na talmhuinn
 Ni's pailte gu ro shaibhir ;
 'S bidh gach gleann 's garbhlach
 Làn àrbhair faluichte,
 Sruthaidh mìl o'n charraig
 'Sa làn fion 'san dabhaich,
 'S cha bhi buar air sléibhtibh
 Na treud nach d'thoir am bainne.

XLVI.

Bidh ola a chruinn-ùrail,
Bhios cùbhraidh fallain,
Figean is glan sùgh
Ubhlan is Pomgranait ;
'S cruithneachd bhiòs ro shòghmhor,
'S spiosraidh is glan bòltrach
'S gach ni 'bhios maith gu lòn doibh,
'S gu'n còmhdach thairis
Teichidh gruaim as gearain ;
'S cha bhi luaidh air aim-beairt,
'S cha bhi miann no ciocras
Nach riaraichear le beannachd.

GLEACHD AN T-SEANN DUINE

AGUS

AN DUIN' OIG.

“Gu’n cuir sibh dhibh, thaobh a’ cheud chaithe-beatha an seann duine, a tha truailidh a reir nan ana-miann cealgach: Agus gu’n cuir sibh umaibh an nuadh-dhuine a tha air a chruthachadh a reir Dhe am fireantachd agus am fìor-naomhachd.”—Ephesianaich iv. 22, 24.

GLEACHD AN T' SEANN DUINE 'S AN DUIN' OIG.

Tha duin' òg a's seann duin' agam,
Tha duin' òg a's seann duin' agam :
Nach robh 'n seann duin' air mo chulthaobh,
'San duin og ni's muirnich agam.

Seann duin' mi o léasradh Adhamh
O'n do shiolaich mi thaobh nàduir,
Ach duin' òg tre Léigh na slàinte
Shaor o'n bhàs mi tre ghràs naisgte.
Nach robh seann duine 'na ghrain domh
'S an duin' og 'na ghradh ni's faisge.

Rinn an seann duine daor-thràill dhiom
Thug mi 'm braighdeanas do Shàtan,
'S e'n duin' òg a shaor o mhàig mi
Dh 'ionnsuidh slàint' o phlàigh a' pheacaidh,
Leag an seann duin' anns an uir mi
'Se'n duin' og a dhuig a mach mi.

'N uair thàinig an t-òg am ionnsaidh
 Fhuair e'n seann duine na dhùsal,
 'Sa cheud fhàilte a rinn e dhùsgadh
 Sud fo lùirich bheireadh braidean.
 Chaidh an seann duine fo luirich
 'S e'n duin' ur a ruisg am brat dheth.

Air a bhonn do chaidh an còmhrag
 Tarring lann ro ghleusd' air gheòiread,
 Fhuair ann seann duin' buille-leònaidh
 Nach cuir e r'a bheò as altaibh.
 Chaidh an seann duin' a gheur chiurradh
 Sheas an t-og a chuis mar ghaisgeach.

Riamh o sin cha'n fheud iad còrdadh
 'N réite cha'n imich iad còlamh,
 'S cha'n àraichear le aon sògh iad
 'S iad an còmhnnidh a' co-ghleachdadh.
 Ach tha'n seann duine cho bruideil
 'San duin' og cho cliuiteach tlachdmhor.

Dithis iad nach còrd an càraid
 Ged tha'n còmhnuidh san aon àros,
 Gu leagar a nuas am pàilliu
 Anns na ghabh iad tàmh mar chairteal,
 'N seann duine gu carach lubach
 'S an duin' ur toirt cuis gach gleachd dheth.

Cha dean iad imeachd mar chàirdean
 Ged shaoilte gum b'iad na bràithrean,
 Bhiodh co-chòrdadh an aon nàdur
 An taobhsa do'n bhàs cha tachair.
 'N seann duin' lan do chail na breine
 'San duin' og 'na bheus cho maiseach.

'S e'n seann duine neach is gòraich,
 Ach 'se Aosd' nan làithean m'òig-fhear
 Rioghaich an seann duine an tòs orm,
 'S bheir an t-òig-fhear na stòl-chas e,
 'Seann duine 'sa lus ga fhagail
 'S an duine' og a' fas ni's neartmhoir.

Se'n seann duine leam is annsa
 Ach 'se cusbair m'fhuath is m'anntlachd,
 'S mi do'n òig-fhear am bith naimhdeis
 Ged 'se m'annsachd e 's mo chaidreamh,
 Seann duine na ghalair bais domh
 'S an duin' og le ghras 'ga m' altrum.

Tha mi bàite an cluain an t-seann duin,
 Fo gheur fhuar-dhealt 's fuachd a' gheamhraidh
 Thig an t-òg 'na ghlòir gu theampull
 Chuireas mi dhanns' àir mo chasaibh.
 Se'n seann duin' a chuir fo neoil mi
 'Se duin' og mo lochran laiste.

Ged is duilich leam an sgeula
 An seann duine bhi dol g'a cheusadh,
 Aig'an òg bidh buaidh an t-séisdidh
 'S ann leam fein gun bhreug is maith sud.
 Bidh an seann duine fo mhuisseag
 'S cuiridh an t-og an cuil gu grad e.

Bheir an t-òg fo bhuidh an seann duin,
 'S ni e òglach dheth fo cheannsail,
 'S leagaidh e dhèidean 'sa dhaingneach
 'S le thréin laimh gu'm prann e chlaigeann.
 Seann duine ri dealbh dhroch innleachd
 'S an duin' og a' sior chur as doibh.

'S ioghnuadh tha ro mhòr le reusan
 Teagasg diomhair so mo sgeula.
 Na leth-aoin so bhi 'na m' chreubhaig
 'S gur mi féin le chéil' mu seach iad.
 Seann duine mi do thaobh naduir
 Ach duin' og tre ghras a nasgaidh.

Mar tha'n seann duin' 's an duin òg ud
 Ann an aon a' gabhail còmhnuidh
 Aon diubh nèamhaidh 's aon diubh feòlmhor
 'S tòimhseachan ro mhor gun ag e.
 Seann duine do reir na feola
 'S an duin' og cha chord ris srad deth.

Aon air Mana a' teachd beò dhiubh
 'S aon eil' air duslach an òtraich,
 'S mis' an cuimrighadh an còmhnuidh
 'San aon lòn dha chòrd ri neach dhiubh.
 Seann duine miannachail geocach
 San duin' og o ghloir na feartaibh.

Ged a rinn an seann duin' m' fhàgail
 'N culaidh bhreun mo bheusaibh gràineil
 Spionaidh an t-òig-fhear mar àthainn
 A mach mi o'n àmhuinn lasraich.
 Dh'fhag an seann duine gun lus mi
 'San duin' og as ur 'ga m' neartach.

'S mi-shona an creutair am beò e
 'S i thoil-inntinn meud a dhòlais
 Sonas ri chàileachd cha chòrd e
 'S miannaibh a shòlais 'ga chreachadh
 Seann duine 'ga m' chradh le bhuairibh
 'San duin og 'ga m' fhuasgladh asda.

Aon nì ach corruich cha'n òl e
 Ioc-shlàint' cha'n iarr e ach dòruinn
 'S a chàil mhiannach chiochrach fheòlmhor
 Mhisgeach gheòcach 'n tòir air mallachd.

Seann duine cho salach gruideil
 'San duin' og cho cubhraidh fallain.

'S e féin-mhealltair th'ann an còmhnuidh
 'S i thoil féin is iodhal mhòr dha,
 A mhiann a riarach 's e dheòin e
 Ged bheir e dòruinn do-chaisgt' air.

Seann duin' ga mo chlaoidh la mhiannaibh
 'San duin' og le chiall 'ga chasg dhiom.

'N uair lionas e bhrù gu sàthach
 Le chuid féinealachd 'ga àrach,
 Eiridh e suas gu ro-dhàna
 A shràidimeachd air bharr nam baideal.
 Seann duinn' ag iarraidh an aird orm
 'San duin' og le ghras 'ga bhacadh.

Cia cho mòr 'sa thogta an àird e
 Chionn nach 'eil caochladh 'na nàdur
 Thuiteadh e sìos mar a b'àbhaist
 Ga eabradh a sàs sa' chlabar.
 Seann duin' aig na poitean feola
 'San duin' og ri gloir dlu-bheachdaidh.

Fhuair mi 'na mhealltair e'n còmhnuidh
 Le chuid gealltannasaibh mòra,
 'S le dheise ghil a' cur sgleò air
 'S mi'n dùil gu'm b'e'n t-òig-fhear macant'
 Seann duin' ga m' mhealladh le dubhradh
 'S an duin' og toirt suil domh a dh'fhaicinn.

Dh'fhàg a chleasachd mi cho baoghalt'
 'S gu'n creidinn a bhriathra faoine,
 'S e ràdh 'n uair bha m'òig-fhear gam shaoradh
 Uaith' gur e sgriob m'aoig bha'm fagus.

Seann duin' a' cur orm droch ghnuis-bhrat
 'San duin' og 'ga rusgadh sraichte.

Dh'fhag sud m'fhaireachduinn neo-stòlda.
 Uair ag itealaich 's na neòltaibh
 'S uair 'gam iomairt san dùn òtraich
 Ri faire còlamh 's am chadal.

Seann duine 'ga m' fhagail tonn-luaisgt'
 'San duin' og mo shuaimhneas caidreach.

Uair 's mo chas air carraig chòmhnard
 'S mi gu binn a' seinn an òrain,
 'S uair a' seinn air teud ro bhrònach
 A's bilean mo bheòil gun ghabadh.

'N seann duin' dh'fhag mo bhuadhan duinte
 'San duin' og toirt dhiubh nan glasan.

'S 'nuair thigeadh an t-òg gu sheòmar
 Rachadh an seann duin' a leònadh,
 Shaoilinn gu marbhta gun deò e
 'S nach tigeadh e beò le graide.

'N seann duine ri call a dheorachd
 'S an duin' og tigh'nn beo air th'apadh.

Gus an tigeadh e na dhéigh sin
 Le chuid arm gu h-ùr air ghleusadh,
 Feuchainn ionnsuidh ni bu tréine
 Le geal sgèimh an éididh-bhradaich.

Seann duine 'ga mholadh fein domh
 'S an duin' og gu treun cur smachd air.

Chuirinn feum air an ol-ùngaidh.
 Thogail nan lann far mo shuilean,
 'S gu'n amhaircinn le geur-dhùrachd
 Mu'n aithnichin ann gnùis a' mhadaidh,
 'N seann duin' 'ga m' charadh le cuilbheart
 'S an duin' og ri m' chul air f haicill.

Ged is tric a rinn e tràill dhiom
 Thoirt aobhair casaid do Shàtan,
 Dh' innseadh an duin' òg gu sàmhach
 Nach robh stàth dha bhi ri tagradh.
 Seann duin' a cur liontaibh bais domh
 San duin' og ga m' thearnadh asda.

Ged tha mo pheacadh mar scàrlaid
 'S mar an corcair tre ro-dhànachd,
 Rinn trusgan sgiamhach na slàinte
 M'òig-fhear na làthair mi maiseach.
 Dh'fhag an seann duin' tinn le plaigh mi
 'San duin' og toirt slaint' air ais domh.

'N uair a dh'fhoillsicht' a ghnùis òirdheire
 Rachadh an seann duin' air fògradh.
 Mach as a' chùirt le cheann còmhdaicht'
 'Shaoilt' nach tig e m' chòir ni b' fhaide.
 'N seann duin' a teicheadh fo mhuisseag
 'San duin' og toirt luths a neart as.

Ach bha chealgaireachd cho lùbach
 Seòlta mar shionnach nan cùiltean,
 'S ann gheibhte am meirleach na liùgair
 Ann an seòmar cùil Bhenhadaid.
 Seann duin' ga fhalach an cuiltean
 O'n duin' og 's e'n duil nach faict' e.

Oir tha innleachdan cho dùbailt
 'Se'n cruth-càirdeis ach droch-runach,
 'S e ghlain-amhairc dheanadh cùis domh
 Rannsachadh cuir lùb an t-sladair.
 Seann duin 's e ghnath droch-runach
 'San duin' og 's gach cuis tighin trasd air.

Tha bhraighdeanas 'ga mo chiùrradh
 'S anail bhreun a chléibh 'ga m' mhùchadh,
 Dh'fhàg mi fann an ceann na h-urnuigh
 Dh'easbhuidh driùchd an ùraich neartaich.
 'Se'n seann duin' a dh' fhag gun luths mi.
 'San duin' og cur sugh na m' anail.

Ged tha mi 's an seann duin' graineil
 A' co-chordadh san aon nàdur,
 'Se duin' òg mo threòir 's mo shlàinte
 Ceòl mo ghairdeachais a's m'aiteas.
 Se'n seann duin' a chlaon o'n choir mi
 'S bheir an t-og le chord mi faisg oirr'

Chuir an seann duin' mi 'san làthaich
 'Ga m' shior aoineagraich sa' chlàbar,
 Chuir an t-òig-fhear suas mi sàbhailt'
 Chor's nach do tharr e's mo thachdadh.
 'N seann duin' ag imlich na h-urach
 'San duin' og gu dluth ri tagradh.

'S e'n duin' òg an treun-fhear glòrmhor
 Do réir m'fheumsa bheir e treòir dhomh,
 Seasar eadar mairbh a's beò leis
 'S bheir e lòn is sògh do m'altrum.
 'Seann duine ga m' bhualadh 'dhornaibh.
 'San duin' og le treoir ga chasg dhiom.

Fàilte a ghnùis is ùrach beò e
 Chuireadh lùths am dhùirn gu còmhrag
 Chuir air cùl an truthair seolta
 Le fhiaclaibh le'm b' dheòin mo chasgairt.
 Bhiadh an seann duin' mi air plaosgan
 'S ghabh an t-og na ghaol dhiom ath-thruas.

'N uair bhiodh m'anmhuinneachd gun tàbhachd
 'S mi gu'n airm 's tre fhailbh' air fàilinn,
 Thigeadh m'òig-fhear le ghnùis fhàilticht'
 'Sa lann tàirngt' le'n gearrt' rìgh Agag.
 Dh'fhag an seann duin' mi lan failinn
 'S thug an t-og le ghrasaibh neart dhomh.

'S mòr mo chall le easbhuidh gràidh dha
 Ged 's tric a shaor e o'n bhàs mi,
 Toirt neart dhomh, eòlas, a's slàinte,
 Mo Rìgh e, m'Fhàidh, 's mo Shagart.
 'N seann duin' a' cur bac' air m'urnuigh
 'San duin og cur tuis air m'altair.

'S aobhar bhròin ro mhòr dhomh 's nàire
 Cho lion uair 'sa rinn mi tàir air,
 Tionndadh mo chùl ris 'nuair bha mi
 Gu sàbhailte fo sgàil a bhrataich.
 'N seann duin' a toirt uam mo dhochais
 'Se'n duin' og mo chord a's m'achdair.

'S tric a shaoil mi gu'm b' chrìoch bàis domh
 'N uair bha dhéiligidh 'n rùn-gràidh dhomh,
 Glanadh a chruithneachd o'n chàthaidh
 'S a ghuit' 'na làimh gu fasgnadh.
 'N seann duin' a meudachadh m'uamhais
 'San duin' og toirt suaimhneas ceart dhomh.

'S cainnt an t-seann duin' ga m' thàladh
 Le droch mhuinn-teachd 's grùid an àrdain,
 'G iarruidh mo shùil thoirt deth f hàbhar
 'N uair b'e ghairdean mo chul-taice.

'N seann duin' a' deanamh daor-thraill dhiom

'San duin' og toirt aite Mhac dhomh.

Dh'fhàg an seann duine cho baoth mi
 Fulang calldaich a' toirt sgàth dha,
 'Sa deanamh dimeas air m'aon-gràdhach
 A bheireadh dhomh blàs fo fhasgadh.

Dh'fhag an seann duine mi gorach

'S gliocas an duin' oig sior phailt dhomh.

Is olc an companach seann Adhamh
 Beul gun bhreug thug corp a' bhàis air,
 Cha sheinn e leam air a' chlàrsaich
 'N uair bhios mo ghàirdeachas fallain.

Tha duin' og is seann duin' mar rium &c.

Seann duin' a' bacadh mo sholais

San duin' og cur beo na m'anail.

Ach 's tric a sheirm e 's nach b'fheairde
 Mise, a bhrionnal baoth gun stà dhomh
 Se ghuth a chluinnte ni b'àirde
 Ri cluicheadh air dàn a mheallaidh.

'N seann duine 'ga m' dheanamh baoghalt

'S m oig-fhear 'ga m' shaoradh o charachd.

Dh'fhàg sud mi tonn-luaisgt' an còmhnuidh,
 Thuige is uaithe mar na Locuist,
 Acrach iotmhor airson trocair

'S iomlaineachd mo stòir gun ghainne.

Se'n seann duin aobhar mo luasgaidh

Se'n duin og mo shuaimhneas fallain.

Tha mi aineolach 's làn eòlais
 Tha mi dubh ach 's geal gun sgleò mi,
 'N dorchadas fo dhuibhre an còmhuidh
 Solus mo lòchrain sior lasadh.

'N seann duin' 'ga m' charadh an comhnuidh,
 San duin og na rod gam tharruing.

Tha mi bochd 'sa ghnàth làn saibhreis
 Brònach an comhnuidh 's làn aoibhneis,
 Bacach leòinte 's mi làn-choimhlìont
 Mall 's a ruith gu teann le cabhaig.

'N seann duine 'ga m' fhagail daibhir
 San duin' og mo shaibhreas falaicht.

Tha mi dall 's mo fhradharc dùbailt
 Tinn mi slàn 's a ghnàth 'ga 'm chiurradh,
 Sòlassach 's an còmhnuidh tùirseach
 Gaoideil grùideil is glan fallain.

Seann duine a dalladh mo shuilean
 'San duin' og toirt dhiubh nan launan.

Tha mo lotan mòr 's mo chreuchdan
 'S mi slàn gun chail do gach eucail,
 Iomlan 's neo-fhoirfe le chéile
 Sàsaichte gun éis 's mi falamh.

'N seann duine 'ga m' fhagail craiteach
 San duin og mo shlaint o ghalair.

Tha mi fuathar is ro ghràdhach
 Tha mi duaichnidh ach ro àillidh,
 'G imeachd ris an ùir a' snàgadh
 'S a marcachd àrd le buaidh-chaithream.

'N seann duine ga m' fhagail fuathar
 'S ni 'n duin og mo shnuadh a ghlanadh.

Tha mi sìochanteach 's fo amhladh
 Air bheag dòchais ach làn-earbsach,
 Tuisleach tuiteamach 's làn-dearbha
 Nach sleamhnuich air falbh mo chasaibh.
 'N seann duine gam fhagail anmhunn
 San duin og gu calm' gu m' neartach.

Tha mi làg ach treun is làidir
 Creachte spùillte a's m'ionntas làn domh,
 Sileadh dheur 's a deanamh gàire
 Maille ri Sàrah tre ghealladh.
 'N seann duine 'ga m' lot le bheumaibh
 'Se'n duin og mo Leigh o'n ghalair.

Amaideach ach glic a ta mi
 Aon air faondradh mi san fhàsach,
 Ach do-ghluaiste air carraig slàinte
 Bunaite làidir nach carraich,
 'N seann duin 'ga m' fhagail fo luasgan
 San duin og gach uair mo charraig.

Tha m'lobairtean gràineil is m'urnuigh
 Ach ged tha tha m'fhàile cùbhraidh,
 Is theid e'n àird mar dheatach tùise
 A philleas le driùchd na'm beannachd.
 'N seann duine 'ga m' fhagail muchaidh.
 San duin og tòirt luth's do m'anail.

'S cuspair feirge mi do'n àrd-Rìgh
 Cuspair a dheadh-ghean is fhàbhair,
 Tha mi mallaichte na làthair
 Is beannaichte a ghnàth na shealladh.
 Thug an seann duin mi fo dhiteadh
 'S shaòr an t-og mi le daor-cheannach.

'S oighre mi air ifrinn 's leir-sgrios
 Oighre air gràs 's air Pàrras Dé mi,
 Air na h-aingidh 's mi'n céann-feadhna
 'S mi airidh air nèamh 'nan aingeal.

Thug an seann duin mi gu leir sgrios
 Is dhoirt an t-og fhuil-fhein 'ga m' cheannach.

'S peacach gràineil a's mi firean
 'S mi Satan do reir na firinn,
 'S gineil an àrd-Rìgh gu dìreach
 Chaoidh nach dìtear le binn-sgaraidh.

Dh'fhag an seann duin naimhdeil geur mi
 Is rinn an t-og dha fein mi'm charaid.

Is creutair truagh mi tha do-bhronach
 Ach sona suaimhneach le sòlas,
 'S cha dlighear urram no bòsd dhomh
 Ged 's leam oighreachd glòr is talamh.

Dh'fhag an seann duin mi cho truailidh
 San duin og gach uair 'ga m' ghlanadh.

Is creutair tha gu'n bhuaidh gu'n fheum mi
 Gidheadh cho luachmhor 's gur éigin,
 Nach bi mhuinntir fhoirfe 's na nèamhan
 Iomlan as m'eugmhaise mar-riu.

Rinn an seann duine cuis-ghrain diom
 Se'n duin og a ghradhaich m'anam.

Fhuair mi suilean leis am feud mi
 Sealltuinn air an tì nach leir dhomh,
 'S amharc airsann anns an eudann
 Roimh 'n teich nèamh nan speur is talamh.

Thug an seann duin uam mo shnìlean
 Is thug an t-og dhomh ungadh seallaidh.

'S e bhi 'g amharc na ghnùis ghlormhor
 Sòlas mo shlàinte fhad is beò mi,
 Ach na'm faicinn a ghnùis oirdherc
 Cha 'n fheudainn bhi beò na shealladh.

Leag an seann duin mi 'n an-dochas
 'S thug an t-og mi beo o'n talamh.

Chi sibh gur mi 'n creutair neonach
 Cuspair amharc ainglean 's slòigh mi,
 Anabas na h-uile fòtais
 Ach ni's glòrmhoire no aingeal.

Rinn an seann duin cuspair fuath dhiom,
 San duin og thug buaidh air thairis.

Nach ioghnadh leibh mar a tha mi
 Mi bhi tinn le galair slàinte,
 'S m'aon-ghaoil na'm anam bhi tàmhachd
 S gun àiteagam dha gu ghabhail.

Tha'n seann duin a fas leam suarrach
 San duin og na luach do-cheannuicht.

'S ge d' is òigh mi tha ro fhior-ghlan
 Rinn mi striopachas le briodal,
 An t-seann duin a chuir fo neòil mi
 Ni tharuing orm freumh a chadail.

Rinn an seann duine mo thaladh
 'N uair bha m'òig-fhear graidh na chadal.

Mar churaidh a dhùisg o dhaoraich
 Dh'éirich m'fhear-fair' agus fraoch air,
 Fhuair e aig Eglon fo dhaors mi
 Is leig e fa-sgaoil mi gu h-aith-ghearr.

Fhuair mi fuasgladh o'n t-seann laoch ud
 Leig an t-og a ghaorr ma chasaibh..

'S ghlac na Canaanaich mi'n uair sin
 'S rinn iad braighdeanach gu luath dhiom.
 Shéid iad an trompaid gu fuaimneach
 Is thog iad bratach suas le caithream.
 Chuir an seann duin orm droch-bhuaireas
 A mhill mo shuaimhneas car tamuill.

Tha mi fosgailt' do gach buaireadh
 'S mar thòbar seulaicht' neo-thruaillte,
 'S mo chridhe briste trom-buailte
 Gun aobhar gruamain no gearan.
 Seann duine ag iarruidh srian-fhuasgailt
 'San duin' og le buaidh 'ga cheangal.

Iodhail 'ga m' tharruing o'm shuaimhneas
 'S mi air mo sgarradh o luaidh dhoibh,
 S mi àite tàimh gach eun fuathar
 Ge d' tha iad uam air an sgaradh.
 'N seann duin 'ga m' cheangal ri'm iodhail.
 San duin og o'm miann ga'm sgaradh.

Ge d' is mi ciomach na doarsa
 Is braighdeanach a bhàis gach aon uair,
 Cha reicinn cuibhreach mo shaorsa
 Air saibhreas gach maoin air talamh.
 'N seann duine ceangailte fo dhiteadh
 Aig an og fo dhaorsa-geamhail.

Tha mo chnamhan sgàinte o chéile
 Mar shoitheach briste do chré mi,
 Ach dlù-cheangailte ra chàile
 Eadar altan, fhéithean, 's bhannan.
 Dh'f bag an seann duine mi 'm eigin
 'S shaor an t-og mi le treun tharruing.

Tha mì lom-ruisgte gu chòmhach
 'S fo dheis ùr do éideadh glòrmhor,
 'S mi daor thràill air dùn an òtraich
 'S Prionnsa ro oirdheirc a dhealras.

Dh'fhag an seann duin lomnochd ruisgt mi
 San duin og as ur 'ga m' f halach.

Is creutair marbh mi chaidh nach bàsaich
 Sior theachd beò air lòn deadh-àraich,
 Bàsachadh gach la le slàinte
 Seargta 's a fas fo bhlàth fallain.

'N seann duin' a' seargadh o fhreumhaibh
 Is fas an oig gu sgiamhach sgeanail.

'Ged tha mi saor o gach truaighe
 'S éigin domh gu'm faic mi truailleachd,
 'S ged nach adhlaicear san uaigh mi
 Gu là bhràch tighinn uaip' cha'n fhaigh mi.
 Thug an seann duine do'n uaigh mi
 'Se 'n duin' og thug buaidh air thairis.

Tha mo chaoile dhomh na reamhrachd
 'S mo ghorta daonnan na sail domh.
 Mo 'shith a meudachadh m'ann-sith
 'S naimhdeas ri m'annsachd 'ga m' cheangal.
 'N seann duine a sas anns an t-saoghal
 'San duin' og o ghaol 'ga m' sgaradh.

Ged fhuair mi m'aon-gaoil gum iarraidh
 Tha mo shùil na dhéigh gu cianail,
 Ged 's dlùth e eadar mo chiochan
 'S fada cian e as mo shealladh.

Dh'fhas an seann duin' na chuis-ghrain domh
 'San duin' og le ghradh 'ga m' tharruing.

'S mi deanamh a nì nach b'àill leam
 'Sa toirt fuath do'n nì a b'fhearr leam
 'Sa toirt gaol do'n fhìor chùis ghràin
 'S gur e mo shlàinte mo ghalair.

Tha'n seann duin' air fas na phlaigh dhomh
 'Se 'n duin' og aon-gradhach m'anam'.

'S gun mi 'g amharc air nì's leir dhomh
 'S mi faicinn an nì nach léir dhomh
 Ach tha mi sealltuinn 's cha léir dhomh
 Ged tha mi gu geur 'ga amharc.

Dh'fhag an seann duine cho dall mi
 Is thug an t-og glain-aimharc ghlan domh.

Cha mhi-féin mi féin oir tha mi
 'M neo-nì 'se n Ti's mi is fearr dhomh,
 'S mo chaithe-beatha anns na h-àrdaibh
 'S mi m'fhear-àiteachaidh air talamh.

'N seann duinn' triall gu tìr na di-chuimhn
 'San duin' og ri Criosd dlu-cheangailt.

Sheann duine tha ri éisneachd m'òrain
 'S nach do shealbhaich deadh-ghean m'òig-fhear
 Mur gabh thu ri gairm a thròcair
 Fhearg bidh dòruinneach do t-anam

Cha'n 'eil og'ach seann duinn' mar riut, &c.
 Tilg an seann duin air do chultaobh,
 'S gabh an t-og as ur mar t-earradh.

Faigh fòghlum air brìgh mo chòmhraidh
 'S feuch e gu reusanta 's gu còmhnard,
 'S mar treabh thu le m'agh gu seòlta
 Bidh mo thòimhseachan's ort falaicht.

Cuir an seann duin' uait gu h-ealamh &c.
 Fas m'un t-seann duine caoin-shuarach,
 'S bheir an t-og dhuit buaidh le caithream.

Gabh sàr-bheachd air luach na trècair
 Bheir peacaich o bhruaich na dòruinn,
 A steach tre dheuchainnibh mòra
 Gu fairge ghlòrmhor mar ghlaire.
 Mu'n toir an seann duin' do'n uaigh thu
 Grad theich uaithe a chum na carraig.

Far an seinn iad gu luath-ghàireach
 Air clàrsaichean Dhé nan làmhnan,
 Oran Mhaois 's an Uain a ghràdhaich
 Iad 'sa shaor o'n bhàs trid f'hal' iad.
 Dh'fhag an seann duin' thu fo'n truaighe
 Teich gu luath oir 's luachmhor t'anam.

Na meas fonn' an t-seann duin eutrom
 Ge' b'àrd fhuaim am beul an t-saoghail
 Fhuair mis' e cho trom 's gun shaoil leam
 Gum shlàinte dhomh saorsa o 'eallach,

CÙRAM DHÉ DA PHOBULL.

AN ROIMH-RÀDH.

THA mi airson innseadh don leughadair nach do shaoil mi an toiseach na rainn a leanas a chlòdh-bhualadh idir ; agus sin do bhrìgh agus nach do rinn mi ach an cruinneachadh an so agus an sud a measg cuid do na sgrìobhaidhean a dh' fhag an t-ùghdair. Bha eagal orm thaobh s' nach' eil tuigse agam air bàrdachd gu 'n déanain coire do chliù an ùghdair, ni nach bu mhaith leam ; gu h-àraidh do bhrìgh agus nach do dh' fhàg e féin na sgrìobhaidhean thàinig dh' ionnsuidh mo làimhsa ann an uidheam airson a chlòdh-bhuailaidh. Gidheadh smùainich mi gu 'm bu mhòr an call cuid do na rainn a leanas chumail air ais. Chuimhnich mi air briathran an t-slanuighear : “ Cruinnichibh am biadh briste a ta thuilleadh ann, chum nach caillear a bheag.”—Eoin. vi. 12.

Cha' n' eil ceangal na aonadh eadar cuid do na rainn a leanas airson an aobhair a dhainmich mi cheana, agus mar sin, cùmaidh an leughadair na chuimhne nach robh iad air an cur an òrdugh a chlòdh-bhualaidh leis an ùghdair e féin.

A. M. I.

CURAM DHE DA PHOBULL

EARRANN I.

I.

Am broinn na daorsa ged' bha thu,
Ann an caraid ri streap
Ri do bhrathair Esau,
Ghlac thu shàil le greim géur,
'S ged a dh' fhogair a ghrain duit
Thu gu 's fhagail car ré ;
Thig thu dhachaidh 's maoin Labain
Leat, 's lan àl aig do thréud.

II.

'S iomadh doinionn 's fùachd geamhraidh
Bhuail mu d' cheann thu, 's gaoth reot,
Tiormachd tart is grian sàmhraidh ;
'S iomadh teanntachd ro mhòr,
Toirt a mach cusbair t-annsachd,
Ghabh thu teann le snaim pòsd',
'S thug thu leat i le ainneart
A dhaindeoin naimhdeis le còir

III.

Ge d' bhuin Làban gu meallt' riut ;
 Chum le feall 'uat do choir ;
 'R chor 'sam fiannuis do naimhdibh,
 Beag 'san am bha do stor ;
 Slatan glas na craoibh challdainn,
 Chritheann cham is gheanm-chnó,
 'S ged' bu dorch' iad ri 'n amhare,
 Bha 'n gill annta fo sgleò.

IV.

Fo 'n a rùsg bha 'n geal gle ghlan,
 Soilleir, réth mar bu leòr
 E do shuilibh an treud'
 'Nam gu leir dhoibh bhi 'g ol ;
 'S nuair a shiolaich an spreidh sin,
 Ged' bha 'n gléus n' aghaidh nois
 Bha na stiallan geal ceudna
 Ceart da reir 'san àl òg.

V.

Faic mar dhiol Rìgh na 'n sluagh dha,
 Reir mur bhuannaich e ghna
 Ann an creideamh, 's an cruadal
 Fo gàch tuairgneadh, 's cruaidh-chàs ;
 'S ge do mhùth e a dhuais air,
 Na deich uairean le tàir,
 Thionntaith Dia sin gu bhuannachd,
 'S bha làn thuarasdal pàit.

VI.

'S'ge bu dòrcha bha 'n rùsg ac',
 Ni tha druidhteach is geur,
 Eadhoin faireachduinn chiuirteach
 Duibhre dhuldaidh gu 'n leus ;
 Teagamh, crùas, 's eagal diumaidh
 Bròn 's tùrsa fo nèul,
 O naimhdibh ! ifrinneach, làbach,
 Tha dealbh gach cuilbheart ro ghléasd'.

VII.

Ach thig an geal ris ri 'n rùsgadh,
 Gradh deadh run is naomh éud,
 'S naomh bheo iarratas dàrachd,
 Aslaich ùrnuigh ri neamh,
 'S gràs an fhulangais chliutich,
 Is dòchas dlu ri am féum,
 Is seamhachd mhacanta chiuineis
 A' ni so-ghiullainnte 'n crann-céusd.

VIII.

'S aig na h-amair ghrais ùraich,
 Bidh na h-ùr ghil so tréun ;
 Tha na geallaidh' ro dhlu dhoibh
 'S biodh bhur n-urnuigh 's air ghléus,
 'S thig iad òirbh mar fhras chubhraidh
 'S mar mhaoth dhriuchd air an fhéur,
 Is bidh bhur gàirdeachas dubailt,
 A' seinn air cliu an Ard Léigh.

IX.

Eaglais Shaor, a chaomh chàrdean
 'S gearr na laithibh gu léir
 Gu 's an cluinn sibh caoidh Làban,
 Sibh air fhàgail gu 'n tréud ;
 'S O ! nam faicinn an là sin,
 B' oibhinn gaire bho' m' bhéul,
 Bhi ga chluinntinn le àrd ghuth
 Ri gul 's a rànaich na 'n Dee.

X.

Ge d' ro casaid a namhaid
 Ribh aig ràitiun le bèum,
 Gu 'n do chreach sibh tigh Làbain
 Dheth chuid ailleagan bréig ;
 Ach ge d' dh' fholaicheadh le Rachel
 Iad 's an àirneis, fo sgeith,
 Cha robh cionta ann do Iacob,
 Nach d' ug gràdh dhoibh no géill.

XI.

'Se bha ann fuileach a nàdair
 Bh' ann an Rachel 'i fein,
 Fhùair 'i 'n leasraidh a pàrrant',
 Dh' fhàs na ghràin dhì na dhéigh ;
 'S nuair a lorgadh le Iacob
 Iad, cha babhar dhoibh e ;
 Thilg e mach chum na fainh iad,
 Is ghléidh e Rachel dha fein.

XII.

Be 'n t-iognadh mòr do shuilibh
Fìor luchd do dhiomaidh is t-fhùath,
Gu 'm biodh do bhacaich' 's do chrubaich'
Na spionnadh lùis duit 's fàth uail ;
Ach siol do leasraidh bha' n Iuda,
'Se ghleachd gu dluth riut o shuas ;
'Se rinn cho anfhann 's lan luis thu
'S reir t' ainm rinn prionnsa dhìot thug buaidh.

XIII.

Ge b' mhòr do gheilt 's t-eagal trailleil
Ro bhagar Esau 's ro laoiach,
'S ann air do ghlùinean b' fhearr thu
Gu casg a rais riut 's a chaoich ;
'S cha be do thiolac a mhain d'a
A chorruih àrd riut a thraogh ;
Ach toradh t- urnuigh na d' ghasaid,
Rinn gnùis do namhaid leat caomh.

XIV.

'S bu bheag a smuanich luchd muiseig,
D' am baithn' o 'n tus do dhian luaths'
Gu 'm bu fhreagradh dha t-ùrnuigh ;
Ach comharradh diumaidh is fuath
A bha na d' shliasaid bhi crùbach,
Ach mheall an duil orr' na tràigh
A shaoil gu' m chreach d' am mi-rùn thu,
'Nuair o 's an ceann bha d' lan bhùaidh.

XV.

Oir cha do mheas iad rùn àraid
 An Ti a ghràdhaich thu 'n tùs ;
 A chuir t-fhéin carbsa mu làr dhuit,
 O 's e do namhaid bu mhò,
 A chum do thaic bhì ri ghràs-san ;
 Be neart a ghairdean do threoir,
 A bha ga d' dhion o gach namhaid,
 'S thug dhut buaidh laraich fadheoidh.

EARRANN II.

XVI.

Sibh dha mar Rut, a chaomh óg bhean
 A dh' fhag tìr Mhoab s' a slùagh,
 'S a ràinig achaidhean Bhoas,
 A dhiolum lòn measg na 'n sgùab ;
 'S gu achadh coigreach nach b' eol dìth,
 Nach deachaidh i ròinnag air rùaig ;
 Be féin fear fùasglaidh a còrach,
 'S ghabh e' m bann posd' i gu luath.

XVII.

'S ge bu spùillte Naomi,
 Bha Dia 's a thròcair dhi buan
 Is ghràdhaich Rut a Dia mòr-se,
 'S cha bu shàibhreas feolmhor bha àaip' ;
 Oir 's ann fo sgàil chuir i dòchas ;
 Mar nochd béul Bhoais dhi duais ;
 Ach ghràdhaich Orpa saill Mhoab,
 Tre 'n phìll i g' orag gun bhuaidh.

XVIII.

'S mar sin tha ghnà mhùinntir fheolmhor,
 Tha 'n duil an stòr bhi do-ghlùast,
 'S a tha na 'n saill 's na 'n sult geòcach,
 A déanamh bòsd is mòr-uail ;
 Ach druididh an t-saill sin mu 'n dorn-chur,
 'S théid gaoth na mòr bhroinn le fuaim,
 Tre' m brist an salachar 's a neoghlain'
 A mach na bhréin an sronaibh an t-sluaigh.

XIX.

'S ge d' is druidte iad na 'n seom'raibh,
 Na 'n daigneach mòr dhoibh mu 'n cuairt ;
 Theid Ehud thuc' gu seòlta,
 Fìor theachdir beò Rìgh na 'n slùagh,
 'S a chlaidheamh sìnte fo chòta
 Gu lòt Rìgh Mhoab tròm bhuailt',
 Is séididh an trompaid 's thig mòr shlùagh
 Na' m feachd gu glòirmhor thoirt bùaidh.

XX.

An sin bidh cùimhne 's an là sin,
 Nach fuilgte Moab, no threubh
 A theachd a riaghladh no sheoladh
 An tigh na'n orduighean Dhe' ;
 Is ge d' bha 'm fearg, 's an cuid mòrchuis,
 San ùabhar bòsdail ro threun ;
 Nach ro'n spionnadh gu còstri
 A faisg an còir bhi da reir.

XXI.

Ach thig an t-òrdugh mu'n teampull,
 Chur leis an t-sreing air deadh sheol,
 'San t-slat thomhais neo-mhealta
 An laimh dheadh Aingle gu'n ghò ;
 'S gach dorus, cuirt agus altair
 Le reachd gu'n mheang chur air doigh ;
 'S gach aon ni uaithe ghrad adhlac
 Bha togail campair do'n t-slògh.

XXII.

'S theid e suas na ghlòir aillidh ;
 Bidh neart an lamhan an t-sloigh ;
 'S ge d' ro Tobia 'n caraid
 Ri Sanbalat le'm pròis ;
 Cha bhac iad clachairean araidh
 Dh'fhas eud na'n gràs cho fìor bheò,
 'S aon làmh cumail sgath saiteach
 'S làmh éile sàs aig an òrd.

XXIII.

'S iomadh Esra 's Haggai
 Is Serubabel bhios beò,
 Is Ieshua bharr orr',
 'S Nehemiah bhios lan treòir,
 A dhùsgadh chinneach o'n tràilleachd
 Na'm feachd ro thabhachdach mór,
 'S bidh slùagh an fhearainn thar àireamh
 'N cobhoinn 's an gradh riu da'n deoin.

XXIV.

'S bidh gart ghlanaidh an la sin
 Air coimeasg gràinail an t-sloigh ;
 An leth bhriod neoghlan a tharmaich
 An aghaidh aithne an Dé mhoir,
 Bha eadar Iudhaich 's clann Amoin,
 Is Mhoab 's Asdoid, (droch bhriod,)
 Nach labhradh Eabhra mar chànain,
 No'n teangaibh math'rail ni's mo.

XXV.

'S air air an aobhar 'so fagar
 Dhuibh iomadh fàlaid gu'n dlò,
 'S cinn gu'n ghruaig na'n sgaill bhàna
 'S cha'n ann mur Nasarich fo bhòid ;
 'S bidh 'n gnùis ro mhugach 's nial bàis orr'
 Fo mhasla nàire 's tròm bhron ;
 Cha ghabh na h-Iudhaich co-phairt riu
 'S cha d' thig mìc Asdoid na'n còir.

EARRANN III.

XXVI.

Cleachdaibh faireachd a chàirdean ;
'S iomadh namhaid ni béul
Farsuing, fosgailt, gu'r càineadh
Leis gach fath gu's bhu'r téum :
O nimh ! ìnnleachdach, Shatain,
A tha cur àird air gach gléus
Gu's bhur mìsgadh gu graineil,
Le earbull sail dheth chur fein.

XXVII.

Is cuimhn' libh fein 'nuair bha Pharaoh
Fo na plàighean 's an Eiphit,
Gu'n do mheasg dheth chuid traillibh
Le cloinn Iacob iad fein ;
'S nuair ghlac ciocras 's an fhàsach
An cumasg grannda 'sin gu géur,
Thainig breitheanas làdir
Air gineil Iacoib na dheidh.

XXVIII.

'Tha nuadh chreidmhich, gu gnathaicht'
Mar chuir Pol dhuibh an céill,
Fosgailt' 's buaillteach do 'n àrdan
Mar bac gràs e o neamh ;
'S tha cùnnard mòr bhi cur lamh orr'
Tuilleadh 's tràth mar luchd dreuchd,
Dheasbhuidh dearbhaidh is làidir'
No faoineis sgailean do sgéimh.

XXIX.

Is fìor a sgèul e ra radh'
Gu bheil a càth air gach déis,
'S gu bheil cogull a namhaid
A measg sluaigh araidh mhic Dhé,
'S crainn fìge chrìon gu 'n bheo fasmhor
A bacadh fais na naomh gheug,
A tha toirt leatrom 's mor thàire
Do chlann na gras is béol bheum.

XXX.

Sin, O naimhdean gu 'n ghràsan
D' an cuspair grain' sluagh Dhé
'S ard a dhuisgeadh an àrdan
Na 'n deante tàir air an spreidh :
Air son reitheachan fasaich
Bhi milleadh àil an cuid thréud,
Is air son seotachan granna,
Nach togadh làn phris aig féill.

XXXI.

'S ge d' ro' coimeasg 's a mheall ac',
 Tha ghliocas annta 's do chéill
 Nach cuir am fìor bhrìod le an-tlachd
 Fo 'n aon cheann ri 'n droch spréidh ;
 Is 'nuair chruinnichear gu faing iad,
 'S a chuid bheil meang chuir o'n tréud
 Cha 'n abair aon neach gu 'n ghamhlas,
 Gu 'r garrlig tha annta gu leir.

XXXII.

'Nuair thagras Dia le stri laidir
 A nuas o 'n aird ris gach feòil,
 Le teine lasara smalaidh
 'S le claidheamh dealrach a bheoil,
 'S da fhaobhar géur air, gu tearnadh,
 Do mhac a ghraidh 'na bheir pòg,
 'S gu sgrios a naimhdean 's eascardean
 Nach geil 's am fagail gu 'n deò.

XXXIII.

S' bidh aoibhneas ann 'san là sin
 Do 'n chuid, o laithibh an òig'
 A ghabh a chuing ann an gràdh dha,
 Gu dol tro amghairean mòr ;
 Bidh 'n trusgain maiseach a dealradh
 'S an culaidh aillidh gu 'm bròig,
 Le laoighibh 'm bilibh luath-ghaireach
 A seinn na 'n dàna 's binne céol.

XXXIV.

Cha bheag am bròn, 's an cràdh an'ma
 Dhuibh 's an aimsir 'so fein,
 Staid bhur mathar* o 'n dh' fhalbh sibh ;
 Gu crìon air seargadh o freumh,
 Fo dhريس na 'm bagaidean searbha
 'Sa geugan aimrid gu leir,
 'Sa faicinn aogais a meanbh-chruidh
 Fo dhearcan marbhteach dol éug,

XXXV.

Tha droighneach 's feanntagach chiurail,
 A nis 'na luchairtibh mòr ;
 'Si 'na fàrdaich ro dhuldaidh
 Do dhragoin lubach na 'n cos,
 'S 'na faros taimhidh ro mhuchaidh
 Do chomhachaig dhur, a sgread phro,
 'S do bheathaichibh allta ro bhruideil
 'S do shionnaich chuilbheartach, sheolt'.

XXXVL

'Se nis is ainm dhith Lo-ammi,
 A chionn gu 'n dh' fhag i fear pòsd',
 'S gu 'n d' lean i coigreach 'na aite
 Da 'n d' ug i gràdh air son soigh ;
 An geall a h-àrain 's a dìbh làidir,
 A h-olainn thla 's a cuid cloimh ;
 'S bha 'n tàm ann duibhse uaipe tairsinn
 S' gu 'n bhi copairteach dheth doigh.

XXXVII.

S' tu rinn do ghliocas, 'nuair dh' eisd thu
 Ri ghuth dheigh riut na ghaoil,
 'S a cuid neohlaine a thréigsinn,
 Is dol 'na dheidh air a ghlaodh,
 Is teach a mach chum an t-sleibhe
 Ri 'n do naisg e 'n fheusda gu saor ;
 'S a chuirn sho-bhlasda 's ro eibhinn,
 Lan smior ro reth, 's do fhion aosd'.

XXXVIII.

'Se sin chùirm 's am bi mhillseachd
 Aig fleadh an Rìgh thug dhuibh buaidh,
 'Nuair chi sibh a ghloir 'na lan aobhachd,
 Le gean is faoilte air a ghrùaidh ;
 'Sa dheadhghean graidh do gach aon dèibh,
 'Sa bhràtach ghaoil duibh mu 'n cuairt,
 Cha bhi amghair na 'r cuimhne
 Nach sluig tolinntinn le buaidh.

XXXIX.

'N sin their e, ithibh a chàirdean
 'S òlaibh ghnàth, luchd mo ghaoil,
 'S 'na cuiribh 'n teagamh gu bràth mī,
 Thug dhuibh na 'm ghràdh fuil mo chri,
 Ma 'r dheoch da 'r 'n anama pàiteach,
 Na cuan do lanachd nach traogh,
 'S mo chorp ma 'r bhiadh gu 's bhu 'r 'n àrach
 Le 'm bi sibh sasaichte a chaoidh.

XL.

Do 'm fhìon a mheasg mi, slainte,
 Chur gean is graidh ann bhur cridh' ;
 O gabhaibh, 's m' fhialachd cho làn duibh,
 'S ar 'naiteas làn biodh gach linn,
 'S bhur 'n uile cliocras biodh sasuicht'
 Le miann fo 'm sgaile bhí gach tìm,
 'Smo thoradh milis da 'r caileachd,
 'S da 'r blas nach sasuich ach mi.

XLI.

'S cha 'n iognadh e ge d' ro 'n trasa,
 Bhur spicnaird n' lathair bhur Rìgh,
 A sgaoileadh cubhraidheachd failidh,
 Tre spéis do lathaireachd mo ghaoil
 A dhaom mo chluas o m' chaomh airnibh
 Rì 'r miann: O ! ghràdh, 'nuair ghlaodh
 Sibh, g' iarraidh pòig o bheul grasmhor ;
 Mo gheallaidh ghnà dhuibh tha saor.

EARRANN IV.

XLII.

O ! chàirdibh gaoil, bithibh dlleas ;
 'S ar misneachd crì' biodh 'n is mo,
 Tha 'n tam tionail tighinn dhreach
 Ma 'r thubhairt am Piobull, e 'n tos
 'Na céud thoraidh chaidh iobradh
 A cheana, 'n innsibh na 'n slègh,
 Ma 'r ghealla'ibh daighnich tha 'g innse
 'Na meill bhi naemha fadheoidh.

XLIII.

Tha Rìgh. tha Prionnsa deadh mhilidh
 A nis 's na h-Innsibh tigh'nn bèò,
 'S tha Diucaibh 's Merairibh sìobhalt'
 A gabhail taoibh ribh le deoin ;
 'S do armait' steighicht' ar Rìghachd,
 Tha aireamh mhìltean deadh sheoid
 A teachd a dh' aoradh do Chrìosd
 Do 'n Eaglais Shaor ma 'r bu choir.

XLIV.

Tha 'na nìthe 'so 'g innse
 Gu'm bheil an tìm teachd oirnn,
 'S gu bheil bliadhna 'na saorsa
 A teannadh ruinn 'na h-àrd-ghlòir ;
 'S am bi gach Rìghachd 's an t-saoghal
 An aonachd ghaoil 'na naomh shlògh,
 A seinn làn aoibhneis na'n crì dha,
 'S hosanna bhinn ann na'm beoil.

XLV.

'Se nis an tìm dhuibh bhi saothreach
 Gu'n fhois, s gu'n sgìos, ach na'r duisg
 Mar bha Daniel dileas,
 Bu tric 'na shineadh 's an smur ;
 A leagh 's an Fhaidh Eremiah
 Fìor àm an libhrig bhi dlù ;
 Tre'n d'fhuaire e taisbeanadh cinnteach
 Air aobhar aoibhneis 'o thurs.

XLVI.

Ach ge d' 's deùrach do shuilibh,
 'Nam frasibh dlù air do ghruaidh,
 'S do thròm osna ri buireadh,
 'S do chridhe tùrsach ri fuaim,
 'S do chulaidh bhròin ort ri tùchan,
 Saic èididh dùinnt ort 's an luaith'r ;
 Thig do shòlas 'n gearr ùin ort
 Aig iadhadh dlù ort mu'n cuairt.

XLVII.

Do dheoir tha'm buideal Iehovah,
 'Sri t-osua bhroin tha chaomh chlùas ;
 Ri glaoth na'm bochd tha e teo-chridheach
 'S thig e ga'n comhnadh 'na thruas ;
 A chum a furtachd 's am faicinn,
 'S an dion o'n fòireigin chruaidh
 'S gu'n togail suas ann a thròcair—
 Dha fein bidh glòir 'na làn bhuaidh,

XLVIII.

'N ti ghradhaich naimhdean a ghloire ;
 Le fhuil a dhortadh 'na thrùas,
 'S thug gràdh na'n aire do mhic shròthail
 A teachd le pòig thuc' gu'n ghruaim ;
 'S nach saor e chéile 'sa h-oigridh
 'S a ghaol dhith 'n comhnuidh do-ghluaist,
 'S e dlu ri ciochan gu'n fhogradh
 'S an oidhch is reota a ghaoth tuath.

XLIX.

So 'n tioghnadh ard nach tuig nàdar,
 O ghloir cho aillidh ri neamh,
 Gu 'n glùaiseadh airnibh 'na ghràdh e,
 Gu teachd do fhasàch nan déur
 A dh'fhulang bais ann na'n aite.
 Fo mhasla nàir is mòr phéin
 Gu 'n togail suas leis gu Paras,
 Mar shéudan 's ailleagain fein.

L.

Nuair thig na cinnich da ionnsuidh,
Theid Soisgeul druiteach na'm bùadh
Le cumhachd iompachaidh, 's dusgaidh
A ghairm na'n Iudhach o'n suain,
Gu Tarsus, Pul, is gu Tubal,
'S gu Lud, a lùbas gu cruaidh
Am bogha stailinn le dùrachd
Gu lot is ciuradh luchd fùath.

LI.

'S air feadh na'n crìochaibh nach cuala,
Deadh iomradh 's fuaim an deadh sgeoil,
Bidh chomhar oillteil bheir luasgadh
Le iomaluaths air mòr slòigh ;
'S a chuid theid as diubh o'n uamhas,
Tre gheill do 'n Uan ga'n toirt beò,
Bidh iad le'n iolachaibh luathghair
A seinn 's a luaidh air a ghloir.

LII.

'Se sin 'nuair chruinnich 'na braithrean
Bha feadh ma'm fasach fo neol,
'S air an sgapadh, 's air an sganradh
Fo dhuibhre bais 's dubh chéo ;
A measg na'n cinneach, 's gach canain
Le'n d' mheasgaich iad le'n droch nòs,
Gu sliabh ro naomh na slainte
'S bidh 'n anama sasaicht' le sògh.

LIII.

Is bidh 'n toilinntin an comhnuidh
 An cuilm ro shoghmhor nach tréig ;
 Is ann an saibhreas a gloire,
 Ni iad mòr bhosd gu'n fhein speis ;
 'S bidh sìth mar abhainn ga'n comhdach
 'S an àlach òg fo ghlan sgeimh,
 Is glòir na'n cinneach s' na'n sloighibh
 Mar shruth tìgh'n comhladh na'n déigh.

LIV.

'S bidh cuid mar Ephraim gu sàruichte,
 Mar Dhaimh nach d' ghnathaich a chuing ;
 Is iad a gul fo ghéur amhghair,
 Fo smachd ga'n cradh 's iad ri caoidh ;
 Ach innidh chùim na'n caomh airnibh,
 Da'n leir an cnamhan bhi claoit,
 Bheir e làn dearbhadh mu ghras doibh
 'S air iochd gu brath nach pill

LV.

'S bidh cuid dheth chusbairean gràidh-san,
 A dh'ith 'na lathair aig feusd
 'Sa bhuail droch ghalair thug bas orr',
 Fo bholadh gràneil ro bhréun ;
 'S an t-suil a ghuil as cionn Lasaruis,
 Dha fein iad bu léir ;
 'Se mhosglas suas le ùr-ghras iad
 'S be'n t-iognadh ard e'm beachd cheud :

LVI.

'S bidh cuid mar Iob bha lan iomlan,
 Coimhliont', 's co-chuimte ri lagh Dhé';
 'Sa spuill Satan dheth 'n ionmhas,
 Ga'n cur fo urchadaibh géur ;
 'S na'n sgeig do'n cairdibh mu'n timchioll
 Nach d' thuig run tiòm-chridheach Dhé ;
 Ach gloir a ghrais rinn 'n iomchar
 Bidh ard ri iomradh na'm beul.

LVII.

'S bidh cuid fo lotaibh nach fuilgte,
 Ma'n bhòrd aig cuirm 'no aig feisd ;
 Ach chum na'n dorsaibh a thilgeadh,
 'S na madaidh 'g imlich an creuchd ;
 Ach Aingle treùn bidh mu'n timchioll,
 'S iad muinntir ionmhuim Mhic Dhé,
 Is aiseag slàinte dhoibh cha'n iomrall,
 Oir chuir iad muinghin 's an Léigh.

LVIII.

'S bidh cuid fo 'n eaididhean dearbhte,
 'Sa ruith na'n carbaid na'n deann,
 Is iad na'n tréun fheara calma,
 Nach pill le cealgairibh meallt';
 Is diamhain naimhdean bhi sealg orr'
 Le'n innleachd dhealbh o rùn fealls',
 Is iad cho dian fo 'n cuid armachd,
 Gu'n lot, 'sa marbhadh tro'n ceann.

LIX.

'S bidh cuid a marcachd each meanmnach,
 Na'n léum a falbh 's nach dean maill,
 'S nach gabh eagal ro armailt
 Luchd breabadh dhealg le éud dàll ;
 'San colg mar leomhannaibh garga,
 Nach meataich fearg a droch namhaid,
 'S bhéir buaidh tre fhulangais searbha
 Le leumaibh garbh' an géur lann.

LX.

'S na'n rùith air muileidean ainmeil,
 Le luath's chas ainmhidh nach màll
 On Dioghaltair fola tha ga'n leanmhuinn
 Le inneal marbhaidh na laimh.
 A dh'ionnsuidh 'n didinn gu'n teancadh
 'S an daighneach tearmuinn nach fànn.
 Toirt gloir do'n ullachadh earbsach
 A dhion an anama gu'n chall.

LXI.

'N sin deothalaidh sibhse gu sunndach
 Do'n bhainne is sùghara bùaidh,
 'S do mhìl fhallain is cubhraidh,
 Do'n chridh bhruit tha fo ghruaim ;
 Is luaisgear sibh air na glùinibh,
 Le oran ùr is binne fuaim
 Fo bhraonaibh blàth na'n gras ùraich
 Chur smior is lughs anns na h-uain.

LXII.

A cùan neochrìochnach nà lànachd,
 A dhullaich gràs dhuibh mar stòr,
 A shileas fialaidh on airde
 Air 'n d'thugadh dhuibh làn chòir ;
 Bheir neart is spionnach da'r cnamhan,
 Bha brist lan fàillinn is léon,
 Le'm fàs iad ùrail is làidir,
 'S bheir taic da'r 'n airnibh le treoir.

LXIII.

Mar innidh theochridheach màthar
 Da gineil graidh bhios fo leon,
 Le clus is comhfhurtachd bhaigheil,
 Bheir fois o amhghair dha 's fòir ;
 Mar sin 'nuair dh'foilsichear gairdein
 Ro neartmhor Ard Rìgh na glòir,
 'N sin thig blur fuasgladh o'n airde
 Tre'n Spiorad ghrasmhor shior bheo.

LXIV.

Is deas-ginn cuaiche 'na ball-chrith,
 'S 'na corruich gharg sibh cha 'nòl ;
 Ach theid i 'n laimh luchd geur-leanmhuinn,
 Bha cràdh bhu'r 'n anama 's ga'n leòn ;
 'S bidh 'n leasraidh fànn fo mhor fharbhas,
 S bidh cupan searbh dhoibh lan leòr,
 Mar amhuinn theintich bidh fhearg dhoibh,
 Nach mùch 's bidh 'n gairbh-shian ro mhòr.

LXV.

Bidh bhu'r gairdeachas dubailt,
Seallbhach ùr-ghràs duibh fein,
Ne dh'ibh gleachd-fheara siubhlach,
A ruith gu dlùth 's a bhlàr réis :
'S a mealtuinn lathaireachd a ghnuise,
A toirt grais a dhusgadh na'n ceud,
A chreachadh Shatain, toirt spuill dheth,
Is luchd mì-ruinn fo ghoidh ghéur.

THE
CHRISTIAN'S FIRM BANK.

THE
CHRISTIAN'S FIRM BANK.

By the Rev. Lachlan Mackenzie, of Lochcarron.

I HAVE a never-failing bank,
A more than golden store ;
No earthly bank is half so rich—
How can I then be poor ?
'Tis when my stock is spent and gone,
And I without a groat,
I'm glad to hasten to my bank,
And beg a little note.

Sometimes my banker, smiling, says,
“ Why don't you oftener come ?
And when you draw a little note,
Why not a larger sum ;
Why live so niggardly and poor—
Your bank containeth plenty ?
Why come and take a one pound note,
When you might have twenty !

“ ‘Yea twenty thousand, ten times told,
Is but a trifling sum
To what your Father has laid up,
Secure in God, His son.’ ”
Since, then, my banker is so rich,
I have no cause to borrow ;
I'll live upon my cash to-day,
And draw again to-morrow.

I've been a thousand times before,
And never was rejected ;
Sometimes my banker gives me more
Than ask'd for or expected !
Sometimes I've felt a little proud,
I've managed things so clever ;
But, ah ! before the day was gone,
I've felt as poor as ever.

Sometimes with blushes in my face,
Just at the door I stand ;
I know if Moses kept me back,
I surely must be damned.
I know my bank will never break—
No ! it can never fail :
The firm—three persons in one God—
Jehovah—Lord of all !

Should all the banks in Britain break,
The bank of England smash—

Bring in your notes to Zion's bank,
You'll surely have your cash ;
And if you have but one small note,
Fear not to bring it in ;
Come boldly to this throne of grace—
The banker is within.

All forged notes will be refused,
Man-merits are rejected ;
There's not a single note will pass,
That God has not accepted.
'Tis only those beloved of God,
Redeem'd by precious blood,
That ever had a note to bring—
These are the gift of God.

Though a thousand ransom'd souls may say
They have no notes at all,
Because they feel the plague of sin,
So ruined by the fall :
This bank is full of precious notes,
All signed, and sealed, and free :
Though many doubting souls may say
There is not one for me.

Base unbelief will lead the child
To say what is not true ;
I tell the soul that feels self-lost,
These notes belong to you.

The leper had a little note—

“Lord, if thou wilt, thou can !”

The banker cashed his little note,
And healed the sickly man.

We read of one young man, indeed,

Whose riches did abound ;

But in the banker's book of grace

This man was never found.

But see the wretched dying thief,

Hang by the banker's side,

He cried, “Dear Lord, remember me !”

He got his cash—and died.









